

Bolivia: Araona

Scrip.port. OF

**TADICATAPOA EAJAENATIPO JILICA**

**Versión en Araona**

**AGRADECemos**

**a**

**David C. Cook Foundation  
Elgin, Illinois, E.U.A.  
quienes nos han provisto con  
los dibujos en blanco y negro.**


**TADICATAPOA AI DIA EAHUIQUIBOPO BIYOPO**  
(Jénesi 1,2)

Dia eabetsotacatapo tseiñeo  
Tadicatapoa baepa, eohua eimea. Datsio  
ehuamo enaja bídylloa pehue. Patai-apoda  
pome pehue epo, zeti, badi, tóhuaicana  
tsá-aihue pojo. Batso joda mimi: "Amae  
potaesahua." Atao, amae poíbo. Huada da  
dia eanipo ajái eba. Da amae pomo "tseiñe  
papo" ea. Apodapomo "sisa papo" ea.  
Eabetsotapo tseiñeomo daocua pehue ea.

Hueno-isho dipa mimi: "Ena ma-ai  
baepao jataesahua." Atso huada ena ma-ai  
baepao eahuiquibo.

Hueno-ishamo dipa mimi: "Ena matsi-i  
pehue pajá. Datsihue-isho zada poi papo."  
Dipa mimio dia poánaibo. Da dipa apetso  
bisha dipa mimi: "Eiye, acuicana eohua  
poneti. Jajaipoípocana poneti.  
Janacana poneti." Dipa mimio acuicana,  
janacana dáocuacuahue neti pódada epo. Da  
dia eanipo ajaicata eba, Tadicatapoa.

Hueno-ishamo dipa mimi: "Amae  
poípocana baepao pa-ani, huada eohua  
pabiamamaenetitapojo." Dipa huada zeti,  
badi, tóhuaicana imeame ea. Tseiñe amae  
papopojomo zeti dia a. Sisa amaemasha  
papopojomo badi, tóhuaicana dia ea.  
Dipahue badimo, tseiñetopoi poi ea. Dipa  
apetso da dia eanipocana ajaicata eba.




Hueno-ishamo dipa mimi: "Jaecana paneti, enao jáipocana enao paja. Bónicana baepa emae paponeti." Dipa huada enaopocana imeame ea, bonicana imeame ea. Dipa imeanae huada jodacana ecuae: "Mesasatique. Ezoecana apamo meaque" ea.

Hueno-ishamo dipa mimi: "Eohuao huáenicana, tenaicana papoja." Dipa atso, huada mezimetse dácana eimeape. Dipa apetso huada dácana jaidyacata eba. Dipa atso, joda, hua todinae, shama jaidyaponae cana dipa mimi: "Cuádaja cuada batahue-ishapo imeatsobale. Tsédapocana imeatsobale, huada eohuao, huáenicana, bonicana, jáecana pacuiñatapojo." Potsohue huada tata peadahue eimea, mezimetse. Atso, huada joda jánamiquimehue ea. Eizeneti metso, "Adana" báname ea. Joda Tadicatapo batahue masha cuaeso pocuae. Tadicatapona mimimane. Atso, Tadicatapoa lele jaidyacuemepo me-a, tata Adana poi. Edene eiyeo, manolaijiyo dia ea. Jodo janacana acuijajacana dáocuacuahue póneti pódada me-a. Lele doeteo, netimatamahue

poípo acui peadahue ea. Dipahue dápejo  
jaídyá poípocana masahue poípocana  
nimebamane poípo acui peadahue ea. Atso,  
huada tata Adana do nétime, huada joda lele  
pabiabatapojo. Dipa atso, dipa nime ea:  
"Tata Adana pehue netitsomo ajái pipoma."  
Dipa atso, Tadicatapoa huáenicana,  
ténaicana, bonicana Adananajo dócuaiñape.  
Docuaiñapetao, Adanaja jodacana bánipe.  
Hua eatsahuai poi jaipicatapomo bale  
tsa-ai. Dipa batso, Tadicatapoa Adana  
tahui-anamepasitso pé-atsa peadahue méjemi.  
Jodá pe-atsametse mama ea. Atso, huada  
joda Adana etia. Joda mama eimeatini batso  
Adana dipa mimi: "Ojomo quima etsoámetse,  
quima emimetse eimeatanipo. Ojomo 'mama'  
jejeme pó-ani, Tadicatapoa tataja  
pé-atsametse dia eatani batso" tata Adana  
epo.

Tadicatapoa dipa ea batso aisé tata,  
mama jemiquitso, huada huadi tadi méiyamasha,  
huánenae pehue panetidyea-ezae. Dipa huanei  
poánitsio peadahue cuicha poi batahue  
poanamane.



589

Tata Adanaja huahuane "Eba" báname ea.  
Huatseda cuichahue bime pibisoma, ai  
masahuepo pibabama pojo.

Tsio, Tadicatapoa huatseda dipa  
cuaeme ea:

--Huócuatiyoa mepoque, eohua-idyadae  
tsédapocana panetipojo. Ojó eohua yama  
aiqui tsédapocanaja poi. Dácuichae  
pónetipocana danae dia ashapai. Jáecana,  
bonicana, huáenicana mecuiñaque. Jajai  
poípocana, janacana dáocuacuahue ya aja,  
tsédapocanaja paditapojo. Huáenicanaja,  
ténaicanaja, bonicanaja dipahue paditapojo  
da ya dia eani. Dácana mediaque.

Léledoeteopo acui, masahue poípocana  
nimebamane poípo, joda jájamo pidyma  
atsobale. Joda ditsomo emanae jameiyatibo,  
tsédapo misiohua manoíbo-odi pótsaneibo.

Dipa apetso, huada joda  
imeataiquipocana shamanae "jaidyacue ya ai  
eani" epo. Dipa daocua 6 tseiñeme pehue ai  
eimeape. Huenomo jánahuatseiñe pehue  
Tadicatapo. Dipa huada jodá tseiñe  
pe-ishapo tseiñe poi ea.

JODA HUATSEDA, DIA EABETSOTAPO DETSE,  
DIA A-ATAISI EPOPO BIYOPO  
(Jénesi 3)

Tadicatapoа dipa apetao tata Adana,  
mama Ebanae Tadicatapoа eapo jaidyacuemepo  
leleo nétisa detse.

Dátsiomо nai pi-oloma polelajai. Nai  
a-odi pipoma epo. Tadicatapoа shalada  
metse pehue ai pónetipocana name-odi ea.

Datsio dipahue di-abolo, tsetseshapo  
shama, eohuao poja. Ai sipai jabatitso,  
bacuá poi potso, huada mama Eba huabea.  
Dipa huabeame atso huada mama Eba dipa  
cuaeme ea:

--Joma acuijajacana diquemahue tocue  
metse ata, Tadicatapoа? --eaneti.

Bacuaja dipa cuaetao, mama Ebaja joda  
ecuae:

--Cuipeádahue bale "pidyima aque" ata.  
Jodá sichotso, ditsomo manoíbo-odi  
pótsaneibo. Itsobabishapo pehue atsobime,  
dipahue. Dápejejepocana bale "poetihue  
dime meaque" tsema ata --ea.



Atao, bacuaja joda cuáecata:

--Jime da ditsobime pimanoma po pohue tso dia bame. Da ditsocuichiji bahuepidyacata po pohue tso dipa.

Tadicatapo-ishá batahue poíbo. "Mipa atso ajái, mipa atsobale masahue" bamehue po  
--dipanoshi cuaeme ea.

Dipa bacuaja cuaeme apetao, mama Ebaja acuijaja shámacata. Shamanae dipa nímeba:  
"Janapoi ajaicata sha? Quenaicata jaidyacueme batame ditso. Quenaicata abahuepia poi." Dipa atso sichotso disha.  
Atso, mama Ebaja tata Adana bisha tídyea-ishá. Atao, huadabisha edia.



Dipa dipeme atsohue huatseda cuíchahue  
jabatimehue poána. Bisojae poána. Potso,  
huatseada acui-iña apai-iyopo licuilicuiatso  
jaibadali ea.

Tsiohue eaponanio huatseada, Tadicatapo  
jodo leleo poyoa tsabajatso, acuicana dójojo  
lóbonetineti. Dyamo Tadicataponaе aiyo  
bátini jabatitso dia epo. Tsio, Tadicatapoa  
mipa jejeme ea:

--Tánibi tata Adana. Quetsoi po-o-eti.

Atao, Adanaja jeje:

--Ohué ema. Midya tsabaiquitso, ema  
queoli poani. Cuíchahue jabatitso, dia  
poáni. Dipa jabatitso lóbotini.



Atao, Tadicatapoa joda ecuae:

--Midya cuíchahue pomane po aiyaja  
picuaema pohue sha dipa bamehue eani. Yama  
diquemahue ajapo acuijaja sha tso diqui?  
Da ditsodada metseda cuíchahue jabatimehue  
poeti --ea.

Atao, Adanaja ecuae:

--Midya ema tijapo mamaja da jaja titao  
ya diqui --ea.

Atao, Tadicatapoa mama Eba bícuae bája:

--Jápotsói dia aíqui?

Mama Ebaja ecuae:

--Bacuaja ema tsiloda cuaeme atao yama  
dia aíqui --ea.

Atao, Tadicatapoa joda bacua dipa  
biatsaneme ea:

--Midya joda mama dipa mepoa aíqui  
batso ya mi sáecuemelipipo poi  
eahuiquibo-ani. Tácuatibometse pehue  
poyoalelajai ya mi eahuiquibo-ani. Midya  
dia aíquipo mamanae peaja doda jabati pehue  
pó-ani. Midya-atacana mama-atacananae  
dipahue-ishá pomatamahue pó-ani. Joda

mama-atacana peadajamo midya dipa asha-odi  
alelajaiposhili da mehueya  
m  huiquiataibo-ani. Midyaja bale huada  
a-odipo mehueyaibotoa pipoma --ea.

Atso, mama Eba bisha huada ecuae:

--Midya dipa poeti batso, midya  
todilipi jaidyaohue eanitsio nedacueme mi  
balelajai e-ani. Dipahue miqueda eahu  ami  
ilo-odi e-atani.

Atso, tata Adana bisha huada ecuae:

--Yama eaniohue pehue pojaepoi poeti.  
Cuehu   miqueda huanea eataniohuecata  
po-o-eti. Dipa batso, yama eohua  
m  sati-aibo-ani mae. A-asapocana,  
cuizaipocana m  loemepeibo-ani mae. Dyamo  
behuehue modotso sahuadoatso pehue midya ai  
d  neti-odi p  tsaneibo. Eizeneti tsonoime  
mi dia p  -ani. Dipahue, miqueda emei,  
mezimetse eapo, esichanatso m  noibo.  
Noahue mezipoi po  bo-ish a --ea.

Dipa cuaeme apetsohue, Ta  dicatapoa  
huatseada poi jaibai me-a hu  enibiqui  
metse. Atso d  metse j  ibaeme. Dipa atso

huada huatseda jodo jaidyacatapo léleomo  
shéhuihuiquibo. Huatseda shehuihuiquibotso,  
huada hua-eiloi shama beta jodo nétimeibo,  
joda lele pabiabatapojo, aiyaja  
netimatamahue poípo acuijaja noahue  
pidyiboma-ishá pa-atapojo.



**TATA CA-IÑA TATA ABELE DETSE DIA EPOPO  
BIYO**  
(Jénesi 4,5)

Jodo Edene lélejeneti podeibotso, pe-ishapo lele huadae aibotso, tata Adana, mama Ebanae nétidyeibo. Potsodetsea todi badea. Joda todilipi jaidyaohue poibojo mama Eba mimi: "Tadicatapo dia métanio todilipi ya dia eabani" epo. Joda todi Ca-iña báname ea. Joda dipa eshoi atso peada todilipi bádeibo-isha. Joda bisha jaidyaohue pojo, Abele báname ea.  
Eabetsotapo, tata Ca-iñamo, esipotso, tejepoi epo. Tata Abelemo, esipotso, obeja cuiñai poi epo. Dipa netimetsio, tseiñé peadao, Tadicatapo mipa aque atao, huatseada Tadicatapo ai tijae detse batí. Potso, Ca-iñaja huatejeo pónetipo janacana eati. Atitso, Tadicatapo etia.  
Tata Abeleamo obeja jaidyacatapo beta ishetso, sepitso, etseilacuapo pezocana etia. Tata Abelea titanipo bale

Tadicatapoa jaidya eba. Tata Ca-iñaja titanipomo nimetsia pipoma eba. Dipa asatso tata Ca-iña záiqui-ana. Pojo, Tadicatapoa joda ecuae:

--Jápotsoi záiquianani? Midya nimetsiapo tijaobale ya mi jaidya ba. Midya zaidyamahue poibo-ishá. Midya ai nimetsiapo ai pitiboma ajaomo di-aboloa bale mi jémiataibo-ani, tsácata mi pó-ani --ea.

Tata Cá-iñamo dipa nimeba: "Mae dia pojaidyaе papo mae" pehue epo. Tseiñé beta potso, huada hua mamazao dipa cuaeme ea:

--Tseda eiyeo pojati --noshi ea.

Dipa potime potso huada joda eishe-anaibo.

Tata Ca-iña leleo cuaiñabojo, huada dipa eatanipo masahue batso, Tadicatapoa joda dipa bicuaebajame ea:

--Quetso miqueta mamazao?

--Quétsozai --Ca-iñaja dipanoshi cuaeme ea--. Emamo jodá mamazao bíabaiji poi pipoma --pehue epo.

Atao, Tadicatapoа ecuae:

--Midyaja ema picuaema pohue midyaja  
mique mamazao tso ishe-anaiquia ya  
bamehue. Dipamo masaecata. Midya dipa  
aiqui batso, dyamo midya teje asa-odipo  
molojaidya pipoma pótsaneibo-ani.  
Jíobaleneti pehue mi pó-ani --ea.

Tadicatapoа dipa tsaneme atao, Ca-iña  
pe-ishapo eiyebeneje poíbo. Jodo dipa  
netijajobotso huanei poíbo. Potso todi  
badea, tata Enocolipi. Apamo malame potso  
Ca-iña átahue-ishapocana apamo jodo neti.  
Jépemo obeja cuiñai poi epo. Jépemo  
peamacana imeaiji epo. Jépemo cuene dehue  
batahuepocana poi epo. Tata Ca-iña dia  
poánitsio tata Adanaja hua léleohue todi  
peada eimeibo-isha. 130 ócuahua malame  
netime tsio dia ea. Joda todi Sete báname  
ea. Tata Sete esi pope-ishatso tata Enoso  
eimea-isha. Joda tata Enoso nétitsio  
tsédapocana Tadicatapohuapo pótsane.  
Tata Enoso átahue-ishapo peada tata Enoco

epo. Joda tata Enoco Tadicatapo jaidya baiji polelajai. Dipa batso Tadicatapoa joda dipa eizenetihue jóodada ea, hua leleo panetijanatipojo. Joda tata Enocoa eabetsotapo bácuuedea, tata Matosaléne epo. Netisicata epo jodamo. 969 ócuahua malame netitso mánoibo. Huada otse peada tata No-é bániime epo.

**TADICATAPOA EOHUA DA-A-AIHUE  
CUEZO-ANA EMEPO BIYOPO**  
(Jénesi 6-9)


Joda tata No-é dipa netimetsio, tsédapocana jahuocuatitso, sáecueme netime pehue Tadicatapoa eba. Masahue poípo nimebatso bálecata pehue emi pó-oneti poáni eba. "Dá-oceanaja ema neda abishapo pehue eatani. Daiya pi-imeama ajaidyaе atae ea. Dácana ya maesa pa-apeibo. Huáenicana, ténaicana, bonicana naehue dia ashapai pa-aibo" epo.

Peada tata pehue, tata No-é pehue,  
jaidya huada eba. Joda tatá bale  
dájaidyabai polelajai. Huada bácu deacana  
quimishanae neti. Tata Seme, tata Cama,  
tata Japete dáocuameme bácu dea. Tsio  
Tadicatapoa tata No-é ecuae:

--Jepé náedamo sáecueme-odi pehue yama  
bani. Jaishe-anapetibo bíshapo pehue  
po-ojae bani. Dipa poáni batso yama  
dáocuacuahue eohuanaehue maesa pamepeibo.



Eohua da-a-áihue cuézoana pameibo, enaja padipetaibopojo. Miqueda poi bale canahuatae jálidiyacata aque. Tsecuetomoiji aque. Tadada batahuepo metse pepapeque. Dipa atso dameo nobitsobale. Miqueda huánenae, bácuedeacananae, hua huánecananae dia potsobale, do izé papo-ezae. Huáenibeta, ténaibeta, bonibeta donobiaque. Da huaeni dea peada, poná peada. Da huaeni dea peada, poná peada. Da tenai dea peada, poná peada. Da boni ecuae peada, poná peada. Da boni



ecuae peada, poná peada. Micanaja ema tilelajaipo huáenimo si-ete (7) dojotsobale. Bonicana dipahue-ishá. Micanaja ai diacana dipahue donobiaque --ea Tadicatapoá.

Huada dipa cuaetaohue tata No-ecanaja datsiméhue eatsane. Si-é (100) malame modotso eape. Dipa apetao Tadicatapoá tata No-é ecuae:

--Canahuataemeo menobipeiboque midya, miqueda bácuedeacana, huánecananae. Huáenicana, bonicana, ténaicana dipahue --ea.

Atao, tata No-ecana canahuameo nobi. Huáenicana, ténaicana bonicananae nobi. Tata No-é 600 ócuahua malame bepoatsio dia epo. Dipa popeohue Tadicatapoá canahua tsécuetomoiquibo. Atso, huada nai eoloemetsane. Dipahue eohua matsi-ilala eahuiqui, eohuatipaeneti ena sho-anicuainame papopojo. Atao, ena shodotsoatime. Nai da anetiquitihue.





Cualeta (40) tseiñeme nai tseiñe-odi pehue epo. Eohua bíyiloapoda. Acuicana, eohuashocuecana bíyiloa. Zéibadeo tsédapocanamo huídyipe. Eiyeo pojapo ai misiohuanae, bonicananae dia popai. Canahuatae pehue bézatsoa. Dameo eanipocana pehue eizeneti. Cuátolo badi batahue potso Tadicatapoa nai eolohueyameibo, eanicuaiñapo ena mi eme.

Atso huada benibisha eilo, eohua  
pazazajaemetapojo. Huada dia atao 5 badime  
tsonoa bázaja pehue potso canahuatae  
ehuashocue cuichao pai poíbo. Dos (2)  
badi lijihue poibo-ishatsodada ehuashocue  
jépehue batai poíbo. 40 tseiñeme shipa  
poibo-ishao tata No-é jamani eilohuiqui,  
ehua zajadapo que-ani pabatapojo. Joda  
pipobeiboma. Peada semana poibo-ishao  
huaibisha eilohuiqui. Eohua zajadapo  
tsa-ai batso joda cuabetsabaletitso,  
canahuameo eaniñaibo-isha. Peada semana  
poibo-ishao joda eilohuiquibo-isha.  
Aponabeneje acui-iña jajobotia huai  
cuáiñaibo-isha. Peada semana poibo-ishao  
No-éa huai eilohuiquibo-isha. Eohua beta  
azaja batso bedada da jetanatitibahue epo.  
Huai dia atso, peada badi potso,  
tsecuesilohuiquitso, bapetso, ena tso tiope  
tata No-éa eba. Shipa betacata badi  
poibojo eohua zázaja poíbo. Dose ócuahua  
badime canahuataemeo popeodada, Tadicatapoa  
tata No-é ecuae:

--Pa. Bácuedeacananae, huánecananae  
mehueti-anapeiboque. Bonicana, huáenicana,  
ténaicana medohuetianaiboque, dácana  
pasasatibo-ishapojo --ea.

Atao, dáocuacuahue huétianapeibo.  
Tadicatapoа ize ataiqui jabatitso tata No-é  
Tadicatapo ai titsobalecata bati. Dipa  
potso, huada majanacana ládatsoa. Atsobisha  
cuati dábiyo maiya. Atsobisha,  
Tadicatapo tilelajaipo huáenibeta, bonibeta  
eishe. Joda eami cuatibiyo ishatso, cuati  
hueta. Joda tópeasha, teziji pobishapope  
papopojo. Dipasa Tadicatapo ai tíbome  
pa-a-ezae dia ea. Huada dipa time eatanipo  
Tadicatapoа ajái eba. Atso, joda mimi:  
"Quetsio noahue-isha eohua da-a-áihue  
cuézo-ana-isha pi-aiboma daiya e-ani,  
tsédapocana ai masahuepo tsídojo alelajai  
pohue. Hualibao baepao huana-odi daiya  
e-ani, quetsio yama enametse eohuaopocana  
maesa apeibo-isha pi-ama tsédapocanaja  
bamehue pa-atapojo." Potso, huada dácana  
ecuae:




--Todicana apamo meaque,  
mehuocuatique, eohua da-a-áihue  
panetipeibo-ishapojo. Dyamo huáenicanaja  
bonicanaja jáecanaja micana amojiji poi  
bátsaneataibo-ani. Dácana di poi dyamo ya  
eani. Micana jana, acuijaja pehue  
disalelajai. Dyamo eamimetse  
metemitsaneiboque. Aisé tsédapo aiyaja  
maesa pi-ama atsobale, tsédapocanamo ema  
batahuemasha sahua batso. Da ijada  
atsobale. Ai huaenia aisé tsédapo maesa  
ataomo, joda bisha ishe-anaiboque. Tsédapo  
paihue jaishetio, dipahue.

**TADICATAPOA TSEDAPOCANA JEPE AI JEJEPEA,  
JEPENO AI JEJEPEA, EAHUIQUIBO PO BIYO**  
(Jénesi 10:32-11:9)

Dipa eohua cuezoáname popeo, ize  
poetipocana huócuatibo. Dipa  
jahuocuatibome potso nétidyeapeibo. Datsio  
dáocuacuahue dipa-odi ai jejeme pósahua.

Damo ai jejepea damo ai jejepea pipoma.  
Tseiñé peadao tsédapo beta dipa cuaeti:  
"Cuada lele jálidyapo aibo. Etae  
a-atoponae apai, baepao matame pa-a-ezae.  
Do beta do beta pipoma papo-ezae dia a.  
Jépecanaja cuada jaidyacueme bátani  
pa-atapojo dia a." Dipa jacuaetitso,  
cánaja da eatsane.



Jodacanaja lele jálidypo, etae  
amahuabojocatapo eatani baibotso  
Tadicatapo dipa nime eba: "Ojocana dó-odi  
nétipomoni dipa-o. Dipa-odi mimimepomoni  
dipa-o. Paja poetipohue po-o-odi. Yama  
eaniohue pipoma. Dipa batso yama dácana  
jepe ai jejepea, jépmemo ai jejepea,  
pa-ahuiquibo." Dipa eshoi nimebatso huada  
dipa eibo. Atao, jodacanaja dipapehue ea.  
Etae easatanipo eahueya. Do beta, do beta  
pehue pópeibo. Dipa potso joda lele  
"Babele" jejeme eatsane, jodo Tadicatapo  
tsédapocana ai jejepea-odi eibo pojo.

**TADICATAPOA TATA ABAMA DAHUAPÓ EMEPO  
BIYO**  
(Jénesi 11:10-12:9)

Apamo mala potso,  
tata No-e-atahue-ishapo peada neti.  
Tata Abama báname joda. Cadeacana néticapo  
dójojo neti, Ole leleo. Huada huane  
mama Sala nae do neti. Joda datsio bacuai

pomahue. Tseiñé peadao Tadicatapoa joda  
pa cuaeme ea:

--Abamalipi, micanaja eiye, micanaja  
le, miqueda doémetsecana meiyashaoboque.



Yama "jidyo netique" cuáe-ani pójojo pehue, da netiñaiquibahue poque. Midya dipa pojobale cuíchacata poi yami mea.

Midya-atacana dipa pýoapo pamodacueme yama atame. Midya tsiba ai-aipocana yama pea tsíbahue-ish a. Midyá masabaipocanamo yama doda bahue-ish e-ani.

Midya-ata-odipo peadanae eohuá idyada netipocana jaidyapoimasha pó-ani --ea.

Tadicatapoa dipa cuaetao, tata Abamaja hualele méiyashaobo. Hua tádinae, hua huánenae, hua mamazaohua bácuuedea tata Lotonae cana pýaenaibo. Canana eiyebeneje poíbo. Jéteohue Alanaleleo nétishana. Dotsio huatadi, tata Talé, mánoibo. Da manoibojodada tata Abama déatibo-ish a Canana eiyebeneje, Tadicatapoa atashahue. Hua huánenae, tata Lótonae, bácueneicananae, do cuiñalelajaipocananae dia epo. 75 tsonoa malame tsio dia epo, tata Abama. Apamo tseiñe ajetso Canaña

eiyeo cuáiñatibo. Tséjonopeapo Cananacana  
do nétipohue, Tadicatapoa tata Abama  
ecuae:

--Bemipa batamepo eiye  
midyatsejonocana tí-ani bécata --ea.

Atao Abamaja jodo majanacana ládatsoa  
jodabiyo Tadicatapo ai patia-ezae. Atso,  
bácuenei peada ishetso, majana biyo joda  
tópeasha, teziji pehue papopojo. Dipasa  
Tadicatapo ai tibome ea, ajái emami eani  
pacuaeibo-ezae.

**TATA ABAMA TATA LOTO MEIYATIBOANIPO BIYO**  
(Jénesi 13)

Beta malame jodo potso tata Abama  
tata Lótonae bácuenei tipao, ai tipao detse  
poána. Huatseda dótatse neti pojo  
bácueneicanaja diji acuehue detsea eba,  
notsa acuehue eba. Abamaja bácuenei  
bíabaijipocana tata Lotoa da  
batahue-ishapocana notsa biyo peaja  
jatsanetsaneti po-odi epo. Dipa cana poani

batso Abamaja tata Loto ecuae:

--Midya quima todí batahue sahua.

Tsédamo doda pibatima potsobale.

Tsímeiyatibo potsobale. Joma eiye shamaapeque eshoi. Cuipatso hueje ai? Mábene ajái miqueda potsomo emamo dáhuapotí. Dábene ajái potsomo emapo huápoti --ea.

Abamaja dipa atao, tata Lotoa jodopo eiye nímepipe. Mano Jodana cuichaopo eiye ajái eba, jodo ena apamo eja batso, jodo pónetipo notsacana abeise batso. Dipa nímepime atso huada Abama ecuae:

--Jomó ja ema, mano Jodana cuichao. Jomomonia ajái batame. Jomo emamo papobaibo --ea.

Potso aicananae, bácueneicananae pójaenadada epo. Sodomalele jacuepati pójajobetsotasa. Joda léleopocana atsacata netime pohue, Tadicatapo masabai pohue, dánajo dia posha. Tata Abamamo shomanetibome, eohuashocuecana dójojo. Huatseda dipa jameiyatibome pojo,

Tadicatapoа Abama dipa cuaeme ea:

--Shamapeque. Be mipapo eiye, be ma-aipo eiye, midyatsejonohue-ishapocana yama tí-ani bécata. Jodacana pamodacuemа ya mé-ani bécata. Pamodacuemа batso aiyaja topotoa pipoma pó-ani --ea.

Tadicatapoа dipa cuetao, Abama, Jebonolele pejo nétijajobo. Dóbisha huada bácuenei peada eisheibo-isha, tópeasha Tadicatapoа poi. "Ajái emami eani" pacuaeibo-isha-ezae dia ea.

**TATA LOTO ABAMALIPIA IZE EAPO BIYO PO**  
(Jénesi 14)

Tata Lótomo, Sodomalele jacuepati netisatso, dácananajo pójaichacataibo. Jodopocana atsacata netime pohue dia posha. Tseiñé peadao joda jodo nétitsio, pé-ishapo eiyejenetipocana do cuáiña-o-isha. Ecuichacana aicananae metsijipai pa-ajao-ezae dia epo. Dipa

cuaiñame potso Sodomaleleopo tatacana jepe eishe-anaibo. Dipa apetso, ishejepetiquipo beta, hua aicananae, hua janacananae, donaibopai ea. Tata Loto dipahue daocua ejeo. Dácaña dipa eatani dójojo ize poánipo Sodoma tata peadaja tata Abama cuáenaibo. Cuaetaohue, Abamaja jodanajopo tatacana apamonae tata Loto dónataiboanipocána huájododoanaibo. Tejetibotso sisae dácaña eisheneti. Ishehuiquitso tsijijaotiquipo ecuichacana, tata Loto dipahue, médobeibo. Aicana dipahue médobeibo. Abamaja dácaña dóbeataiboanitsio, Selemelele netimetsepo tata, Mequisedéque bániépo, joda huánaibo. Janalimi, eiziji dónaibo. Tadicataponae mimi poípo joda. Jana, izi tinae huada tata Abama ecuae:

--Tadicatapoa midya shipaecata pa quiami atame ema bátini. Huada midya eatsahuatani, jaditijipocana pashehuipojo, batso yama joda jálipiquia cuaeni --ea.

Huada dipa atao, Abamaja joda huada dóbeataiboanipo aicana beta tibo.

Atao, Sodomalele netimetsepoa bisha joda huánasaibo. Huanaibotso huada Abama ecuae:

--Emanajopo tsédapocanamo pehue ema tíbotsobale. Cuámaja aicana, midya dóbeiboanipomo, midya jemique --easahua.

Atao, Abamaja joda ecuae:

--Ji micanaja ai yama jemitoa pipoma. Tso yama Tadicatapo dipa cuaeme aja: "Yama Sodomacanaja aicana da jemiquihue pi-ama atsobale, dácanaja 'Cuadaja Abama ai tipao ea' atoa pipoma pa-atapojo" --ea.

Atso, médoibeiboanipocana Sodomaleleo docuaiñaibotso, joda huáleleo pónaibo.

**TADICATAPOA ABAMA POI AI DIA EATANIPO  
BIYOPO**  
(Jénesi 15)

Abamaja joda atapeapocana ishehuiquitao, Tadicatapoa joda ecuae:

--Queoli pipoma potamesahua Abamalipi. Yamami péyoneti e-ani, aiyaja midya

nedaiji atoa pi-ama pa-atapojo. Dipahue  
ema midya tsiba batso ai jaidyapo  
metia --ea.

Atao, Abamaja ecuae:

--Ai poitso elijo dia a? Emamo  
behuehue maesa poíbo-ani pohue tso dia a.  
Midyaja ema ehuiohue todi pitima batso ema  
manoíbojo emanajo nétipo tataja,  
tataEliasaja bale quima aicana  
jémishiliataibo-ani.

Tata Abama dia pojo, Tadicatapoa  
tsíshabaja ea:

--Miqueda todi poyoa pó-ani pohue tso  
mi dia poáni. Midya-atahuepocana apamo  
pó-ani pohue tso dia bame. Tóhuai-ocuahua  
micana pólipi-ani.

Tadicatapoa dipa cuáetanipo biyo  
tata Abamaja "Bedia daehue quepo" pi-ama.  
"Dáehuecata daquia poíbo-ani" pehue tsipo.  
Tata Abamaja joda tsi-a pehue poáni batso  
Tadicatapoa joda jaidyacata eba.

Atso, huada Abama shipa cuáe-eje:  
--Dipa bamehue atamesahua.

Midya-atahuepocana atapeapocanaja eiyeo  
panetipasi. Dópocanaja midya-atacana hua  
eilóicana poi cánaja mi e-atani.

Cuisoliji-odi mi e-atani, pamodopojo.  
Cuátolosi-eto (400) ócuahua mala dipa mepoa  
a-isi e-atani. Midyacuisoliji pó-anipocana  
yama biatsanejaidya pa-a. Yama dipa aibojo  
midya-ata-odipocana joda eiye  
méiyashaobo-ani. Aicana apamo jeminae da  
méiyashaobo-ani. Jidyo Canana eiyeopo  
cuaiñaibo-ishá mi pó-ani. Cuaiñaibojo, ya  
micana ojo eiye métibo. Ejito mano  
Opate mano janabacuaopo eiye da-a-aihue  
métibo. --Dipa Tadicatapoa Abama bécata  
dia pó-anipocana cuenecuaepeme ea.

**TATA IMA-ELI JAIDYAOHUE EPOPO BIYO**  
(Jénesi 16)

Di-é (10) mala poibo-ishao,  
jaizoasatibotso, mama Sálaja hua eahue  
tata Abama ecuae:

--Ji ema dipahue todí badetoa  
pirocata batame. Quima eatsahuaipoipo,  
mama Acalanaepo jaque, quimapoi todí  
pa-atapojo.

Atao, Abama jodanae jásisa. Dipa  
potso mama Acala méjehue pipoma. Dábale  
dipa poáni jabatitso, huada mama Sala  
"midya masaelipi" eatsane. Atao,  
mama Sálaja bisha joda doda bame ea,  
nedaiji eatsane. Atao, mama Acala  
lóbotibo. Jalobotibojo, Tadicatapoa  
lélejenetipo eilóiya joda huanatso ecuae:

--Mama Sálanajo ponaibo-ishatsobale.  
Huada eataniohue potsobale. Todilipi mique  
jaidyaohue pó-ani. Jaidyaohue pojo  
"Ima-éli" báname mi e-ani. Joda-atacana  
apamo pó-ani --ea.

Tadicatapoa eilóiya dipa cuetao,  
mama Acala tata Abamaja leleo

cuáiñabo-ishá. Potso todí jaidyaohue poibo.  
Pojo, Abamaja joda "Ima-éli" báñime ea.  
86 malame bepoatsio dia epo.

**ABAMA TADICATAPO JAIDYA BANI-ODI POJAE  
JABATITSO CUICHAO BOANAIJI EAPO BIYO**  
(Jénesi 17)

13 mala poibo-ishao tata Abama  
99 malame bepoatsio, Tadicatapoа noahue  
jodanae mímitsoatibo-ishá. Dipa cuaeeme ea:  
--Tadicatapo ema. Jojidycatapo ema.  
Yama eaniohue midya posha pojobale,  
ai ñimeoma neti pojobale, yama mipa  
ataibome e-ani: Midya-atacana huócuatiyoa  
pameibo. Dácana jepe netimetsepo poi  
pameibo, pe-aso netime pameibo. Yama midya  
dojojaidya mea. Midya-atacana dipahue.  
Ojó eiye, Canana eiye da-a-áihue  
tí-ani, micana ata-odi pehue  
papojanahuatipojo. Midya yama cuáenipo  
ajai batsomo, ema jaidya bani-odi pojae  
potsomo, miqueta cuichao boanaiji aque.

Eticuebo biqui seohuiquique. Dipa aque tseda dipa cuáetinipo mate pi-iboetama pa-a-ezae. Midyanajopo tatacana dipa-odi aque. Midya-ata-odicanamo dipa-odi atsobale. Ai todi jaidyaohue pojo ocho tseiñeme potso, dia a-odi atsobale --ea.

Atso huada joda shipa ecuae:

--Todilipi ya mi patibo, mama Sala cuichao --ea.

Tadicatapoa dipa cuaetao, tata Abama náishaja ponae dipa tsipo: "Ema 100 malame bepoa bime tso ya todi imeatoa posha dia bame. Mama Sálamo 90 malame bepoa bime todi huaepetoa sha bame" tsipo. Pojo Tadicatapoa ecuae:

--Mama Sálaja miqueda poi todi e-ataibo-ani cuáesani ya mi. Peada mala potso joda jaidyaohue pó-ani. Tata Isaca mi báname e-ani --ea.

Atao, Tadicatapo jaidya báni-odi pojae jabatitso Abamaja Tadicatapoa eataniohue eibo. Jodanajopo tatacana eticuebo biqui meseope-odi ea. Huatodi tata Ima-éli dipahue ea. Jópehue dipahue eati.

**TADICATAPOA LELEJENETIPOCANAJA  
ABAMA DIPA CUAESHAOME EAPO BIYO**  
(Jénesi 18)

Tseiñepeadao, Abama hua-etáe  
tsecue-anaiyo eani-epo. Tsio,  
jadotsoatitso, ai bápenio, jodo quimisha  
tata batamepo banetitso shohuaname. Atso  
huada ecuae:

--Jidyo mejanahuapasique. Aidyi-ae  
quepotsoicana? --ea.

--Dipahue --pojo, Abamaja jana  
mé-anati. Jana apetao, eami jiñapeo, cana  
etia. Dipa didiapetsohue báshaoji poánipo  
peadaja Abama ecuae:

--Peáda mala potso mebashaobo-ishá.  
Dátsiomo mama Sálaja todilipi dójota  
pó-ani --ea. Tadicatapoahuesa dia ea.

Mama Sala, huada cuáetanipo  
tsabajatso, "náishaja" pehue epo, dia potoa  
pipoma jabatitso, esicata jabatitso.

Mama Sala dipa mimime pojo, joda

Tadicatapohuesapoa Abama ecuae:

--Jápotso mama Sala "náishaja" pehue  
poáni? Yama dipa metoa pipoma bamé sha  
eatani? Yama ai dipa memane bamehue  
atsobale --ea.


Dipa popeo, báshaojipo betacatamo  
ehuio Sodoma lélebeneje deati.

Tadicatapohuesapoa Abama doe  
mímítsoa-ejemasha. Huada joda ecuae:

--Sodoma léleo-opocana, Comola  
léleo-opocana sáecuem-e-o-odi tsabaja-odi.  
Dia poque a-ataisi. Dyámasamasa-odi. Da  
léleopocana cuámaja bánati-ani. Dáehuecata  
batsomo daiya maesa eibo-ani --ea.

Atao, hua doémetse, tata Loto biyo  
nimebaibotso, Abamaja joda dipa ecuae:

--50 ócuahua jaidyapocana Sodomo leleo  
neti pojomo dáocuacuahue maesa que-atso mi  
e-ani? Jaidyapocananae atsacatapocananae  
maesa apai pi-ama amane bamehue ji midyamo.  
Shabaiji poi jaidyapo midyamo --ea  
Abamaja.



Atao, joda Tadicatapohuesapoa ecuae:

--Jodo 50 ócuahua jaidyapocana neti  
pojomo jodopocana maesa pi-ama.

Atao, Abamaja ecuae:

--45 pehue jaidyapocana pojomo tso  
cuipa?

Tadicatapoa ecuae:

--Dipahue, maesa pi-ama.

--Da 40 pehue pojomo tso cuipa?

--Dipahue maesa pi-ama.

--Da 30 pehue pojomo tso cuipa?

--Dipahue.

--Da 20 pehue pojomo?

--Dipahue.

--Da 10 pehue pojomo?

--Dipahue.

Dipa ahuiquishahuiñaibotsodada, joda  
Tadicatapohuesapo tia pónaibo. Abamamo  
hua-etaezo nóbibo-ishá.

**TADICATAPOA SODOMALELE COMOLALELE  
MAESA EAPEIBOPO BIYO**  
(Jénesi 19)

Eaponanitsio ehuio potitipo detse jodo Sodomaleleo cuáiñati. Joda leleo cuaiñatio, tata Lotoa ecuae:

--Jidyo emanajo medidiashanaque. Jidyo tahui mepoque.

--Ja --potso detse etaezo nobi. Dipa didiame pópeanio jahuanabojaetsio, daleleo nétipo tatacana jodo póbeape. Pobeatso, cánaja tata Loto dipa jéjejajo:

--Midyanajo jáshanaiboanipo tata detse dobeaque jodá detsenae jatso, bátini papo-ezae --ea. Tata pai bime dipa-o ea.

Dáshilicanaja dipa jejetao tata Loto huéti-ana. Huetianatso, tsecuetomoiquibotso, huada jodacana ecuae:

--Mamazaolipicana dipa potsomo masahue. Dipamo pojae pipoma mepoque.

Huada dipa asatao, joda atsacatapocanaja joda nónononoahuiqui.

Tsécuetomoi huápahuapahuiqui ea. Dipa eatani batso cuáiñanipodetsea tata Loto lécuecueatibo etaemeo. Dipa atso huatseada joda dipapoi poánipo atsacatacapocanaja etoacana tso díloapehuiqui. Ai batoa pipoma eme dácana. Atso, huatseada tata Loto ecuae:

--Ojo léleshili patai-asidya pome Tadicatapoa bátani. Dipa batso huada tsema ilohuiyajaotaiqui ojocana maesa pa-apeibopojo. Náatso huánenae, todicana, anodicananae, dácana ja eahuepoi pó-anipocana nae pojaenapeibotsobale --ea.

Atao, tata Lotoa hua anodidetsea jémiataibo-anipo tatadetse cuáe-anasati, náatso papojaenaibopojo. Dádetseamo "bea dipa" pehue ea. Potijae pipoma. Huénanitsio, Tadicatapoa lélejenetipo eilóidetsea tata Loto cuáebo-ishá:

--Náatsomoni mique huánenae anodidetsenae pehue pojaenaibotsobale, maesa pipoíboma papo-ezae --ea.

Tata Loto dátsiohue "Jaa" shopopodame  
pipoma batso, Tadicatapoa eilóidetsea  
tata Lotocana bai-iñatso lele shípalimi  
pajododotia ea. Atso peadaja ecuae:

--Shipa mejododo-ejeque maesa pipoa  
papo-ezae. Ebebahuiquimo pi-ama.  
Eohuashocuecana dójojo pojajopasique.  
Tadicatapoa ojo manocuichaepo eiye  
da-a-áihue maesa eapeataibo-ani beo.

Atao Lotoa ecuae:

--Jodo eohuashocue dójojo jaidya  
pipoma quiamo. Shopi dáhuehuepo  
léletsidiopo pojajobotso tsozai  
quejai? --ea.

Atao, Tadicatapoa eilóiya ecuae:

--Ja, dipahue. Do mepoque --ea.

Atao, tata Lótocana Zóalelebeneje  
dáhuapotí epo. Tata Lotoa huánemo  
ebebahuiquibo ea. Dipa potso, doe sao poi  
pónetibo. Tata Lotó bale,  
bácueponadetsenae pehue Zóaleleo  
cuáiñatibo, zeti toazalalipi poánio.

Dácana jodo cuaiñatibojohue, Tadicatapoa  
báepaejeneti atsamadi otso batahuepocana  
eolóemeibo. Sodomalele cuichao Comolalele  
cuichao, dápejejepo lélecana idyada dia  
eape. Atao, ecuichacana huáenicana  
dáocuacuahue mánopeibo. Etaecana téjecana  
maesa pope. Tata Lotó pehue ize-epo.  
Tadicatapoa joda ijada eba, joda Abamaja  
doémetse batso, Abama jaidya bani batso.

**TATA ABAMAJA TODI**  
**TATA ISACA JAIDYAOHUE EPOPO BIYO**  
(Jénesi 20-21:21)

Sodomalelecana maesa popeibojo,  
tata Abama, malabeneje poíbo. Jélalele  
pejo nétijajobo. Jodotsio Tadicatapoa  
cuaeme eahue mama Sálaja todi bádeibo.  
Joda jaidyaohue pojo, tata Isaca bánime ea.  
Dipa jaidyaohue pome potso shipa ocho  
tseiñeme bepoatsio tata Abamaja jodalípia  
eticuebo biqui meseo. Tadicatapoa dipa  
aque eapo tsimehue ea. Tata Abama

100 malame bepoatsio dia eibo. Beta mala potso, todilipi sosohueyao, tata Ima-élia tata Isacalipi jíchotani mama Sálaja eba. Jazaiquitso mama Sálaja huatadi Abama ecuae:

--Mama Acala huatodi Ima-élinae queapotiaso ilohuiquibotsobale mae. Midya manoíbojo, tata Ima-éliamo miqueda aicana pijemima ataesahua. Quimapo todia, tata Isacaja bale, miqueda ai dáocuacuahue jemibotsobale. Huada midya tsiñeti-aibotsobale --ea.

Mama Sálaja dipa atao, Abama níme-isiqui, huada todi Ima-éli abada pojo. Tsio, Tadicatapoa Abama ecuae:

--Mama Sálaja cuaeme eataniohue atsobale. Mama Acala, Ima-élinae ilohuiquiboque. Tata Isacalipi bale "metibo ya mi" ashapohue. Joda-atacana bale midya-atacatapocana pó-ani. Tata Ima-élimo midya-atahue sa bime tsejonopea poi pó-ani, cualapea batso.

Atao, Abamaja mama Acala, todi Ima-élinae, eilohuiquibo. Atao, Tadicatapoa huatseda biabaiyoajaidya ea.

**TADICATAPOA TATA ABAMA  
PA-APOHUE EANIPO BATAHUE EAPO BIYO**  
(Jénesi 22:1-18)

Beta mala potso, tata Isaca huáezacua pótsanenitsio, Tadicatapoa dipa nímeba:  
"Abama emahuapotoacata quepotso pojo,  
'Miqueda todi ema tique' ya pa-aba." Dipa nimebatso Tadicatapoa Abama ecuae:

--Miqueda todi Isacalipi Molía eiyebebeneje dojoque. Joda alisolipi bani bime dápehuelipi bani bime, dojoque. Jodo cuaiñatitso, ya "jodo poque" e-anipo eohuashócuematao miqueda todi ema tique. Ema midya eami time alelajai batahue-ishadai ea. Topeashaque --ea.

Atao, hueno sisaehue, Abamaja cuati beta tózoibo dáhuapotí padajo-ezae. Atsohue, molabiyo aicana eishape. Potso, todi Isacanae, eiloi betacata nae cana potí. Tseiñé peada pojaenatso sisá peada potso hueno-ishadada Tadicatapoa jodo cuáetanipo eohuashocue aocuepi baiqui.

Eohuashocue baiquitso, Abamaja eilóidetse ecuae:

--Dyo meanipasique. Tsema todinae pehue jomo nóati-ani, Tadicatapo jaidya bani pa-a-ezae --ea.

Atso, huada cuatipezocana Isaca etia, pamapanatapojo. Cuatí huetai, cuishilo izamibotso detse deati todinae. Máocue bepotiátsio tata Isacalipi mimi:

--Tadilipi, cuatí pezocana poyoa.  
Dametse huéta-anipo dipahue. Da cuatichojo tópeasha-anipo obejamo tsai bitso dipa.

Atao, huatadia ecuae:

--Tadicatapoahue bale joda  
tiatani --pehue cuaeme ea.

Potsodetse déati-ishá. Eohuashocueo cuaiñatitso, Abamaja eshoi majanacana ládatsoa. Dábiyo cuati tóloneti. Atso huada huatodi Isaca eiji. Ijipetsohue cuatibiyó huana. Atsohue cuishilo líleti, dámétse todi paseobo-ezae. Cuishilo jíaticanimepaihue Tadicatapoa báepaejeneti dipa jejeme ea:

--Abamalipi, Abamalipi --ea.

Atao, Abamaja --Patso --ea.

Tadicatapoa ecuae:

--Miqueda todilipi daehue pi-ishema  
aque. Midyaja ema iyodapoi bani bamehue  
yama bedada. Miqueda todi ema tísaboani  
batso dipa bamehue dyamo --ea.

Tadicatapoa dipa apetao, Abamaja  
zédabeneje báhuiqui atso, jodo obejadea  
danao zécueneti báneti. Da jetitso  
dápodada eisheibo. Atso tópeasha. Dipa  
apetao, Tadicatapoa Abama ecuae:

--Midya dia a-atajai. Yama eaniohue  
poáni. Dipa batso ya midya dójoyoa mea.  
Midya-atacana dipa-odi pa-a. Da  
huócuatiyoa ya mé-ani. Tóhuai ócuahua mi  
pó-ani. Pe-aso netime cana pó-ani. Yama  
eaniohue midya eani batso daocua ya  
miqueda poi mé-ani --ea.

Ataibojo Abama, Isaca, eilóidetsenae  
cana hua lélebeneje póbeibo-ishá.



**TATA ISACAJA POI HUANE PAPOPOJO MAMA  
MEJETIPO BIYO**  
(Jénesi 23,24,25)

Apamo mala potso, Abamaja huane,  
mama Sala, mánoibo. 127 ócuahua malame  
dátsono anitso dia poíbo. Poibojo, Abamaja  
náedaja eiye ma-ai cuáebajaibo, jodo joda  
papaibo-ezae. Mama Sálaja meiyataibojo,  
huatodi Isacaja poi huane pamepopojo mama  
jaidyapo tejetibotsobalecata bati, Abama.  
Potso huada hua modometsepo tata ecuae:

--Tata Isacaja jidyo Canana eiyeo  
eanipo mamamo pijemima atsobale ya bani.  
Quima doémetsecanaja léleopo mama  
ajaimasha. Ema netisanapo Alanaleleo  
noatique. Jodopo nóejajapomi mejeticame,  
Isacaja huane poi. Tata Isacalipimo  
pidojoma aque. Huadamo dyohue paizoajata.  
Tadicatapoa joda jidyopo eiye bécata  
tíatani batso, joda jidyo Canana eiyeo  
pehue netitsobale --ea.

Atao, hua modometsepo tata,  
10 camelocananae, eatsahuai betanae,  
pójaena. Ai jaidyapo beta dójoibo, Isacaja  
huane pó-anipo mama patia-ezae. Apamo  
tseiñeme ajetso, eaponanitsio tata Abamaja  
doémetsecana nétipo léletsahuao cuáiñati.  
Jodopocanaja eohui tsehuati-odi pójojo  
nétijajo. Netijajotso, modometsepoa  
Tadicatapo ecuae: "Cuíchacatapo quia, ema  
mi atsahuatame, Isacaja poi huane  
patejetipojo. Behuehue dyopo nóejajapocana  
jidyo jólilineti, eohui patsehuajao-ezae.  
Yama pea cuae, pea cuae, pea cuae pa-a.  
Mipaiya pacuae: 'Eohui emami ma-ai titame,  
paizi-ezae.' Pásopomo tadi, Isacaja poípo  
mamaja dipa cuáetani meque: 'Ma, ojo  
izique. Miqueda camelocana poi dipahue  
eohui patsehua.' Dipa cuáetani meque,  
tadi, dipa cuáetanipo midya jaidya bánipo  
yama bamehue pa-apojo."

Joda dipa tadinae mimidoetetsio  
nimetsiacatapo mama eohui tsehuaja pobe .  
Mama Lebeca banime joda. Tataja cuipa  
pi-amahue joda. Huada eohui tsehuatao  
Abamaja modometsepo tataja joda mama  
ecuae:

--Eohui emami ma-ai titame,  
paizi-ezae.

Atao, mama Lebecaja ecuae:

--Ma, izique.

Huada izipetao, Lebecaja ecuae:

--Miqueda camelocana poi dipahue eohui  
patsehua --ea.



Atso, camelocana eizimepe.

Joda mamaja dipa eatani batso, joda Isacaja huánepoi jaídy Tadicatapoa bátani modometsepo tataja bamehue ea. Atso, huada ai jaídypocana joda etia. Iñebatahuepocana etia. Atso huada joda ecuae:

--Miqueda tadi tso aisé?

Mama Lebecaja ecuae:

--Quima tadi, tata Beto-éli.

Tata Nacoloa bácuuedea joda --ea.

Tata Abamaja doémétsecatapo dipa báni me bamehue modometsepo tataja. Potso huada mama Lebeca ecuae:

--Miqueda tádinajo cuama jatoa quepotso? --ea.

--Dipahue --ea.

Atao modometsepo Tadicataponae mímibo-ishá. Tadicatapoa eatsahuatani batso, Isacaja poípo mama shotejetime batso, "Dipa ajái Tadi" eibo.

Tádinae mimipetso, etaezo pona.

Pobeo, eshoi jabailiatitso, jodopocanaja jana etia.

Atao, Abamaja modometsepoa ecuae:  
--Ema jidyo ai-izae póbeanipo biyo  
eshoi cuaetsodada, didiatsobale.

Atso huada dábiyo cuaepe. Dipahue  
eohui tsehuatilelajai pójojo dia  
póshananipo biyo cuáepeibo. Dipa  
cuaepeibotso huada ecuae:

--Isacaja huane poi papoibopojo  
mama Lebeca donaibotso tso quejai?

Dipa apetao, mama Lebecaja tadi,  
tata Beto-éli, deapo, tata Labana,  
huatseada joda ecuae:

--Que náicata Tadicatapoa midya  
eilotani batame. Dipa batso cuámaja da  
nahueda batoa pipoma. Jodalipi  
donaibotsobale Isacaja huane poi --ea.

Huatseada dipa atao, Abamaja  
modometsepoa jaidyacatapo aicana Lebeca  
shipa tibo, iñebatahuepocana, jáibaicana.  
Deápo, huadi, dipahue, ai etia. Dipa eshoi  
apetsodada cana didia, do jásisa. Hueno  
anitsoaibotso, modometsepo tataja  
tata Beto-élicana ecuae:

--Cuama behuehue pojaenaibotso tso  
quejai micana bame?

Atao Lebecaja huadia déaponae joda  
ecuae:

--Jodalipi shipa 10 tseiñeme cuama  
najo poibotsobale. Dátsono poibojodada  
donaibotsobale --easahua.

Atao, --Ji behuehue cuama  
ponaibotsobalecata bátini --ea..

Atao, huadia deáponae mama Lebeca  
bícuaebaja:

--Behuehue ponaibotso tsozai cuipa?

Atao, Lebecaja:

--Dipahue ajái --ea.

Atso joda pójaichaibo. Joda  
pojaichapeibojo, camelocana biyo eanipetibo  
potso, pójaenatibo. Dipa mejetime atao,  
docuaiñatao, tata Isacaja joda mama Lebeca  
jémiqui. Jemiquitso bajaidya a-odi ea.

Beta malame poibotso, manoibojae  
cueneo, Abamaja huatodi Isaca hua aicana  
dáocuacuhue típeibo. Aibotso, joda  
mánoibo. 175 malame dátsono netitso,  
mánoibo. Hua todidetseahue, Isacaja  
Ima-élia detsea, huatadi pápaibo. Huane  
mama Sala pejohue-ishá pápaibo.

**TADICATAPOA TATA ISACA DATSIOTATSE  
TODI BETACATA ETIAPO BIYO  
(Jénesi 25)**

Tata Isaca, mama Lebeca dipa  
jajemiquime potso shipa 20 malame potso,  
bacuamahue bati. Dipa jabatitso, joda  
Tadicataponae mimi. Mama Lebecaja todi  
pa-ata ea. Ataohue mama Lebecaja todi  
bádeti, Tadicatapoa tsábajatani pojo. Dipa  
todi badetime pojo Tadicatapoa mama Lebeca  
ecuae:

--Betacata mique todi bade.  
Shoma-atame poi detse pó-ani. Tia  
jaidyaohue pó-anipo átacana pe-asocata poi  
masha pó-ani. Ehuio jaidyaohue pó-anipo  
átacanamo dácanaja eiloi poi pó-ani.

Tadicatapoa dipa atao, todidetse  
jehuapetso jaidyaohue poíbo. Ehuio  
jaidyaohue epopo todi iñaicueme epo. Joda  
Esa-ó báname ea. Tia jaidyaohue epopo  
Jacobo báname ea. Huatseda esi popetso,  
Esa-ómo eamipitiji poi pehue epo.  
Tata Jacobomo bácueneicana toabaiji poi

epo. Tádiamo todi Esa-ó jaidyamasha ba-odi ea, huada eami piti-odi batso. Huádiamo todi Jacobo jaidyamasha ba-odi ea.

**JACOBIA HUA DOEMETSE ESA-O AI SAPAMETSE  
DIPA CUAEBAJAIBOME EAPO BIYO**

(Jénesi 25)

*Datsio tatacanaja huada todi eabapo  
pehue cuíchacatapoi masha balelajai.  
Dipapojo huatadia, manoiobojae cueneo, joda  
todi páhualea apeibo-odi alelajai.  
Tadicátapoa dipa dojojaidya ame apo  
cuaepeibo-odi alelajai. Dipahue tadia joda  
todi hua aicana, hua-eiye pamodamasha  
tihuiquibo-odi alelajai datsio. Tiápo  
todicanamo betaemashalipi tibo-odi  
alelajai. Tadi manoiobotso joda eabapo  
todia huatadi tsíñetidyaibo-odi alelajai.*

*Datsio, náedaja dipa alelajaitsio,  
tseiñepeadao, Jacoboa ai sapa jaidyapo ea.  
Joda sapa apetaiquitsio hua doémetse Esa-ó  
eami tsatseiñesatso cuáñaibo.*

"Aidyijaecata" pocuaiñaibotso huada Jacobo ecuae:

--Te jodaquia sapa ma-ai.

Atao, Jacoboa ecuae:

--Midyaja emapo todí cuíchacata poi poíbo-ani ahuiquibojabale ya midya titame. Tadia, manoíbojae cueneo, midya páhualea e-ataiboanipo emapo dia e-ataibo-ani pojobale cuichi ya mi titame. Tadi manoíbojo yamapo tsíñeti-aibo-ani pojobale titame --ea.

Atao, tata Esa-ó ecuae:

--Becuichiji, ai pidyima potsomo mánoiboani ema. Manotsomo cuíchacatapo todia poípo patso pó-ani? Miqueda poi pósanimo. Náatso ema tique --ea.

Atao, Jacoboa da "ma" ea.

Jacoboa bale Tadicatapoa Abama cuetaisapocana dáehuecata poi, cuíchacatapoi bamehue a-odi ea.

Tata Esa-ómo joda cuíchacata poi bátani pi-amashodi.

**TADICATAPOA ISACA  
"YA MI BICUIZICATA POI EIBO-ANI"  
CUAEME EAPO BIYO  
(Jénesi 26)**

Tseiñepeadao Tadicatapoa Isaca ecuae:  
--Yama cuáenio pehue poque. Dyo  
Canana eiyeo pehue netique. Midya dipa  
pojobale ema midyanajo netitame. Yama mi  
eatsahuaiyoa mea, midya netijaidya  
papopojo. Dyopo eiye midya-atacana titame  
e-ani. Midya-ata-odipocana huócuatiyoa  
atame e-ani. Tóhuai ócuahua yáicana atame  
e-ani. Midya-ata-odipo peadanae eohua-idyada  
netipocana jaidyapoimasha pó-ani.  
Yama mique tadi, Abama, eshoi cuaeme  
alelajai batahue ya mi mea.

JACOBOA HUATADI HUADAPO CUENELOEBOPO BIYO  
(Jénesi 27)

Tata Isacaja, esicata poetibatsio,  
etoa tsicuitanaibotso, todi Esa-ó ecuae:

--Ema dyatsio esicata. Maesa poibojae  
jabatitso, jaeda páhualea meapelipibo.  
Eami mi tsánaticai bome todiquia, mipao hue  
padibo-ezae. Da eshoi díbotso páhualea  
meapelipibo --ea.

Tadia dia atao Esa-ó poti. Tadia  
Esa-ó dia eatanipo huadia mama Lebecaja  
tsábaja. "Dipasha e-ataibo-ani" atso,  
huada mamazao Jacobo ecuae:

--Midyapo cuíchiji tadia dia  
ataibomesahua po dipá. Midyapo joda  
tsifeti-aibotsobale. Náatso midya  
bácuene-anipo cábala betacata jetique, joda  
pajiña-ezae. Yama joda jiñapeo, miqueda  
tadi ti-anatique, midyapo páhualea  
pa-ataibo-ezae.

Atao Jacoboa huacuala ecuae:

--Ji emamo iñaicata pipoma pohue tso  
dia a. Tádiatsozai dia bamehue que-á a?  
..

Ema itsobatsomo, ema Jacobo bamehue ji a,  
pohue tso dipa. Tadicatapo quecuaedeati a,  
ema patsanetapojo?

Atao, huadia ecuae:

--Náatso pi-ama.



Atao, Jacoboa cábala betacata jetitso eishe. Atao, huadia da jíñaneti. Esa-ó jíñame alelajai batahue ea. Atso huada Esa-óhua jáibaimetse Jacobo jáibaimepasi, dáhuojocata papopojo. Atso cábala biqui pezo ebaiyo nalao eijisha, iñái pabatapojo. Tadia joda Esa-ó bame pa-atapojo, dia ea. Dipa atao, Jacobo eamijiñanae huatadi bene poná.



Peje potio tadi mimi:

--Aisetso?

Atao, Jacoboa:

--Esa-ó ema --noshi ea.

--Jacobo batahue tsabatame mi.

Pobeaque. Meitsoba --ea, tadia.

Atao, Jacobo pobe. Tadia hua mébaja  
mé-itsoba. Atso joda mimi:

--Mimiomo Jacobo tsabatame mi.

Itsobatsobale Esa-ó tsabatame --ea.

Potso, Esa-ó bame atso huada eamijiña edia. Atso, huada Jacobo dipa cuaeme ea:

--Tódiquia, Tadicatapoa midya eatsahuaiyoa alipitsobale mi, midya jaidya netime papopojo. Midya-atacana dipahue. Nai ma-ai Tadicatapoa oloeme-odi atsobale, miqueda pónetipocana poi jodacana abeise papopojo. Tadicatapoa midya doneti-anipo eiyeccana, eohua dipahue, jaidya mé-atani atsobale. Tadicatapoa midya netimetse pojaidyapo poi metsobale.



Mique doémetsecana, atapeapocana dipahue, midyá cuichao neti potsobale. Mique eiloipoi potsobale. Midyamasabaiji pó-anipocana Tadicatapoа jodacana bíanaibo-odi eatani atsobale. Midya tsiba aiji pó-anipocana bale Tadicatapoа eatsahuataiyoа atsobale.

Dipa huatadia Jacobo páhualea apeibome ea. Tadia dipa apetaibojo Jacobo hua etaebeneje póbeibo. Dipa doémetsea eapetanitsio, Esa-ó bedada cuáiñaito. Jodabisha tadinajo cuáiñaito, ecuae:

--Ohue tádilipi eami --ea.

Atao, tadia --Jai. Aisetso? --ea.

Esa-ó ecuae:

--Esa-ó ema. Bedada cuáiñaito.

Atao, Tadia ecuae:

--Midya bedada potsomo, aiyajatsozai ema eshoi dia eashaotani? Aisepohue tso yama páhualea ea-oboani? Jacobopoe sha ya dia eashaoboani.

Potso, joda shícata bati, mósojozei pocuemé epo. Tadia dipa atao, Esa-ó sa mícata epo. Dipa ponae huatadi ecuae:

--Ema dipahue-ishá aiboque --ea.

Tadia ecuae:

--Ema miqueda mamazaohua sipatao tso  
ya daemo dia asaiqui.

Atao, Esa-ó tsipa ponae mimi:

--Quima mamazaoshilia quimapoipo tso  
jemi-otaiquiba.

**JACOBO LOBOTIBOPÓ BIYO**  
(Jénesi 27,28)

Potso, hua doémetse dódacueme  
bátsaneibo. Potso huada dipa nímeba: "Ai  
atsonolimi potso daquia tadi mánoibo. Joda  
manoíbojo ya mamazao paishe-anaibo mae"  
nime tsiba ea. Joda dipa aibojae  
tsabajatso hua huadia Jacobo ecuae:

--Esa-óhua mi eisheanátaibo-ani.  
Tsami ea-oataibo-ani. Jalobotibotsobale  
mi. Opiacata, quima nólipi, tata Labana  
najo jalobojaxotitsobale --ea.

Atso huadia tadi ecuae:

--Todi Jacobo jidyo Canana eiyeo  
eanipo mama jemitaomo ema shipa ani-ejejae  
pipoma pó-ani.

Dipa atao, tadia Jacobo ecuae:

--Jidyo eanipo mamamo pijemiquima atsobale mi. Huadía nólipi tata Labana bánatique. Jodo huada bácuepona peada jemique.

Ataohue, Jacobo poti, tata Labanajao papojajobo-ezae.

**JACOBOA DIPA JETEO TAHUIO BASISAPO BIYO**  
(Jénesi 28)

Dipa potime potso, ajetseiñetso, jéteohue eaponati. Jodo jeteo jahuanaiquibatsio shataca pataibaoda pómepo tahuio báneti. Eohuao potsanetso Tadicatapoа leleo cuátaneti shataca eba. Da shataca cuichae Tadicatapoа eiloicana jépemo huapobotea, jépemo huapotsoa. Dipa póneti eba. Tadicatapo eohuao dápejo neti eba. Tsio Tadicatapoа joda dipa cuaeme ea: "Ema cuichacatapo. Mique babashodi Abama, mique tadi Isaca, huatseada jaidya ebapo ema dipa. Ya midya bócueyoa.



Queapoticataja midya pojo ya midya péyoyoa.  
Jomo midya po-anatio yama midya dyáhuapoe  
dóbeibo-ishá. Ojo Canana eiye da-a-áihue  
yama midya-atacana tíbo-ani bécata.  
Jodacana huócuatiyoa mea. Jodacana  
peadanae eohua-idyada nétipocana  
jaidyapoimasha pó-ani" ea.

Dipa tahuio bapetso, dipa pó-izetibo:  
"Jibaque. Emapehue jidyo jabatime sha ema  
posaiqui. Bime sha Tadicatapo dyo bani.  
Jidyo sha huada etáe batahue" epo. Potso  
huada Tadicatapo ecuae:

--Quenaicata ema poaniohue midya  
eabaleneti ajaobale, ema midyahuapo da  
poetibahue po. Dipahue yama midya quima ai  
beta ti-odi pa-a --ea.

Atso huada joda lele "Betele lele"  
jejeme ea, Tadicatapotae batahue batso.

**JACOBO HUANE PAJEMI-EZAE MODOPO BIYO**  
(Jénesi 29-31)

Dipa jodo posisatso, hueno Jacobo déati-ishá. Tseiñebeta potso bedada huahuadia no, tata Labananajo cuáiñati. Jodacana najo cuaiñatitso, Labanaja bácuepona betacata meme eani tsábacuaiñati. Eabetsotapo, mama Lea báname. Tiápomo mama Laquela. Jodá bale jaidya batame eba. Jodo badí peada bepoatsio huada tata Labana ecuae:

--Ema miqueda poi 7 malame jidyo modotsso tsoquejai, miqueda anodi Laquela pacuaebaja-ezae --ea.

--Ja, ji dipahue ajaepihue --Labanaja ecuae.

Atao, Jacobo módotsane. 7 malame tata Labanaja poi mémodo. Dáocua malame modopetso, Jacoboa tata Labana ecuae:

--Pa. Máocuahue modome papo. Ema tique --ea.

Atao, aponao Labanaja hua bácuepona,  
mama Leápo, jodanajo dobea. Jodanae  
jasisatso, hueno, huenatio, mama Leápo  
bábiahuenati. --Dasha-- potso,  
jazaiquitso, huada Labana ecuae:

--Jápotso ema mi ti-isi aiqui?  
Mama Laquelapo pa jémi-ani jabatime poáni,  
ema 7 malame nomamodo po-osaja. Jápotsoi  
mama Leápo tishao-ohua? --ea.



Atao, Labanaja ecuae:

--Quetsio tiápo anodimo ehuio pitima cuámamo alelajai batso dia aiqui. Da dia asajapohue jemibojae potsomo, 7 malame modó-ejet sobale. Dipa ajái pojomo, peada semana potso bedada dáhuecata patibo --ea.

Labanaja dipa atao, Jacobo módotsane-ishá.

Peada semana potso joda bedada dia asatacatapohue jémiquibo. Jodá poi 7 malame modopeibo-ishatso, dya-ishá bácueneicana poi módo-eje.



Dipa jodo huanei popetso huada  
11 ócuahua bácuedeacana eimea.  
Tata Labananajo tsio dia epo. Mipacana  
bánime ea: tata Lobene peada, Sime-óno  
peada, Lebí peada, Jodá peada, Dani peada,  
Netalí peada, Cada peada, Aselo peada,  
Isacála peada, Sabolóno peada, José peada.  
Daocua eimea. Tiápo pehue, José pehue,  
mama Laquelaja huáepe. Jodo tsio dipahue  
huada bácueneicana apamo huócuapeti.  
Huacacana, obejacana, cábalacana, molacana,  
camelocana daocua dia'epo.

Dotsio Tadicatapoa Jacobo ecuae:  
--Mqueda tádinajo ponaiboque-ishá.

Pabocue ya mi --ea.

Tadicatapoa dipa atao, Jacobo  
pójaenaibo-ishá Canana eiybeneje.  
Huánedetsenae, tódicananae, bácueneicananae  
cana pójaenaibo.

Doémetse mépobeiboani tsabatso,  
doémetse esipoa tata Esa-óhua joda huana.  
Jeteo tsoti. Dyamo a-aba poíbo.

**JACOBO DYA-ISHA ISA-ELI BANIME EIBOPO  
BIYO  
(Jénesi 31-35)**

Dipa potso, Jacobo Betele leleo  
póshanaiboanitsio, Tadicatapoa joda ecuae:

--Midya ai sípaiji batso Jacobo báni me  
posalelajai mi. Dyá-ishá midya Isa-éli  
báni me poíbo-ani, midya behuehue emahuapo  
poíbo batso. Midya-atacana huócuatiyoa  
yama mé-ani. Pe-asocata poi yama mé-ani.  
Jidyopo eiye yama dácana patia. Yama  
miqueda babashodi Abama dipa cuaebetsotame  
aisa. Miqueda tadi, Isaca, dipahue-ishá  
cuáebome ashá. Batso, yama dia pa-a --ea.

Tadicatapoa dipa cuaeme atao, Jacobo  
huatadía lélebeneje déatibo-ishá. Dipa  
jéteohue poyoatsio mama Laquelamo todí  
jaidyaohue aibotsohue mánoibo. Da todilipi  
bale eizeneti. Bejamíno báni me ea, Jacoboa.  
Shipa poyoatso tadi Isaca najo cuáiñaibo.  
Dipa cuáiñaibome potso, huahuadi,  
mama Lebeca tso mánoibo tsábacuáiñaibo. Ai  
atsonolimi poibotso, tadi bisha mánoibo.  
180 malame netitso dia poíbo.  
Bácuedeadetseahue pápaibo.

**JOSEA TAHUIO DIPA EBAPÓ BIYO**  
(Jénesi 37)

Tsio, Jacobo, dyá-ishá Isa-éli báname  
poánaibo. Joda dipa poibotso, tseiñé  
peadao, huada huatodi José salesalepo  
jaibai jaidyapo etia. Joda abadacata  
balelajai batso dia ea. Tadia José bale  
abadacata bátani batso, doémetsecanaja José  
doda bátsane, másabatsane. Doémetsecanaja  
dipa atsanetao, sisá peadao Joséa ai tahuio  
báneti. Tadia, huadia ll ócuahua  
doémetsecanaja joda pa cuichame pó-ani  
bati. Potso huada hua doémetsecana dipa  
tahuio bajapocana cuáepeibo. Dipa cuaeme  
atao, dácanaja joda shipa dódacue bájaicha.  
Sisá peadao Joséa noahue-ishá tahuio ai  
bánetibo-ishá. Dipahue tadia, huadia,  
doémetsecanaja joda pa cuíchacatapo poi  
pó-ani bati. Dábiyo cuaepetao,  
doémetsecanaja joda shipa dódacue  
bájaichacataibo-ishá.



**HUA DOEMETSECANAJAHUE  
JOSE TILOBOHUIQUIBOPO BIYO  
(Jénesi 37)**

Tseiñé peadao, doémétsecanaja aocuepi  
obejacana cuiñatanitsio, tadia todí José  
ecuae:

--Miqueda doémétsecana bánatique,  
pátsocana dyatsio pojo --ea.



Atao, José poti. Hua doémetsecanaja  
joda póbeani baiquitso dipa cuaeti:

--Cuádaja joma ai tahuio ai bái-opo  
ishe-anaibotsobale.

Doémetse esipoa tata Lobene huada jepe  
ecuae:

--Pi-ishe-anaiboma atsobale. Jomo  
talale doedapojojo pehue lobiahuiquitsobale  
--ea.

Huada bécata joda ize pa-aloboibo-ezae  
dipa cuaeme ea. Dipa jacuaetitso, cánaja,  
José dyo netiñao, huajaibai salesalepo  
mehuiahuiquitso, joda talaleo lóbiahuiquibo.



Temasha díidianitsio, Ejito eiyebeneje  
pó-anipocana dae pó-ejeani cánaja eba.  
Naeda pó-ejeani batso doémetse peadaja,  
tata Jodaja jópecana ecuae:

--Dá-ecuada ashehue dia pi-a-atai  
aqui. Ojocana, Ejito eiyeo pó-anipocana  
tihuiquitame pohue dia a-o-eti. Diñelopoi  
amanetsio dia asha-o-eti.

Apetso cánaja joda tíhuiquibo, diñelo  
apamo poi. Jodacanaja bisha José dónaibo,  
shipa patidyeati-ishae-ezae, aiyaja eilóipoi  
papoibopojo. José dipa tihuiquibotso, hua  
doémetsecanaja cábala eishe, joda-ami metse  
Joséa salesalepo jaibai papepape-ezae.  
Dipa apetso, cánaja joda jaibai huatadinajo  
dona. Joda tinae dipa ecuae:

--Ojo jaibai jomo téjetini. Joselipia  
jaibai quepotso? --dipanoshi ea.

Atao, huatadi mimi:

--Ji huadahue. Tso dímeti.

Potso pátseiñe pátseiñe epo.



**EJITO MAMAJA JOSE  
MASAHUE MEPOTIA EASATANI EAPO BIYO**  
(Jénesi 37)

Tata José cuáebajashanai poa po tátacana Ejito eiyeo cuáiñatibo. Jodo dipa cuaiñatibojo cuíchacatapo Ejito tataja José cuáebaja, hua ai pamemodotapojo. Potipála bánamepoa dia ea. Atao, tata José huadapoi mémodotsane. Tadicatapoa eatsahuatani pojo, ai modojaídya eatani a-odi ea. Ajái



netime pehue. Tadicatapoa dipa mepoa  
eatani baibotso, tata Potipálaja José  
hua modometsepo tata poi ea, hua-etae,  
hua-aicana dáocuacuahue pamecuiñatapojo.  
Jodo, José dipa poánitsio tata Potipálaja  
huanea José alisolipi eba. Batso ecuae:

--Emanae mi jatame --ea.



Atao, Joséa ecuae:

--Sha bame. Pa ba masahue pome epocata di emamo. Miqueda eahuea metseada ai dáocuacuahue emacuichao apehuiquita, yama pamecuiñapojo. Midyanaehue dia pi-ama. Huada ema dáehuecatapoipo bátani. Yama midya dipa ajaomo, midyanae ja potsomo ya miqueda tata ané a, Tadicatapo danehue-ish a. Dia popo atsá --pehue ea.

Joda mamaja hueno dipahue-ish a, hueno dipahue-ish a-odi easahua. Tata Joséa "maesa" pehue cuaeeme a-odi ea. Tseiñé peadao joda Potipálaja etaezo nób-i-sha, pamodo-ishà-ezae. Jepe tsa-ai batso joda mamaja Joséa mashao iñanetitso, ecuae:

--Emanae jaquemoni --ea.

Atao, José, masha jabocati-anatso, jódodoshahuiñabo. Joda dipa pdyo, joda mamaja hua eahue dipanoshi ecuae:

--Baque tata Joséa jaibai. Huada ema bajae potso tsácata bani: Ema tsítsiajao, joda jódodoibanoani bani --noshi ea.

Atao, tata Potipálaja, jazaiquitso, José ijitaezo eishaibo.



**JOSE IJITAEZOTSIO EPOPO BIYO**  
(Jénesi 39-41)

sé ijitaezo eanitsio Tadicatapoa  
eatsahuatani ea. Dipa batso ijitae  
a ametsepo tataja José ajái eba.

Dipa batso huada joda masahuelipi pabamahue ea. Joda atsahuametse ea. Atao, Joséa jepe dohue-ishá ijitso eishapocana bajaidya a-odi ea. José dipa jodo poánitsio, ejitocanaja netimetsepoa hua ai módoijipodetse dóhue-ishá eishahuiqui, dádetse masahue ata batso. Huatseada betatseiñe jodo potso, ai tahuio báneti. Dipa tahuio bátanipo bea cuipa pó-anipo cuénecuaetani eba. Tata Joséa bale "dipa pó-anipo metse dipa baiqui" cuenecuaepeibome ea. Tadicatapoa dipa mepoa eatanio Joséa dipa ea. Tata Joséa dipa cuenecuaepeibome atahue detse poíbo. Peadamo netimetsepooi mémodo-ibo-ishá. Peadamo netimetsepoa eisheibohue ea.

Betacata mala potso netimetsepoa, Pala-óno jejemepoa, dipahue ai tahuio eba. 7 huaca ajehuajaipo notsa dítani eba. Tsio si-etehue-ishá lasacuemelipipo huaca cuáiñani eba. Dácanaja ajehuajaipocana jélotaitoibano eba. Da jelosatso bime dipahue lasalipihue pehue eba. Izetibotso,

"cuipa pó-ani pocuenetso dia bani?"  
pó-izetibo. Dipa jabatitso, huada  
nimejonoipocana, abahuepiapocana mipa  
bicuaebajame ea:

--Cuipa pó-anipo tso ya dia bani?

Aiyaja dipa bamehue atoa pipoma. Tsio  
netimetsepoa ai modoijipo tata ijitaetzotsio  
dia po-ashapo nímebaibo-ishá. Tata Joséa  
dipa cuáetani eápobiyo nímebaibo-ishá.  
Atso huada Pala-Óno tata José dia atashapo  
biyo ecuae. Atao, Pala-Ónoa tata José  
jétime.



Dipa jetitao, huada José ecuae:

--Midyàja bale aiyaja tahuio bamanepo  
tsabajatso cuaepetoa tsábani --ea.

Atao, Joséa ecuae:

--Yápehuemo dipa atoa pipoma.

Tadicatapoa dipa cuame eatanio bale dipa  
atoa --ea.

Atao, netimetsepoa huada dipa tahuio  
bataiquipo cuaeibo. Joda cuaepetaibojo,  
Joséa ecuae:

--Tadicatapoa midya dia ataiqui,  
bécata dia pó-anipocana bamehue pa-apojo.  
Joda 7 ajehuajaipo huacacanamo 7 mala  
jaidyapo pó-anipo cuénecuaetani. Joda 7  
lasalipipo huacacanamo 7 mala po-isipo  
cuénecuaetani. Eshoi 7 mala jaidyapomo.  
Da malaomo jana atsatadacueme pó-ani. Dipa  
potso 7 mala po-isipo pó-ani. Dátsiomo nai  
pi-oloma pojo jana pimoloma pó-ani.  
Tsédapocana mí-izae-odi pó-ani. Dipa  
pó-ani batso aisé bahuepidyapoicatapo  
tsatsobale, jana iséashamane pobiyo  
ilometsepo papoibopojo, lele  
misiohuaopocana "jana iseasha-odi aque"

cuaeme pa-atapojo. Cuada misiohua maesa  
pipopeiboma papopojo dia atsobale.

**TATA JOSE CUICHACATAPO TATA POI  
POIBOANI PO BIYO**  
(Jénesi 41)

Tadicatapoa José dipa mepotia eatani  
batso, Pala-ónoa José ecuae:

--Aiyaja tahuio ebapocana Tadicatapoa  
midya cuáetani batso midyapehue  
bahuepidyapoicatapo bani. Batso yama midya  
ema-atsahuai poi eiboani, ilometsepo poi  
eiboani.



Behuehue ejitocana dáocuacuahue  
midya eaniohue-odi pótsaneiboani --ea.

Dipa apetso, huada José ejito mama  
etia, huane pa-atapojo. Dipa apetao José  
jodo Ejito eiyeo lélecanao pobale-odi epo,  
dopo tatacana "jánacana iseashatsobale"  
cuaeme pa-a-ezae. Si-ete malame, jana  
apamo eanitsio dipa a-odi ea. Jodo dipa  
netimetsio todí betacata eimea. Peada  
Manasé, peada Epa-íño, báname detse ea.  
Joda 7 mala jaidyapomo popetso, naimo  
eolohueyaibo. Jana dipahue-ishá  
mólohueyaibo. Ejito eiyeo, huetsiohuepo  
eiyeccanao dipa-odi. Mí-izae-odi pehue  
ecuichacana epo datsio. Ejito eiyeo pehue  
jana eani-epo. Dipa batso, pe-ishapo eiyeo  
nétipocana jodo Ejito eiyeo jana  
cuaebajati-odi ea.

**TATA JOSEA DOEMETSECANAJA  
EJITO EIYEKO JANA CUAEBAJATI-ODI EAPO BIYO  
(Jénesi 42)**

Canana eiyeo, tata isa-élicana dipahue  
mí-izae-odi epo. Dipa jabatitso  
tata Isa-élia hua tódicana, ecuae:

--Ejito eiyeo bale jana eani tsábani.  
Pásopo micana jodo cuaebajaticame, aidyijae  
potso, pimanoma papo-ezae --ea.

Tiápo todi, tata Bejamínomo papomáhue  
ea. Mama Laquelaja eabapo todi,  
Joselipimo, tso mano bame. Laquelaja tia  
eibopolipi pehue, Bejamíno pehue eizeneti  
bame. Dipa bame atso, jodamo náhueba.  
Tadia dipa ilohuiquime atao da 10 pámoapo  
doémétsecana Ejito eiyebeneje poti.  
Cuaiñatitso, jana cuaebajametsepo tata  
bánati. Joda doémétse básani bime doémétse  
bamehue pi-ama ea. Tata Joséa bale joda  
10 ócuahua cana hua doémétsecana bamehue  
sho-ame ea. Doémétsecana bamehue bime  
huada dábiyo ai picuaema.

Dipapehue cuaeme ea:

--Aits? Ai izae tsoicana dyo  
póbeani?

Atao, dácanaja ecuae:

--Dyo jana pacuaebajao-ezae cuama  
póbeani.

Atao, Joséa ecuae:

--Naisha. Moa pababale-o pohue.

Dipanoshi atso, cuama bécata paisheibo-ezae  
dipa eanibime --pehue cuaeme ea.



Atao, hua doémetsecanaja ecuae:


--Dipasha bame. Cuama da tadime-odi.

Dose ócuahua pósahua. Tiacatapo tadinajo  
dohue neti. Peadamo tso maesa epo  
--cánaja ea.

Atao, Joséa ecuae:

--Micana dáehuecata cuaeme eani  
bamehue pa-a-ezae mipa pa-a. Micana peada  
jidyo ijitaezo pa-ishá. Micana jepe bale  
meponaiboque miqueda eiyeo. Jana  
medonaiboque. Dohue tadinajopo mamazao ema  
cuaeshaoboque-ishá. Micanaja ema  
dáehuecata cuaeme eani aibojodada  
ijitaezopo huetianameibo-ishá, jana dipahue  
shipa tibo pa-a.

Atso, huada tata Sime-óno jodo  
ijitaezo eishapasi. Jépecana bale hua-eiye  
bénéje eilohuiquibo, janacananae. Dácana  
beotsio jodacanaja jana poi titanipo diñelo  
huada ailobiji bólosameo mélobialobohuiquibo.



Jodacana hua leleo cuaiñatibo-ishatso,  
diñelo bólosomeo bade batso, queoli-epo.  
Noahue cuaebajatibo-ishatsio, ejitocanaja  
"Micanaja jana poi ai pitimashili"  
e-ataibo-ani posatso queoli-epo. Jana  
cuaebajametsepo tataja "tiacatapo doémetse  
ema cuaeshaoboque" atapo biyo tadi  
cuáecuaiñatibo. Atao, tadia ecuae:

--Bejamínolipi dáhuapoti atoa pipoma.  
Dipamo doémetse esipo José pó-ana.  
Sime-óno bisha dipahue-isha po-o-etiba.  
Batso jodalipi dáhuapoti atoa pipoma. Damo  
quia emanajo pehue netitsobale --ea.

**JOSEA HUA DOEMETSECANA PA-APOHUE EAPO BIYO**  
(Jénesi 43)

Dipa asasha bime jetiashapo jana  
jelotso, huada hua bácu deacana ecuae:

--Ejito eiyeo meno atiboque-ish.


Bejamínolipi da medojabalipique jodopo  
cuíchacatapoa jana patitapojo --ea.

Atao, tata Lobene, tata Jodá huatseada  
huatadi ecuae:

--Tseama mamazaolipi dojojaidya pa-a,  
biabajaidya pa-a --ea.

Potso, dácana poti. Ejito eiyeo  
tata Josenajo cuáiñati-ish. Tata Joséa  
hua mamazao Bejamíno baibotso dáocuacuahue  
hua-etaezo dó nobiape, dó-odi padidiapojo.  
Dipa eatani batso cana queoli-epo, huada  
dáocuacuahue hua-eiloi poi e-ataibo-ani  
bame posatso. Joda doémetse  
tilobohuiquisapo bamehue pi-amahue  
dácanajamo. Didiapetso, cánaja jana  
cuáebajaibo-ish. Noahue-isha Joséa  
dácanaja diñelo bólásacanameo  
lóbialobohuiquibo-ish. Hua ai-iziji  
jaidyapo Bejamínoa bólósameo lóbialoboibo.

Ataibojo, cana pójaenaibo-ishá. Ai  
aocuelimi dácana bepotibatsio tata Joséa  
peada tata eilohuiqui, dácana  
patejeticaibopojo. Huada dácana  
tejetibotso ecuae:



--Quétsoicana cuíchacatapoai ai-iziji  
ea-oni? Metsijíni sha?

Atao, dácana joda ecuae:

--Ji pitsijima. Cuámaja ai  
lóbijicanao tsaque. Joda ai-iziji  
tejetibotsomo huada tsijitaiquipo tata  
ishe-anaque. Cuama jépmemo cuíchacatapoai  
eilóipoi poíbo --cánaja ea.

Dipa ataocana, joda tataja Joséa  
ai-iziji tata Bejamíoa bólosomeo téjeti.  
Jodo joda téjeticaní batso jépecana "Te,  
jápotso dipacata" epo. Dohue baletitso,  
Josenajo póbeibo-ishá. José botseo  
sátaninia pójaiñáibo.

Pojo, Joséa ecuae:

--Jápotsoicana dipa a-o-eti? Dipa  
aiqui batso micanaja mamazao tiacatapo  
jidyo emanajo pehue pó-ani. Quima eilóipoi  
pó-ani. Micana jepe bale meponaiboque --ea.

Dipa cuetao hua doémetse tata Jodá  
mimi:

--Bejamínolipimo jidyohue pojo, cuama  
pehue tádinajo cuaiñatibojomo, tadi tsácata  
poíbo. Mosoneda bájaehue manoíbo. Emapo  
dyohue dia potso tsozai quejai, miqueta  
eilóipoi papo-ezae? Tadi da mosoneda  
bájaehue pimanoiboma papopojo,  
Bejamínolipimo jépenae paponaibopojo moa  
dia po.

**JOSEA DABIYO EIBOBATIPO BIYO**  
(Jénesi 45)

Dipa atao, tata José, jópehue shipa jaidya po apitsa jabatitso epa. Panae huada dácana ecuae:

--Emacuichiji tata José. Emahuesa dá-ishá. Micanaja ema diñelo poi tilobohuiqui-aisapohue ema. Dipa aisapo biyo cue-á pipoma mepoque. Dipa Tadicatapoa ema jidyo ilohuiquime ataisa, micanaja ema dyatsio jana cuaebajatoa pa-apojo. 5 malame shipa jana pimoloma pó-ani. Cuádaja tadi, micanaja huánecana, todicana micanaja jeticaibome, dáocuacuahue jidyo Ejito eiyeo panetibopojo. Jidyobale jana eani --ea.

Joséa dipa ahuiquitaibojo, cana noahue pónaibo-ishá. Tádinajo cuáiñatibo-ishá Canana eiyeo. Cuaiñatibotso cánaja tadi ecuae:

--Ji jomo Joselipi eizeneti cuama baja. Jodo netimetsepoa eatsahuaipoi tso epo baja --ea.

Todicanaja dipa cuaetao, tadia paja  
eatanicata pehue ea. Cuaejaidya apetaodada  
shamacana: "Náicata quia todi José  
eizeneti. Ya da huánaibo-ani" epo.

**TATA ISA-ELI HUATODICANANAE, HUA OTSECANANAE  
EJITO EIYEYO NETIDYEIBO PO BIYO**  
(Jénesi 46-50)

Pojo Tadicatapoa joda ecuae:  
--Ejito eiyebeneje ponaiboque.  
Miqueda todicananae, otsecananae, dia  
poque. Jodo midya-atacana apamo pó-ani.  
Dácana jahuocuatio yama dácana jidyo  
Canana eiyeo padobeibo-ish. Datsio ya  
joda eiye patibo --ea.

Atao, tata Isa-élícaná dáocuacuahue  
pójaenaibo. Ejito eiyeo cuaiñatitso  
tata Isa-élia huatodi José shamacana  
téjetibo. Joda banetibotso, ecuae:

--Midya baiquia jabatitso, dyamo ema  
jaidya jabatinæ manoíbotoa --epo.



Potso, joda huatodicananae,  
anodicananae, otsecananae Ejito ekiye  
máenajao neti. Cosene jejemepo ekiye do  
neti. Jodo netibotso, shipa 17 malame  
poibotso, esicata poibotso mánoibo.  
Manoíbojo hua bácu deacanaja Canana ekiye  
tadi pápanatibo, tata Abama, tata Isaca  
pejohue-ishá. Dipa tadi ánatibotso cana  
Ejito ekiye cuáiñáibo-ishá. Datsio  
doémetse esipocanaja José amojiji poi eba.  
"Dyatsio huada eishe-o-ataibo-ani cuada,  
cuádaja joda diñelo poi tihuiqui-isa  
batso" cana pósahua.

Dácana queolí poáni batso Joséa dácana  
ecuae:

--Ema mojidyapoi pibama meaque.  
Micanajamo masaecueme banae ema Ejito  
eiyebeneje tihuiqui-isa. Tadicatapoа bale  
yama jidyo tsédapocana ize eanipo  
cuénebatani ataisa --ea.

Atso, joda doémetsecananae jodo  
Ejito eiyeo shipa néti-eje. Tata Lobenè,  
tata Sime-óno, tata Lebí, tata Jodá,  
tata Dani, tata Netalí, tata Cada,  
tata Aselo, tata Isacála, tata Sabolóno,  
tata José, dáocuacana dia epo. Apamo  
malame po-ishatso tata José mánoibo.  
110 malame netitso mánoibo. Manoíbojae  
cueneo huada hua doémetsecana ecuae:

--Tadicatapoа micana eatsahuataiyoa  
bíabataiyoa e-ataibo-ani. Bécata huada  
micana-atacana Canana eiyeo  
dónaataibo-ani-isha. Datsio pónaiboanitsio  
aiyaja quima etsoacana donaibotsobale.  
Jodo Canana eiyeo da quima etsoa  
papajajobotsbale --ea.

**EJITOCANAJA ISA-ELICANA  
PI-IYO-IYO PEHUE EBAPO BIYO  
(Etsodo 1)**

Tata José, hua mamazaocananae manopeibojo, dácanaja shipa pódeatipocana bale jodo Ejito eiyeo shipa nétihueyahueya. Dá-atacana isa-éli-atacana batso, "Isa-élicana" jejeme eatsaneibo. Jodacana abeise-odi epo. Shohuocuapodatime. Shohuocuapodatime potso joda eiye mícuaepepoda. Dipa cana poáni batso Ejito netimetsepo pe-ishapo-isha mimi:

--Jidyo isa-élicana apamo pó-o-ani, amojiji pó-o-ani. Cuádaja pá-aso ánatsobale, dácaná pihuocuatima papopojo, cuada pi-ishema pa-atapojo. Cuádaja eiloi poi aibotsobale. Modo atsacatapo metsobale, sahuadoa-odi pa-atapojo --ea.



Atso huada dátsejonohue-ishapo cana  
apamo isa-élicana iloiji poi ea,  
isa-élicana modotsácata pametapojo. Joda  
ai-iloiji poipocanaja isa-élicana  
ishenaehuesahua, modoeme-odi ea. Teje  
modoeme-odi ea. Mezitae modoeme-odi ea.  
Dipa easatani bime isa-élicana shipa  
huócuatiyoa pehue. Dipa asaibotso Ejito  
netimetsepo zaiqui. Shamacana huada  
ejitohue-ishapocana ecuae:

--Isa-élicana déananacana jaidyaohue  
poániohue manojo jihuiqui-odi meaque,  
pamanopojo, da isa-élicana pihuocuatima  
papopojo mae. Pónananapocana bale  
pijihuiquima meaque --dyá-ishá ea.

Atao, netimetsepoea eataniohue  
ejitocanaja eatsane, déananacana  
jihuiqui-odi eatsane.

**TADICATAPOA EZOELIPI MOISE  
BIABA JAIDYA EAPO BIYO**  
(Etsodo 2)

Ejitocanaja isa-élicana dipa eatani dójojo, isa-élicanaja peadaja tatatsidi eimea. Jaidyacuemelipi batso huahuadia quimisha badime jodalipi etaezo loboshatso sosoaa-odi ea. Shipa lobo-eje apitsa batso



quimisha badime jodalipi etaezo loboshatso sosoaa-odi ea. Shipa lobo-eje apitsa batso moicuibatahuepo metse huada canahua tsidi batahue ea, dameo todilipi paishá-ezae.

Tadada batahuepo metse joda pépape, enao  
bézaja papopojo. Joda dipa apetso,  
todilipi dameo ishatso, manonacuecueo  
notsapolo dójojo eisha. Atso huadia anodi  
ecuae:

--Huéneti nólipi banétique, pácataja  
pó-ani --ea.

Atso, etaebeneje tsae poíbo. Dipa  
ataiquitsio, aponabeneje netimetsepoa  
bácuepona huada eatsahuai betanae  
panahuibo-ezae do pobeá. Tenabotetso,  
notsapolo dójojo, bea ai eja báneti.  
Batso huada eatsahuai peada ecuae:

--Jomatso ai dipa. Da huéneti  
bánatique.

Atao, joda mama pona. Da  
canahualipisahuapo jeti. Jetitso,  
netimetsepoa bácuepona botseo eisha. Atao,  
tsecuesilotso, eba. Todilipi páninia batso  
alidyaso cueme poáni eba.

Joda mama dipa eatani dójojo,  
todilipia pónapoa huabea.



{2}

--Aiyaja ojo sosoatsobalecata midya  
bátini pojomo, yama pacuae-anati --ea.

--Ja. Jetique --ea.

Atao, anodi tsae poíbo. Hua huadi  
jeti. Huadi pobeo, netimetsepoa bácueponaja  
ecuae:

--Ojolipi quima poi sosoajaidya  
ajajoboque. Midya dipa ajao ya mi diñelo  
patia --ea.

Atao, todilipia huadi joda hua-etaezo  
dónaibo-ishá. Joda bajaidya ea.



**JODA TODILIPÍ NETIMETSEPOA  
ETAEZO NETIPO BIYOPÓ  
(Etsodo 2)**

Todilipi sosohueyaibojo, hua huadia joda netimetsepoa bácuepona tí-anatibo.

Huadadada todilipi Moisé báname eibo.

Hua-apohue bataicata eadea. Ilojaidya a-odi ea. Tadicatapo biyo bale

pi-izedeamea. Dia eatani bime Moiséa hua huadia tadia Tadicatapo biyo cuuetanapocana pi-iboetama. Jópehue isa-éli tata jabatimehue.



**JODA MOISE MADI-ANA EIYELO BOTIBOPO BIYO**  
(Etsodo 2:11-22)

Esi popeibotso 40 malame tsonoa netitso  
Moisé doémetsecana bánatibojae bati.  
Potso poti. Módoani malisohue pipoma  
bácuaiñati doémetsecana. Tseiñé peadao  
Ejito tataja isa-éli tata cuísolitani eba.  
Dáhue-ishapo mamazao dia mé-atani batso,  
ai mi pócuaenio, huada joda ishei poánipo  
eishe-anaibo.

Ejito netimetsepoa Moisé dia atapo  
biyo tsabapeibotso, Moisé ishe-anaibojae  
ea. Dipa eatani jabatitso Moisé Madi-ána  
eiyeo lóbojajotibo. Jalobojajotibotso do  
huanei poíbo. Potso bácuepona méjeminipoa  
tádiapoi obejacana mécuiñajajobo.

**HUA MAMAZAOCANA PA-ATSAHUATAPOJO  
TADICATAPOA MOISE EJITO EIYEBENEJE  
EILOHUIQUIBOPO BIYO  
(Etsodo 3-4:20)**

Jodo Madi-ána eijkeo netijajobotso, cualeta (40) ócuahua malame bepoatsio, peada tseiñeo, Moisé Sina-í jejemepo eohuashocue péjeje poyoa, obejacananae. Jodae dipa póyoatsio, jobatadao acuilimi huámonetipo da otsonetiquitihue báneti Moiséa. "Jápotso ma eotsoneti" atso, huana.

Dipa eatanitsio, Tadicatapoa da otso midyojoeneti mimi:

--Emá pejohuecata pipoma poque. Dyo ema. Tadicatapo ema. Midyatsaja. pójaenatipocana, tata Abama, tata Isaca, tata Jacobo, dácanaja ema jaidyabai epopo emamo --ea.

Tadicatapo mimi tsabajatso, Moisé doe  
nétibote. Queoli poáni jabatitso acui  
eotsonetipo pibahuiquiboma-ishá. Poánio  
Tadicatapoa cuáeibo-ishá:

--Isa-élicana bale quia métsecata.  
Ejitocanaja dácana nedaiji eataneti ba-odi.  
Dácana pátaneti tsabaja-odi. Dipa batso  
pa ya dácana Canana eiyeo dobeibo pósani.  
Ya tata Abama tisanapo eiyeo panetibopojo.  
Dopo eiye bale jaidya. Huaja apamo neti.  
Bácuenei cuiñapoi ajái. Pojaichaiboque.  
Beo pa ya mi Ejito eiybeneje ilohuiqui  
pósani, midyadoecana micanaja poe eiyeo  
padonaibopojo --ea.

Atao, Moiséa ecuae:

--Bedipa pehue emamo. Yamamo ai  
cuaejao Ejito netimetsepo tata bedia "ja"  
potoa quepo --ea.

Atao, Tadicatapoa ecuae:

--Bale yamahue mi bócueyoani. Yama  
dipa eánio, pitsadamahue mi bá-aní --ea.



Atao, Moiséa ecuae:

--Mamazaocanaja ema "Aiyajatso mi eilohuiyajaotaiqui", ataomo, tocue ya cuipa cuaeme a?

Atao, Tadicatapoa joda ecuae:

--Mipa cuaemane: "Tadicatapoa, Abama, Isaca, Jacobo dácanaja jaidya ebapoa ema ilohuiyajaotaiqui" amane. Dipa atso dai jodacananae Ejito netimetsepo tata báнати, "mamazaocana donaibotoa quepotso" paba-ezae. Huada patái nahueda pome mi báани. Midya mamazaocana padonaibomahue mi e-atani. Yama ejitocana ai nedaijipocana apamo ajaodada, netimetsepoa "Jaa" e-atani.

Atao, Moiséa Tadicatapo ecuae:

--Quima mamazaocanaja ema "naisha" pehue ataomo, patso ya a?

Atao Tadicatapoa ecuae:

--Aitsozai mi da dojoa --ea.

--Obeja huoshoi acuiliji --ea.

--Da joda eohuao oloemepasique --ea, Tadicatapoa.



Atao, Moiséa da eoloeme. Atao da acuiliji bacuapoi poána. Pojo, Moisé ebetena epo.

--Da sichao iñaquebai --ea  
Tadicatapoa.

Atao, jémítsoaibo-ishá. Acuipoi noahue poíbo-ishá. Pojo Tadicatapoa cuáeibo-ishá:

--Dya mé-atsa miqueda camisameo zoboacuaeque --ea.

Atao, Moiséa zóboacuae.  
Bocaibo-ishatso paja, jolá bati.  
Tadicatapoa noahue cuáeibo-ishá:

--Mé-atsa zobra acuaeiboque-ishá.

Atao, Moiséa mé-atsa zóboacuiaeibo-ishá.  
Dyá-ishá jáihue-ishá bati. Atao,  
Tadicatapoа ecuae:

--Jóbatae dai ea. Midyaja jo  
batahuepo boanaijipo ajao, mamazaocanaja  
dipahue "naisha" pehue a-odi ataomo, mipa  
aque. Manona ma-ai tsehuatso, eohuao  
zoyahuiquimane. Midya dipa ajao, joda ena  
yama amipoi pa-a. Dipa batso dácanaja  
"náicata Tadicatapoа midya  
ilohuiyajaotaiqui" pa-ata --ea.

Atao, Moiséa Tadicatapo ecuae:  
--Yamamo bedia quemimitsoa a.  
Aise-asopo ilohuiquitsobale.

Atao, Tadicatapoа ecuae:  
--Miqueda doémetse esipoa tata Alonsoa  
dia pa-ata. Huadamoа níbataisimahue.  
Huada midya pabocueta. Yama midya  
cuáepe-anipo, joda cuaedeaque, shipa  
pacuaedeatapojo. Ejitobeneje poánitsio  
jeteo bepotiatsio miqueda doémetse  
tata Alonsoa mi tsójao-ataibo-ani --ea.

Ataohue, Moisé huánenae, bácuadetsenae  
Ejito eiybeneje poti.

**MOISE EJITO EIYE NOAHUE CUAIÑAIBO-ISHA  
ISA-ELIHUE-ISHAPOCANA PAJEBO-EZAE POBIYO**  
(Etsodo 4-6)

Jeteo bepotiatsio doémetse tata Alono tsópahuaneti. Tsopahuanetitsohue joda Tadicatapo cuagetapo cuaepe. Dipa cuaepe éjitobeneje cana deati. Jodo cuaiñatibotsohue, tata Alonoa eshoi cuíchacatapo isa-élihue-ishapocana Tadicatapo Moisé cuagetapocana cuáeneti. Tadicatapo dácana dónaataibo-ani po biyo cuáeneti. Dipa cuaepe "Tadicatapo mipa eatani" baja ea. Atso Moiséa obeja huoshoi eoloeme. Atao, joda bacuapoi poána-isha. Mé-atsa camisameo zóboa-isha. Huada méatsa paja jolá pócuaebo-isha. Moiséa dipa atao dóhuepo mamazaocanaja huatseada cuáetanipo dáehuecata eba. Tadicatapo huatseda ilohuiyajaotaiqui bamehue anae jaidya bat. Potso Tadicatapo "jalipiquia" cánaja ea, huada ize e-atani tsábani batso. Dipa eshoi atso tata Moisé, tata Alononae Ejito netimetsepo tata huana.

Jodabisha cuáesahua:

--Tadicatapoa tsema cuáehuiyajaotani.

Cuama dáocuacuahue shoma-eiyeme pójojo


"menoatiboque" pa mi e-ani Tadicatapo baja,  
cuama jodo danae pamimipojo pa --eajajosa.

Atao, netimetsepoa huatseda ecuae:

--Ai satso dipa, Tadicatapo. Da  
pitsababama quimamo. Huada eataniohue  
potoa pipoma emamo. Micanahue olidya  
jabatitso tso náicana dia pojae --pehue  
ea.



Atso huada isa-élicana modoeme  
jaichacatabishapo pehue ea. Dipa eatani  
batso, isa-élihue-ishapocanaja Moisé  
ecuae:



--Dia pa-atapojo métsea dipa cuaeme  
a-ohua --ea.

Atao, Moiséa Tadicatapo ecuae:

--Jique pehue. Cuipa pa-atapodahue  
tso ema mi jidyo eilohuiyajaoni?  
Ejitocanaja shipa adea adea abishapo  
pehue.

Atao, Tadicatapoecuae:

--Bale Cuichamecatapo emamo.

Ejitocanaja micana nedaiji eatanipo ya dia  
bamehue. Tsí-izoa meaque. Dáehuecata ya  
micana dónaibo-ani. Canana eiye ya micana  
tíbo-ani beo. Ya Abama, Isaca, Jacobo  
cuenequaesahue eibo-ani. Eshoibale yama  
joda ejitocana pabatimehuiquibo, ema bale  
cuichamecatapo bamehue pa-atapojo --ea.

**TADICATAPOA EJITOCANA DIA EMEPO**  
(Etsodo 7-10)

Tadicatapoа dipa cuetao, Moiséa,  
Alononae Ejito netimetsepo noahue-ishá  
bánatibo-ishá. Huatseada joda  
cuáejajo-ishá:

--Isa-élicana dáocuacuahue  
"meponaiboque" pehue pa mi eani Tadicatapoа  
eatani --eajajobo-ishá.

Atao, netimetsepoa ecuae:

--Tadicatapoа metseda dipa mepoa  
eatani potsomo, ai pásopo meaque dia poani,  
yama dipa bamehue pa-apojo --ea.



Atao, Alonoa obeja huoshoi acuiliji eohuao eoloeme, netimetsepo botseo. Atao joda bacuapoi poana. Atao netimetsepoa huada bedipa poípocana jéjeiqui. Pobeatso, dácanaja, di-ábolo metse cueme jabatitso Alonoa eatani-ishá batahue ea. Acuiliji jihuiquitao bacuapoi poána. Atao Alonoa bacuapoi eatanipoa ejitocanaja bacuapoi eatanipo méjelope. Dipa bani bime, netimetsepoa "Jaa, meponaiboque" ajae pi-ama. Dipa batso Tadicatapoa Moisé ecuae:

--Joda netimetsepo atsanetaisi.  
Hueno-ishá joda huanaque, manojo  
nóatinitsio dyá-ishá. Huada  
shámatanetitsio, miqueda obeja huoshoi  
acuilijimetsé manona cuisolique, da manona  
amipoi papoibopojo, netimetsepoa emapehue  
pe-asocata jique náicata pabatapojo.

Atao, hueno, Tadicatapoa atahue,  
Moiséa ea. Manona cuisolitao ami-odi  
poibo, mancbaohua. Jáecana mánope.

Manonanaehue eihuipe. Netimetsepoa, dipa básani bime bebani pehue ea. Isa-élicana anahue. Dipa asa-ishatso 7 tseiñeme potso Tadicatapoa dia poque eatanio tata Alonoa obeja huoshoi dotsoa. Atao, huahuacana Ejito eiyeo atsacata poibo. Atao, netimetsepoa bedipa poipoa huada dipahue-ishacata ea. Atao, huahua-odi potibome epo. Etaemeje, ejaiye, janabiyae atsacata epo. Beta tseiñe potso, netimetsepoa Moisé Alono detse jejeiquitso ecuae:



--Miqueda Tadicatapo cuaeque, huada  
huahuacana padonapetaibopojo. Dipa  
ataibojobale micana, isa-élipocana,  
"meponaiboque" ya atame --noshi ea.

Dipa asatao, huatseada Tadicataponae  
mimi, huada huahuacana maesa pa-atapojo.  
Atao, huahuacana mánopeibo. Dácaña mánope  
baibotso netimetsepoa dyá-ishá isa-élicana  
paponaibomahue ea.

Tseiñé peadao, Tadicatapoa dipa aque  
atao tata Alonoa obeja huoshoi  
acuiliijimetse eohua ahuotsapo cuísoli.  
Atao pejiji batahuepocana poi pope. Atao,  
joda pejijicana Ejito tatacana cuichao  
eanipeti. Bácueneicana cuichao dipahue.  
Pojo netimetsepoa bedipa poipoa tsipea pa-a  
easahua. Damo apitsa eba. Netimetsepo  
dipadi asadi batso Tadicatapoa huelehuelei  
batahuepocana dyá-ishá eilohuiyajao, Ejito  
eiyeo pehue. Isa-élicana nétipojojomo  
tsa-ai bi dipa. Dipa atso, Tadicatapoa  
ejitocanaja bácueneicana mémanoemepeibo.  
Isa-élicanaja bácueneicanamo jaihue bi  
dipa.

Peada tseiñeо-ishha Tadicatapoa Moisé  
Alono cuáebo-ishha:

--Ememetse timo beta medojotso  
baepabeneje zazahuiquique --ea.

Huatseada dipa atao, ejitocana cuichao  
neda-opo shadicana eanipe. Netimetsepoa  
bedipa poípocana cuichao dipahue eanipe.

Peada tseiñeо-ishha netimetsepo ai ja  
dia easani di poani batso Tadicatapoa  
naibime tsohuajáipo eoloeme. Dámétse  
zéibadeo pójapo tsédapocana, bácueneicana  
eishepe. Pónetipo janacana laepe.



Acuicana shápajape. Isa-élicana nétipojojo bale jaihue bidipa.

Quétsio-isha, Tadicatapoа dólopotsai batahuepocana eilo, pónetipo janamolocana pajelojaichatapojo.

Quétsio-isha Tadicatapoа Moisé cuáeibo-isha:

--Mqueda eme báepabeneje iloaque, Ejito eíyeo apoda-odi papoibopojo --ea.

Moiséa dia atao, tseiñé quimisha patai apoda pome-odi pó-anati. Aisé zéibadeo pojatoa pipoma. Netimetsepoa "Jóbatahue ahueyaibojodada ponaibomane pa-a" noshi eibo-isha. Tađicatapoа tseiñecana dyá-isha maeda asataibojo bime, netimetsepoa "Jaa, da meponaiboque" ajae pi-ama.

--Ema mebashao-obomae-isha --pehue ea--. Ema bashaobo-isha atsomo becuichi ya metse eisheanaibo-ani mae --pehue ea.

Atao, Moiséa netimetsepo dipa cuaeme ea:

--Dipacuichiji. Pibashaoboma-isha e-animo --ea.

**EJITOCANAJA EIMEABETSOTAPO TODICANA  
MEMANOEMEPEIBOPO BIYO  
(Etsodo 11,12)**

Tsio Tadicatapoa Moisé cuáebo-ishá:  
--Ejitocana neda aibo peadaecata pa-a.  
Yama dipa aibojodada, netimetsepo micana  
ponaibotsobalecata bátini pó-ani.  
Sisadoeteocata ema Ejito eiye biyae  
papobaletibo. Ema dia poani dójojo  
ejitocanaja todi eimeabetsotapocana  
pamanopeibo. Bácueneicanaja  
eabetsotapocana dipahue pamanopeibo.  
Micana bale, aisé pimanoma papo-ezae mipa  
meaque. Aponajaetsio micana pamilia  
misiohua obeja beisedapo peadahue  
meishemane. Da amimetse etae tsecueanai  
péjeje mepepamane. Dipa atso emimo  
lalepetso medibomane. Sahuana laba  
apodaibotso metse metemiboque.



Pojaichaibonae dia potsobale,, da sisaohue jidyo pójaenaibo-ani batso. Temasha sisadoeteo yama ejitocanaja eimeabetsotapo todicana eishebalepeibo-ani. Jodae póbäletiboanitsio etae tsecueanai cuichae ami baibotso, joda etaemo pidya ba-ejeannahue da ya e-ani --ea Tadicatapo.

Atso, sisadoeteo Tadicatapoa cuáetanihue eape. Amimetse pipepamapo etaezo ejapo huaepebetsotapo todicanamo mánoemepeibo. Netimetsepoa eabetsotapo todi dipahue. Bácuedea manopeibojo, ejitocana dáocuacuahue páneti-anapeibo. Dipa ashasaídada, dásisao, netimetsepo Moisé Alonodetse jejeiquitso ecuae:

--Aisicata micana potso da meponaiboque náatso --ea--. Micana ata-odi meponaiboque. Bácuenecana naehue dia mepoque. Micanaja jaidya báshaponae quia poi memimique dia poani --ea.



**ISA-ELICANA EJITO EIYE O POJAENAIBOPO BIYO**  
(Etsodo 12,13)

Netimetsepoa "meponaiboque" atao,  
isa-élicanaja ejitocanaja aicana  
cuáebabaleibo. Jaibai, iñe, peamá metse  
eapo jaidyapocana cuáebabaleibo.  
Tadicatapo dia meaque atao dia ea. Dipa  
aibotso isa-élicana ai apamomasha nae  
pójaenapeibo. Sesi-éto mili (600,000) pamoa  
tatacana poyoa. Hua mamacananae  
todicananae poyoa. Jodacana dipa  
pojaenaibojo, Tadicatapo ehuio poyoa da  
boanaiji papopojo. Tseiñeomo mózizibadepo  
midyohue ehuio poyoa. Sisaemo cuati otso  
batahuepo midyohue ehuio poyoa epo.



**ISA-ÉLICANA TSEIÑENA ANASELEPO  
PETOANAIPOPO BIYO  
(Etsodo 14)**

Isa-élicana dipa Ejito eiyeo  
pojaenaibomepojo, Ejito netimetsepo mimi:

--Jápotsoa cuádaja dácana  
"meponaiboque" a-ohua. Dyamo aisé ba  
eilocata bata pó-ani.

Potso netimetsepoa apamo ai-isheipo  
cananae, cabayocananae isa-élicana  
huájododoanaibo. Isa-élicana tseiñena  
anaselepo maezo bepotíbatsio, cuádebadetibo.

Ejito ai-ishéipocanaja cuadeticaiqui  
banetitso, isa-élicana pa ba épocata  
básati, tseiñena petoibo apitsa bame atso.

Potso cánaja doémetse Moisé ecuae:

--Ejito-ocana atsacata shopi  
po-otitiba. Cuada eishepeshao-ataibo-ani  
beo. Cuada dohue huada eilóipoi pehue  
pojaepi po-ohua --ea.



Atao, Moiséa ecuae:

--Pa ba epocata pipoma mepoque.

Tadicatapoa cuada ize e-atanimo. Huada  
mácaná bíanataibo-ani. Tsíjojiqui  
mepoque --ea.

Atso, Tadicatapoa dia poque eatanio,  
huada hua ebai tseiñena biye eiloa. Atao,  
Tadicatapoa beni jojidyapo eilo, tseiñenana  
matsi-i dizi-idyada patiomepasitapojo.

Tseiñena dóeteje pehue azaja huada eme.

Atao, jodae isa-élicana pétoanapetibo.

Dácana dipa poáni baibotso, ejitocanaja tia  
eanasa, Tadicatapoa dia eatanipo dizia.

Dácana tseiñena doeteo bepotiatsio,

Tadicatapoa tseiñena dilo eibo-ishá. Atao  
cuádeipocana huídyimeibo, enaja dipebishapo  
pehue ea. Tadicatapoa dipa eatani  
jabatitso isa-élicanaja joda shipa  
jaidyacata bájaicha. Tata Moisenae dia  
apai.





**TADICATAPOA HUALELEJENETI AI DIA ETIAPO BIYO**  
**(Etsodo 16)**

Jodo tseiñena petoanaibotso  
isa-élicana eatsi po-isi poe deati. Beta  
tseiñe potso, jodo jana, eami tsa-ai batso  
cánaja doémetsedetse, Moisé, Alononae,  
doda eba.

--Te, ejitojohuesahua eami, jana eani  
bashodilelajai epo. Cuama jidyo potso, ai  
dihueyaibotso, pamanopeibopojo metsea  
dobeahuetiba jidyo --cánaja detse ea.

Dácanaja dia atao Tadicatapoa Moisé  
ecuae: -

--Aponajaetsio yama jonoto aiyoapo  
bonicana apamo pa-ilo micanaja joda

padiapojo. Hueno sisaehuemo quia  
lélejeneti báepajeneti yama  
cuahueatsicahuae batahuepo pa-ilohuiyajao.  
Hueno dipa atsanetso, janahuaibolelajaipo  
tseiñeo pehue pi-oloemema pa-a. Hueno  
janahuaibolelajaipo tseiñe pó-ani tsiomo,  
temasha dí-anipo, hueno dí-anipo dipahue  
meshodoque. Jepe tseiñecanao bale da  
tseiñehue jélopodanipo pehue  
meshodoque --ea.



Atao, eaponanitsio, apamo jonoto  
batahuepo bonicana náedaja tahuilele  
ánatatsio eolope. Sisaemo huada  
cuahueatsicahuae batahuepo eohuao  
eoloeme. Atao isa-élicanaja hueno sisaehue  
eohuao máiyaneti bíbiahuenati. Joda  
baibotso cana dipa cuaseti:

--Jotso ai dipa?

Atao, Moiséa ecuae:

--Tadicatapoa hualelejeneti  
ilohuiyajaotaiquipo janacuichiji. Da  
tseiñehue jélopodanipo pehue meshodoque.  
Huenó poipomo pi-iséashama meaque --ea.

Atao, cánaja shodo. Betajamo hueno  
di-anipo eiseashasaibo. Hueno joda eihui  
eba. Tsojoi bíhuenati eba.

Janahuaibolelajaipo tseiñepoi  
iseashataibojo-ishaomo jaihue bi dipa eba.  
Joda jana isa-élicanaja "maná" jejeme ea.



**TADICATAPOA EOHUI MAJANA JALIDYAPO  
MIDYOJOENETI EMEPO BIYO**  
(Etsodo 17)

Beta tseiñe potso isa-élicana  
déatibo-isha Canana eiyebeneje. Dipa  
jadeatibome po-ishatso dyá-isha jaiziquiae  
epo, sada tsa-ai pojo. Potso, joda doda  
banae cánaja Moisé ecuae:

--Sáeshilitaicana. Náatso cuama eohui  
metiamasamasaque. Jaiziquiecatamoni cuama.  
Todicananae bácuenaicananae máno-ani.

Atao, Moiséa ecuae:

--Japo tocue micana Tadicatapo  
pi-iyo-iyo bajae pehue másamasa. Huadamo  
ajái eatani bime micanajamo doda bajae di  
aiqui-ana. Atso, huada Tadicatapo ecuae:

--Pa ba eacata yama. Naeda ema  
isheanaibojae pehue.


Atao, Tadicatapoecuae:

--Tata esi betanae joma majana  
jálidyapo bánatique. Miqueda obeja huoshoi  
acuiliji metse da·cuisolique. Midya dipa  
ajaobale da midyojohueneti eohui  
eanicuaiña-ani --ea.

Tadicatapoa dia métanio Moiséa **majana**  
cuísoli. Atao, eohui eanicuaiña.  
Isa-élicana dáocuacuahue jodo  
eizishanapetibo, ma-ai momoshana ea.

**TADICATAPOA MIPA POQUE EAPO  
DI-E OCUAHUA CUAENAME EAPO MIPA**  
(Etsodo 19,20)

Ejito eiyeo pojaenaibotso, quimisha  
badime bepoa epo jodotsio Sina-í jejemepo  
ehuashocueo bádetibo. Jodo badetibotso,  
Moisé jodo ehuashocueo pótsati,  
Tadicataponae pamimitsoati-ezae.



Dipa potsoatio, Tadicatapoa joda ecuae:

--Micanaja yama a-odihue posha pojomo,  
quima métsecata pó-ani. Yama micana  
dojometsecata a. Micanaja bisha emacuaeji  
poi pó-ani, atapeapocana pacuae-ezae.

Hueno potseiñetso shípapojojo ema  
mózizibadepo mídyojoe jidyo panojo-ishá,  
micana ai pacuaeshao-ezae. Naeda  
cuaejajoboque, ema cuáiña-ani cueneo  
dáocuacuahue nahuipetso, jaibai  
ahuishipo canaja pajaibapeta. Dipa popetso  
dáocuacuahue jidyo eohuashocue tsajao  
papobeapecana, yama cuáe-anipo  
patsaba-ezae. Aisé jépemo eohuashocuembo  
pipotsoama potsobale. Joda cuatamo pi-ama  
atsobale, pimanoma papo-ezae --ea.

Atso, poboteibotso, Moiséa  
doémetsecana Tadicatapoa cuáetanipo  
cuáejaiñaibo. Dipa cuaetao cana mimi:

--Tadicatapoa eataniohue da ecuada po.

Potso, hueno potseiñetso shípapojojo,  
sisaehue, mózizibade a-apopoa eohuashocue  
bídyiloatani cánaja eba. Dádojojo  
salalacana, pópacana atsacata eba.

Eohuashocuemo jejajai eba. "Pa pó-obojáe beo" ponae queolicue cana pope. Dácana dipa poáni pohue Moiséa eohuashocue tíbojo dónapo, Tadicatapo patsabatapojo. Atao, Tadicatapoa cana ecuae:

--Ema Tadicatapo, micanamo ema metseme-odipo. Yamahue micana Ejito eiyeo dobeibapo ema.

--Emapehue beibéi poi mebaque. Pe-ishapo shama, pe-ishapo manoímahue bamepomo tsada pibama meaque --eaneti.

--Da iyoimesa papo-ezaemo ai imeadali ajaemo pi-ama. Eohuaopo ai-iñoacana tseiñenaopo ai-iñoacana, baepaopo ai-iñoacana mo ajae pi-ama. Ema-iñoa batahuepo dipahue pi-ama. Ai imeadali eapoa poi ai me-ajae pa eani pi-ama.

--Quia bani metse ai pimasabama meaque, ai eabapemo pi-ama. Quimapo bani metse "Ao", "calajo" batahuemo mimime pipoma potsobale.

--Dipahue janahuaibopo tseiñemisimo pimodoma. Datseiñéomo emanae pehue mimitsobale. 6 tseiñeme pehue emamo modoísa, ai eimeanitsio. Dipa apetso tseiñé peadao janahuaibo-ishá. Micana dipahue-ishá potsobale.

--Micanaxa tadi, huadi jaidya bani aque, micana yama tí-anipo eiyeo netisi papo-ezae.

--Aise-atacataja, doda batitso, ishe-anamo pi-ama.

--Tatacanamo, pónamasatiji pipoma poque. Miqueda huane huapo pehue poáni poque. Pe-ishapo ponanae pijama potsobale. Mamacanamo, déamasatiji pipoma. Miqueda eahue huapo pehue poáni poque. Pe-ishapo tatanae pijama.

--Ai tsíjiji pipoma potsobale.

--Náedabiyo dipanoshi cuaememo pi-ama.

--Jepea huánecana mejemijaemo **pi-ama**.  
Jepea aicana, etaecana, bácueneicana,  
janacana jemibishapo pehuemo me-ajaë  
pi-ama. --Mipa maocua cuaeme cana ea  
Tadicatapoa.

Huada dipa cuaeme eatani dójojo,  
eohuashocue cuichao jodo póneti batso,  
salalacana, pópacana atsacata batso, cana  
"Di-o" ponae queolicue epo. Potso **cánaja**  
Moisé ecuae:

--Midyapehue Tadicataponae **mimique**.  
Huada cuáetanipo cuama cuaedeaqué. Huadáe  
cuama mimitsoataomo cuama mánoibo-ami  
ja --ea.

Náedaja dipa atao Moiséa ecuae:

--Queolí pipoma mepoque. **Micamaja**  
joda iyoda pabapojo, micana asá **papopojo**,  
Tadicatapoa dia eatani --ea.

**ISA-ELICANA "TADICATAPOA EATANIOHUE  
DA ECUADA PO" POSAHUAPO BIYO**  
(Etsodo 20,23,24)

Moiséa dipa easatani bime eohuashocue shípamasha cana nétijajo. Naeda dia pojo Moisé eohuashocue cuichao pótsoaibo-ishá, mózizibadepo mídyojo nóbiquibo-ishá, Tadicatapo patsabaibo-ishá-ezae. Joda dia pojo, Tadicatapoa atsanetaisipocana, atsacatapocana mipa dai ea cuaeme ea:

--Aiyaja aisé, doda batso, isheanaibo ataomo, dipapoipo micanaja meisheanaiboque Aiyaja huatadi, huadi ishe-odi ataomo, dipapoipo meisheanaiboque. Tadi, huadi masababishapo pehue ataomo dipahue-ishá. Aiyaja pe-ishapo shamabale ai ti-odi eatani batsomo, dipapoipo meishe-anaiboque Dipahue yama micana Ejito eiyeo dobeibasha batso malamisi, málaso badio, tatacana dáocuacuajahue quima etaezo ema ai

titsobale. Dipahue, yama micana tñipo beta ema noahue tibo-ishatsobale. Jana shacua dijaetsio, eshoi ema beta titsobale.

Bécata zia jijopeibotso dipahue. Malamisi dipa meaque --ea.

Tadicatapoá dábatahuepocana cuaepeatao, Moisé poboteibotso, mamazaocana cuáedeapeibo. Atao, dácana:

--Jaa, Tadicatapoá cuáetaniohue daehue dá-ecuada po --pósahua.

Atao, Moiséa Tadicatapoá cuaetapocana zéhuipeibo, jodo tahuileleo. Dipa apetso tseiñé peadao huada majanacana ládatsoa. Atao tatacanaja huacadea ishetso, da tópeasha, tezijipehue papopojo. Tadicatapo jaidya bani batso dia ea. Dipa ataiquitsio Moiséa Tadicatapoá cuaetapocana, jilica cuichao zehuitapo naeda cuáepeibo-isha.

Atao jodacanaja noahue-isha mimi:

--Quenaicata daehue dá-ecuada po --pósahua.

**ISA-ELICANAJA TADICATAPO SHO-IBOETAME EAPO**  
(Etsodo 24-32)

Potso, Moisé, tata Josoénae  
ehuashocueo pótsoatibo-ishá, Tadicataponae  
pamimitsoatibo-ishá-ezae. Pojo Tadicatapoa  
cuáeibo-ishá:

--Micanaja mashataesahuapo aibotsobale  
do ema micanadojojo papoyoapojo. Jodo  
micanaja ema ai ti-odi pa-a-ezae, ema  
jaidya paba-ezae --ea--. Mashametse,  
huáenibiquimetse, peamametse meáque,  
taesaibotoa pa-a-ezae, dahue shipa dodeatoa  
pa-a-ezae. Epamo 14 métolo baohua meaque.  
Cuátsabenemo 5 métolo baohua meaque.  
Máhuabene dipahue-ishá 5 métolo bójohua  
meaque.

--Tata Alono, hua todicananae dameo  
modolelajai pó-ani, emamimitsoaiji pó-ani.  
Bihuenatimisi obejadea shácuacatapo  
ishe-odi pa-ata. Da-amimo quima etae  
tsécueopo dábiyo eami cuahuisha-odipo pele

biacuisosoa-odi pa-ata. Atso da pelebiyo emimo cuahuisha-odi pa-ata. Dipahue odecana eotsoaneti-odi pa-ata. Yapala madi batahuepo aihuimeponae otsoapai pa-ata.

--Aiyaja ai masahue ataomo, ema neda ataomo, tata Alonocanaja joda masahue eaijipoapoi ai-eami-aso mecuahuisha-odi pa-ata. Huada masahue eapo emanae jashabajatibo-isho papopojo dia pa-ata --ea Tadicatapoa.

Tata Moisé dipa cuaeme apetso, huada majana pezo betacata cuichao huada mipa poque atapo, di-é ócuahua cuaename atapo biyo zéhuipeibo. Dipa zehuipeibotso huada joda majana pezodetse Moisé tibo, isa-élicanaja joda dójotaiyoa pa-atapojo, paboanatapojo.



Tadicatapoa tata Moisé jodo dipa  
eatanetileleo, dóhuepocanaja Moisé  
aizoataeni eba. Izoasaibotso, cánaja  
Moiséa doémetse esipo, tata Alono, ecuae:

--Tata Moisé, cuada jidyo dobeaiji  
posajapo, bea-ai ajetanaticaiqui.  
Cuádajahue da iyoimesa papo-ezae midyahue  
ai ataesahua --ea.

Atao, Alonsoa ecuae:

--Micana jáibayoapo, iñe batahuepocana,  
peama pojaidyapometse eapo, medobeaque, ya  
dámetsé ai-iñoa pa-apojo. --ea.

Atao, cánaja dábatahuepo dóbeape.

Atao, Alonoa dámetsé huacazoe iñoa  
eimeasahua. Joda eimeapetao:

--Quélacua. Bemipápoa cuada  
dobeataibasha --jépecana eposhili.

Dácana dia pojo tata Alonoa ecuae:

--Hueno dá-ecuada dó-odi potso ai **dia**,  
ai izilimi. Dipa dá-ecuada Tadicatapo  
jaidya bame a --cana ea-oti.



Atao, hueno sisaehue cánaja obejacana,  
huacacana eishe. Emi jepe joda huacazoe  
iñoa poi atso cuáhuisha. Jépemo dia ea.  
Joda dipa dinae, ai izinae mamacananae  
peaja ja-acua-acuati, pea jazamozamoati  
cana eposhili. Mano potso cana dia **epo-o**.

Dácana dia poáni batso jodo  
ehuashocueo Tadicatapo Moisé ecuae:

--Náatso poboteiboque. Miqueda  
doémetsecanaja yama cuaesa-ashapocana  
sho-iboetame eatani. Huacazoe iñoa tso  
imeata. Dipa atso dáhuapo poáni,  
míhuatani. Tso cana jamasashilititiba  
--ea.

Dipa atao, Moisé Josoénae bóteibo.  
Tahuilele tsahuao bepoibao huacazoe-iñoa  
bamane neti bácuaiñaibo. Da batso Moisé  
záiqui-ana. Potso, Tadicatapoa tisatapo  
majana pezo detse huada eohuao  
tsábitsabiahuiquibo. Atso huaca-iñoa bisha  
cuépolopoloahuiquibo. Dipa atso, joda  
jijipoi atso, name. Dipa atso dánametsehue  
naeda eizime eizimepe-o. "Papapo micana  
dia a-ohua" anae dia ea. Dipa apetso huada  
doémetse Alono bícuabaja:

--Jápotsoi midyahuale dia a-ohua.  
Tadicatapo meiyaibotso, dábatahuepo bale  
jaidya bapo sáecueme. Tadicatapo nedacueme  
tso micana aja. Micanahue danehue-ishá tso  
jatia --doémetse cuaeme ea.

Atao, tata Alonoa ecuae:

--Náedaja masahue sho-amepo midya dia bamehue. "Ai-iñoa batahuepo midya atsobale, huada cuada padojotapojo" cánaja ema ata. Atso cánaja peama jaidyapo emanajo dobeapeta. Yama joda peama cuatichojo jihuiquo, huacazoe batahue poi poána baja --noshi cuaeme ea.

Atao, Moiséa Tadicatapo ecuae:

--Pásopojomo náedaja saecue atapo, jamasatiapo, tsiba pehue mi a. Tsiba pehue ajae pipoma potsomo emanaehue meiyaibopai aque. Quima bani miqueda jilicacuichao cuijihuiquiboque --ea.

Atao, Tadicatapoa ecuae:

--Masahue atapocanaja bani pehue pacuijibo. Ema neda atapocanaja bani pehue pacuijihuiquibo --ea.

Atso, huada masahue atapocana jepe mánoemeibo. Jépemo atsacata pehue eme.

Atao, Moisé eohuashocueo pótsoatibo-ishá.

Joda dia pojo Tadicatapoa noahue huada  
10 cuaename atapocana majana pezo detse  
cuichao zéhuibo-ishá. Dipa apetao, Moiséa  
majana pezo detsenae bóteibo-ishá.  
Abomaecata ponae cuáñiba, Tadicataponae  
jamimitsoati-odi pojo. Náedaja joda dipa  
baibotso, aiyo batso, dápejohuecata pojae  
pipoma. Dipa batso Moisé eshoi  
jabolobotitso Tadicatapoa ecuaepo cuáneti.  
Dipa potso jodo náedanajo tsiomo bólloboti.  
Tadicataponajomo pibolobotima.

**TADICATAPOA POI MASHATAE ME-APO BIYO**  
(Etsodo 35-39)

Quétsio-ishamo Moiséa mamazaocana  
ecuae:

--Behuehue cuádaja Tadicatapoa poi  
mashatae aibotsobale. Tadicatapoa ema  
cuaeme atashahue cuada me-a. Peama  
jaidyapo metse, masha pezo jaidyapo metse,  
huáenibiqui jaidyapo metse, acui jaidyapo  
metse, daocua ai jaidyapo metse-odi joda a.

Aiyaja dábatahuepo ai tibishapo pehue ajae  
jabatitsomo, jidyo huanasha-odi meaque --ea.

Atao ai dia ajaepocanaja dobea. Apamo  
tseiñe ai jaidyapocana huanasha-odi ea.

Jaipicata poeti batso Moiséa:

--Pa, maócuahue --ea.

Atao, bahuepidyapocanaja etaepoipocana  
da eatsane. Eshoi masha jaidyacatapo taza.  
Pezo peada dámetsé papene-ezae ea. Pezo  
peadamo, etaemedoeteje pataiji pa-a-ezae  
ea. Pezo peadamo, pacuatsapene-ezae ea.  
Joda apetso, emeipoi bisha apamotijipomasha  
taza. Da apetso biyae téliji poípo licui,  
huaenibiquicana metse. 58 ócuahua acuicana  
bisha ezeo, jetsitone, mahuatone cana poi.  
Atso, peama jaidyapo metse acuicana  
bíadonope. Da apetso, peamametse bisha do  
zecuezecuea pa-a-ezae pócana bisha ea.  
Daocua etaepoipocana apetso, etaemeo  
eisha-anipocana bisha eatsane. Ehuio  
cajapeáda ea, Tadicatapoа majanacuichao  
zehuitashapocana dameo paisha-ezae.  
Acuipezocana metse peama jaidyapo metse ea.

Joda cajabiyo panetia-ezae, Tadicatapoa leleo n t ipo eiloipo da batahue-ishapo i n oa betacata ea, peama jaidyapo metse. Tata bataesahua bime huisoiji ea.

Da apetso, mesa peada ea, d biyo laba isha-odi pa-a-ezae. Da apetso bisha odedadaijipocana ea. 7 dadamecana ea. Da apetso, mesa ma-ailipipo peada ea, d biyo yapala madi batahuepo aihiimepocana otsoa-odi pa-a-ezae. Da apetso etaesichojojopo poi bisha ea. D biyo eami pacuahuisha-ezae pelebatahuepo ea, jodo dipasa Tadicatapo ai ti-odi pa-a-ezae.



Mésopoi poípo peada, jodo modolelajai  
pó-anipocana dameo jamesopoti-odi papopojo.  
Joda apetso dámetsé etaesichoe  
pénebalele-anipo masha bisha taza.  
150 mételo baohua taza.


Da apetso, 50 pamoá peamatsacana bisha  
ea, dácuičhae masha pabadea-ezae. Da penei  
apetso, cánaja jaibai bisha ea,  
Tadicatapaezo modo-odi pó-anipocanaja  
pajaibatapojo. Dababahuepo jaidyacuemepo  
ea. Da tiacata eibo. Dipa apetao, Moiséa  
daocua joda aicana bape.. Tadicatapoa  
cuaetashahuecata cánaja ataiqui eba. A  
ajái ataiqui eba. Tsio Tadicatapoa joda  
ecuae:

--Beta tseiñe poibotso, Ejito eiyeo  
micana pojaenatibashapo cuáiñati-ani.  
Datsio mala peada poeti pó-ani. Joda  
tseiñe bihuenaiquitsiodada mashatae  
menetiaque. Etae netiatso ai meishapeque.  
Jodo alelajai e-anipocana atsaneque.

Tadicatapoa dipa cuaeme atao, dátseiñe  
bihuenaiquiodada cánaja mashatae netia.

Joda netiatso, aicana eishatsane. Patai  
peadao caja atapo eshoi ishametse ea, dameo  
Tadicatapoa jejeme eanipo. Domo  
Tadicataponae mimipoipo cuichacatapo pehue  
panobi. Mala peadao nobipeadahue papo  
--Tadicatapoa ea.

Patai peadaomo do laba isha-odi  
e-anipo mesa netia. Médoeteomo otsoapoipo  
yapala madi batahuepo, ajebetajaipo netia.  
Dápejo odecana dadaipo netia. Da apetso  
etáe sichojo bisha mésopoi poípo eisha.  
Tsecueomashamo Tadicatapoapoi ai cuahuisha  
poípo pele netia. Dia apetso,  
biahueleahueyaibo. Dipa apetsohue,  
tata Moiséa jodo alelajai e-anipocana mipa  
eatsane: Laba mesabiyo eisha. Odecana  
hueta. Aihuimepocana eotsoanetitsane.  
Zéibadeomo, ai cuahuishapoipo pele biyo  
eami, jana eisha.



Huada dipa atao, Tadicatapoa hua  
lélejeneti otso eilohuiyajao da eami, jana  
pacuahuisha-ezae. Dácanaja dia ataiquipo  
jaidya bani batso dia ea. Potso, huada  
joda mashatae cuichao mózizibade eme. Atso  
huada isa-élicana ecuae:

--Yama Ejito eiyeo eatsanehue  
pa-aibo-ishaa. Ema ojo mózizibadepo mídyojo  
papoyoa. Da boanaime micana póyoani.  
Quétsiocataja mózizibadepo poshahuiñaibojo,  
micana poshahuiñaibohue-ishaa mepoque.  
Cócuataja ojo mózizibadepo mitsichanao  
meanishanaiboque. Dipa yáicana donaibome  
pa-a, Canana eiyebeneje. Sisaemo joda  
mózizibadepo otsomaehua papo --ea  
Tadicatapoa.

Datsio, do póyoatsio huada Moisé  
ecuae:

--Aiyaja ai masahue atso, emanae  
jashababajatibojae jabatitsomo, mipa  
potsobale: Hua bácueiñeicana peada  
dobeatsobale. Shácuapo, beisedapo dia  
atsobale. Huacadea beisedapo neti pojomo,

dahue. Da tsa-ai pojomo, obejapo, cábalapo. Joda dipahue tsa-ai pojomo, huaipo. Dipa aiyaja ataiqui pohue, pa-ata. Da tí-anipo dobeatsobale, quia etaezo. Mimipoipo tata tibeatsobale. Mimipoipo tiñetitso, dáshojo mé-atsame ponetitso, mepeadamatsemo nalajicuia. Eshojo mé-atsame potso, da bácuenei jodapoi mémano-ani pacuae-ezae. Dipa atao, mimipoipo tataja da ami meiye. Atso cuahuishapoipo pele biacuisosoatsobale. Atso emimo jiziotso, sepitso, tópeaneti.

--Aiyacataja, doémetse neda atso, emanae jashabajatibojae jabatitsomo, doémetsenae eshoi jacuaetibotsobale. Ai tsíjipo tataja, ai métselfiponae eshoi jacuaetibotsobale. Tsijipo-ai tíbo-ishatsobale. Tsijiahuocuahuahue pehue pi-ama. Shipa tíbotsobale. Aiyaja, ai baiyatia eapoa, joda dipa ajaponae eshoi jacuaetibotsobale, ai jaipicatapo tíbotsobale.

Aiyaja ai jóyapo, ai eoloemepo jemideati atsomo, aisé eshoi bicuaebajapeibotsobale, aiyajametsepo da tíbo-ishatsobale. Dipa eshoi mamazaonae jatibotsodada obejadea ema tíbotsobale. Dipa ataibojodada yama huada masahue atapo iboetaibo, danae jashabajatibo. --Dipa pa Tadicatapoa.

**TADICATAPONAE MIMIPOIPO DETSE  
DIA A-ATAISI EPOPO BIYO**  
(Lebitico 10)

Peada tseiñeo, dóhuetsio Moiséa doémetse esipo ecuae:

--Miqueda eabetsotapo todidetsenae bisha Tadicataponae mimipoi pó-ani. Jidyo Tadicatapoa etaezo memodoque.

Atao, tata Alono, bácudeadetsenae tata Nadaba, tata Abionae jodo módotsane. Beaque-ócuá tseiñeme ajai asa-odi bime tseiñé peadao pea e-ani jabatime pósahua.

"Eami cuahuisha-odipo tezi metse pehue a-odi meaque" Tadicatapoa asata bime, pe-ishapo tezi metse e-ani jabatime pósahua detse. Potso detsea pe-ishapo tezi jétisa. Da jetitso nóbisaibo-ishá, dámétse yapala madi batahuepo pahueta-ezae.


Nóbisaiboanio Tadicatapoa otso eilohuiyajao. Dámétse detse mánoeme, dia a-ataisi batso. Tadicatapoa dia eatani batso, Moiséa doémetse ecuae:

--Tadicatapoa dipa cuaeme ea: "Quima modo a-odipocana ema iyoda banae dia atsobale, yama eani tsimehue atsobale. Náedaja ema jaidya pabatapojo dia atsobale".

Atao, Alonoa: --Quiji --pehue ea.  
Pojo, pejopocanaja manoetibapo detse tahuilele tsahuao pápa-anatibo. Dipa pojo, Moiséa tata Alonoa todidetsehue-ishá, tiápodetse dyá-ishá, Tadinae mimipói eadeibo, manoapodetse tsio papoibopojo. Tata Elesála, tata Itamála, dádetse dia ea.

**ISA-ELICANA CANANA EIXEO  
CUAIÑASATIBO PO BIYO  
(Nómelo 10, 13, 14)**

Isa-élicana eohuashocue Sina-í  
pójojohue peada mala netipeo, Tadicatapotae  
bíyopo mózizibadepo póshahuiñaibo. Pojo  
tata Moisé jépecananae datia pójaenapeibo.  
Tadicatapoa mashatae taesaibotso cánaja,  
huada beta, huada beta me-abome eataiyoa.



Hua aicananae abopai. Dipa pojaenaibome  
potso apamo tseiñeme ajetso, Canana eijkeo  
shamacana cuáiñasatibo. Cuáiñatiniohue,  
Tadicatapoa Moisé ecuae:

--Canana eijke jidyo. Yama micana  
metia asalelajaipo jidyo. Tatacana  
dóse-ocuahua eshoi ilohuiquique,  
jalobotijaidya ponae pababaletapojo, joda  
eijke tsocuipa pabatapojo --ea.

Atao, dose tatacana poti. Cualeta  
tseiñeme tsonoa poballetitso cuáiñuibocana.  
Obatsae, atsae-iyopo, bétaja mapa  
eacuaiñaibo.



Cuaiñabitso jépecana ecuae: .

--Huejemo ai pea babaletiti.

Jaidyacue babaletiti. Jana, acuijaja tsada  
pipoma daemo --ea.

10 ócuahuajamo cuaepea ea:

--Jodopo ecuichacana bale apamo,  
ajalili, amojiji, ajeni-o. Alele-iyo.

Tata betacatajabale cuaepea.

Tata Calebe, tata Josoé detsea dia ea:

--Cuádaja joda eiye jémipoda-ani.

Tadicatapoa eatsahuatani pojo, shojemime  
e-ani écuada --easahua.

Atao 10 ócuahuaja noahue cuáeibo-ishá:

--Dáleleopocanaja cuada  
dí-anataibo-ani. Tatacana dáocuacuhue  
ajalilicata. Dácaná pejo cuádamo ma-ai.  
Tsái-aiyoalipi batame --ea.

Jépecanao dáocuacuhuemo queoli  
jabatitso, cana dipa mímipe:

--Jibaque-o. Cuada jodo piñetima  
po-otsobale. Dácanaja ishejaihuepo atsá.  
Ejito eiybenejehue noahue panaibotsobale  
écuada mae --pehue epo.

*Atao, Tadicatapoa Moisé ecuae:*

--Yama ai dia a-odipo bacuembe bime  
náedamo yama eatsahuani jabatimehue pipoma.  
Dia a-ataisi. Dácuichao micana Canana  
eiyeo behuehue pinetipodama pó-ani. Eiye  
po-isi poe bale olidiyacuembe pó-ani  
cualeta malame tsonoa. Dipa ponae  
dia-a-ataisipocana manopeibo-ani. Dácana  
manopeibojodada, hua shipa  
póhueyahueyanipocana dada Canana eiyeo  
nétibo-ani. Tata Calebe, tata Josoé,  
huatseda bale ema jaidya báimasha.  
Huatsedalipi bale jodo nétibo-ani --ea.

Tadicatapoa dipa cuaetaodada, da  
acuaetaisipocana elijo te posaibotso:

--Canana eiyeo cuada nétibo  
--pósaibo.

*Pojo, Moiséa dácana ecuae:*

--Dya dipa-ishá pipoma potsobale.  
Behuehue Canana eiyeo potsomo Tadicatapoa  
bocuetoa pipoma poesha etse dia po. Micana  
pehuemo joda eiye jemidada atoa pipoma.  
Apitsa pehue. Jodopocanaja micana maesa  
ánabishapo pehue a --ea.

Moiséa dipa cuáesatani bime, jodacana jepe, izatobo potso, Canana eiye beneje pósati. "Jodopocana ishepetso jodo neti" pósahua. Tadicatapoa pibocuema pojo jodopocanaja jodacana eishe. Tata Moisé cuaetaiquipo tsimehue eishemeti. Atao, beta ize potso jódodoibo. Jépecana najo cuáiñiaibo. Cuaiñaibojo:

--Jéchiji yaicana cuaesaiqui --Moiséa ea.

**MOISEA MAJANASHOCUE EISHEIBOPO BIYO**  
(Nómelo 20)

Pojo, isa-élicana dáocuacuhue eatsi po-isi pójojo poyoabishapo pehue. Cualeta mala dyípalimi eiye masahue poe pobioletitsocana, noahue Canana eiyeo cuáiñiaibo-ishá. Jodo eohui tsa-ai batso jaiñacuetinae cánaja Moisé, Alononae ecuae:

--Cuipa bame atso cuama jidyo eiye po-isi poe mepoa ea-oyoa. Dia potso pamanopeibopojo dia a-ohua. Jidyomo jana tsa-ai, acuijaja tsa-ai, eohui tsa-ai.

Aidyie aneshili, jaiziquie aneshili --ea.

Atao, Moiséa, Alononae Tadicatapotaezo potso jodanae mimi. Pojo Tadicatapoa Moisé ecuae:

--Tata Alonoa obeja huoshoi acuili ji jadotia jépecananae majanashocue huanaque. Jodo potitso majana cuaeque, "Eohui cuaiñanameque" dai ea --Tadicatapoa easahua Moisé-- Jépecanaja shámatanetio dia aque --easa.

Atao, Moiséa doémetsenae, jépecana majanashocue béneje dona. Atso, huada naeda ecuae:

--Tánibi náedashili, joda majana midyojoeneti tseama eohui quecuaiñaname balea a-o? --ea.

Atso, huada "mipáe da mae" atso, acuili jimetse majana cuisoliji betacata ea. Atao, eohui apamo eajecuaiñati. Pojo dáocuacuahue eizipeti. Bácueneicananae eizipe.

Jaizipetio Tadicatapoа huatseda  
ecuae:

--Mimimetsehue majana mecuaeque bata  
ya metse asaiqui. Dipa aque asaiqui bime  
acuilijemetse majana cuisoliji betacata  
ea-oni. Dipa metseada náedabotseo ema  
pi-iyo-iyo bame aiqui. Dipa aiqui batso,  
metsedamo yama tí-ani po eiyeo netitoa  
pipoma pó-ani --ea. Huenohuemasha do  
nétibo-ani pomanetsio, dia ea.

Dipa pojo, joda isa-élicana jodo dia  
poshanatso, tata Alono mánoibo. Joda maesa  
poibojо, huatodi tata Elesála jodabisha  
tsíñeti-aibo. Tadicataponae mimipoi  
cuíchacatapo podea.

**PEAMABACUA BIYOPO**  
(Nómelo 21)

Tata Alono manoíbojo, Sao Bai laijiyo  
póyoatsio isa-élicana noahue  
eiñacuetibo-ishá. Tadicatapo, Moisenae  
masabapai cánaja eibo-ishá:

--Cuipapo tocue Ejito eiyeo huani  
netime pohue cuama dyahuapoe mepoa ea-oyoa?  
Mipa papopojo sha dia ea-oyoa. Jidyomo  
eohui tsa-ai, jana jaidyai pipoma.. Ojo  
janashilimo, báepajenetipo cuahueatsica  
huae batahuepo, dijaemahuecata poshilititi  
--epo.

Náedaja dia eatani batso Tadicatapo  
nedacatapo bacuacuaecana dácana dójojo  
eilohuiyajao, paditapojo, pabatimáepojo.  
Bacuacanaja ditaibojo, apamocana mánope.



Atao, jepea Moisé ecuae:

--Cuámaja Tadicatapo midyanae  
masabapai a-odipo masahueshili cuama bátini  
bedada. Pásopojomo Tadicatapo  
bicuaebajatame mi, huada joda bacuacana  
pashehuitapojo --cánaja ea.

Náedaja dia atao, Moiséa Tadicatapo  
bícuaebaja. Atao, Tadicatapoa Moisé  
ecuae:

--Peamametse bacuadali aque... Ba  
pomane batahue aque. Dipa dai ea acu  
huoshoatso dámatao hueliaque. Bacuaj  
ditaiquipo naeda joda bacuadalipo  
bahuiquitso bale, pimanoma po papo -

Ataohue Moiséa peamametse bacuad  
ea. Atsohue da acuimatao huelia. Di  
ataohue bacuaja ditaiquipocanaja da  
báhuiqui. Da báhuiquitani pocana bale  
Tadicatapoa jaihue meibo-odi ea.



**TATA BALAMAJA ISA-ELICANA TSIBA PEHUE EAPO**  
(Nómelo 22-24)

Dae dipa popetso, eiye po-isipoe  
40 malame popetso isa-élicana Canana  
eiyebeneje poíbo-ishá. Potso Mo-aba eiyeo  
cana bádeiñáibo-ishá, Canana eiye máenajame  
pójojo. Jodo badeiñao, joda eiyeopo  
netimetsepoa dácanaja eisheataibo-ani bame  
atso queolicuemé epo. Potso, huada  
eiloicana eilohuiqui, Tadicataponae  
mimipoipo, tata Balama, pajeticapojo, huada  
isa-élicana nimei, masahue pametapojo.  
Dipa ilohuiquitao dácanaja Balama  
cuáecuaiña:

--Mócuata Ejito eiyejeneti  
bea-aisécana apamo pó-otabea batae bani.  
Póbeapasi-ani pa mi, netimetsepoa eatani.  
Miqueda danae mimi-odipo shama pa mi  
bícuaebaja-ani naishapa huada dácana  
padi-anatapojo pa bani. Cuama midya  
bocuenao bale, yama midya ojo diñelo tia  
--ea.

Atao, Tadicatapoa tata Balama ecuae:

--Jodacana pibocuenama aque. Mo-aba eiyeo pótabeapocana isa-élicana moni. Quimamo joda ijada balelajai. Quia dia alelajai batso midya pea tsiba pehue atsobale.

Atao, Balamaja joda cuáeshaojipocana ecuae:

--Tadicatapoa ema micana pabocuemahue eatani póbisha yaicana bocue. Meponaiboque --pehue eahuiqui.

Atao, cuáeshaojipocana tsae poibo.

Netimetsepo najo cuaiñatibotso:

--Ji dia pipóa bani --eajajosaibo.

Pojo --Jatso mae dipa --atso, netimetsepo izai pipoma. Dya jópe-ishá pe-açocatamashapo tatacana ilohuiquiaichabishapo pehue ea.

Atao, poti. Balama najo cuáiñatibo-ishá. Potso ecuae:

--Naisha pa mi pónanicata, netimetsepoa eatani, po-otabeapocana nimei, masahue midya pamepojo pa. Midya dia ajaobale pa mi, ai ja tíquipohue e-atani, bani.

Atao, Balamaja ecuae:

--Tadicatapo dia poquemahue eatanipo  
atsá emamo. Me-izoapasique. Sisae  
Tadicatapo pabicuaebajaibo-ishá, ema ai  
pá-aso quecuaebo-ishatso e-atani pojo  
--pehue cuame ea.

Ai ja tíquipohue pa mi e-atani  
cuáetani jabatitso, beibeitso dipa cuaeme  
ea. Tadicatapoamo tamoa dipapo a ai pi-ama  
pohue dia ea. Atao Tadicatapoa Balama  
ecuae:

--Jaa, da pobaquebai. Yama cuáe-anipo  
pehue aque dia poani. Midyahue  
nimebatitsomo picuaema --ea.

Atao, Balama, molabiyo aniquitso,  
cuáeshaojipocana bócuena. Pojo,  
Tadicatapoa hualelejenetipo eiloi peada  
eiloihuiyajao, Balama  
pacuenetahuashiliatapojo. Joda eiloi  
Balama póyoacueneo dízimosojo tahuashili  
póneti, cueitatsepo cuishilo jailotia.

Joda banetitso, mola nóbí-ana. Balamajamo joda eiloi pibane tima. Mola paja poánicata pehue batso, cuísoli. Atao, dizio huae poíbo-ishá. Eiloi shipa néti-ishá. Molaja joda eibeyaibo-ishá. Dipa poánitsio, Balamaja huatsi huelei cuichao métedi. Atao, Balamaja mola cuísoli-ishá. Dóbisha joda eiloi dizi atsiapojojo dya eoloti-ishá. Ibeya apitsa batso mola tóloja pó-ana. Poáni batso Balamaja jazaiquitso joda cuísoli-ishá. Poánitsio Tadicatapoa mola mimiji eme:

--Jápotso ema mi cuisolina quimisha ea-oni? --Molaja Balama ea.

Atao, Balamaja mola ecuae:

--Emahue midya dojo-isipo batahue mé-eni póbishaja. Cuishilo poyoa pojomo ya mi ishe-anatame mae --ea.

Molaja ecuae:

--Apamo malame ya midya dojojaidya pehue asalelajai. Jo batahuemo pi-ama alelajai.

Dia eatani dójojo Tadicatapoa Balama ai abajai eahuiquibo. Atao, Balamaja bedada Tadicatapoa eiloi cuishilo metacuame póneti báneti. Dipa banetitso, joda iyoda bani jabatitso, tolója pó-ana. Pojo, Tadicatapoa eiloiya Balama ecuae:

--Midya dia a-ataisi batso, midya pacuenetahuashili-ezae ema dyóneti. Mique molaja ema pi-ibeyama ataomo, pidya poyoa pojomo, manotame mi poani --ea.

Atao, Balamaja joda ecuae:

--Yama masahue eani. Ema dipa potso ajai bani ajaomo, jidyohue baleotso, quima etaezo pa-anijajobo-ishá --ea.

Atao, Tadicatapoa eiloiya ecuae:

--Tatacana bocue-eje-que. Yama cuáe-anipo pehue naeda cuaemane dia poani --ea.

Atao, Balama deati, da báshaojicana nae. Joda Mo-abacanaja netimetsepo najo cuaiñatitso, joda ecuae:

--Aitso? Patsoi cana bátani --ejajajo--. Tadicatapoa ema cuáe-atanipocana pehue yaicana mecuae --ea.

Atao, netimetsepoa Balama eohuashocue matao papotsoatia ea. Atso huada ecuae:

--Shopi cuíchiji. Dyáeneti bale jepe batai. Miqueda danae mimilelajaipo mi cuaetame, dácana nimei, masahue pametapojo.

Atao, Balamaja joda ecuae:

--7 ócuahua huacacana, 7 obejacana jidyo metopeashaque Tadicatapo poi. Yama Tadicatapo pabicuaebaja mácana nimei que-atso e-atani pojo --ea.

Tadicataponae mimipetso huada netimetsepo ecuae:

--Ji Tadicatapoa jodacana di-anajae atoa pipoma. Nimei, masahue metoa pipoma. Huada dácana a-ija pehue sha etse dia a --ea.

Atao, netimetsepoa ecuae:

--Jiqueshili. Dácana masahue pamepojo ya mi jétimesani quépohue midyamo dácana jaidya babishapo pehue eani --ea.

Atao, Balamaja ecuae:

--"Tadicatapoa cuáe-atanipo pehue ya mi mecuae" ya mi cuáesani --ea.

Netimetsepoa cuáeibo-ishá:

--Yama midya eohuashocue peadao  
padodea. Dáeneti da pó-otabeapocana  
bataicata. Jodaeneti miqueda Tadicatapo  
bicuaebajaiboque-ishá, huada  
padi-anatapojo --easahua.

Atso, huada dóbisha dodea. Dóbisha  
huada 7 huacacana 7 obejacana  
tópeashasaibo-ishá Tadicatapo poi,  
Tadicatapo pa-ihua-ezae. Huada dia eatani  
dójojo Balamaja Tadicatapo bícuaebaibo-ishá.

Atao, netimetsepoa joda ecuae:

--Jada. Cuipatso cuáetani Tadicatapoa?

Atao, Balamaja ecuae:

--Tadicatapomo tsédapo tata batahue  
pipoma. Huadamo dipanoshi cuaetoa pipoma.  
Dya dipapo dá-ishá pi-ama. Huadamo mipaya  
ai pa-a atsomo daehue a pehue. Huada  
dácana Ejito eiyejeneti dobeatasha. Dácana  
ijada basha. Biabalelajai meme. Póbisha  
etse jicho --ea.

Atao, netimetsepoa ecuae:

--Midyaja dácana masahue me apitsa  
jabatitsomo, bapehue ajaidyahue aque --ea.

Atso, huada Balama eohuashocue  
peadao-ishá dódeibo-ishá, jodaeneti  
isa-élicana nimei atoa que-atso e-atani  
pojo. Noahue-ishá bácueneicana  
tópeanetibo-ishá. Atao, Tadicatapoa  
shámaja dia métanio, Balamaja joda ecuae:

--Joda pótabeapocana, isa-élicana.  
Tadicatapoa jaidya bálelajaipo joda. Huada  
dácana beiseda ado-eje métayoa. Aiyaja  
dácana shehuihuiquibotóa pipoma pó-ani  
póbisha etse dia a --ea.

Balamaja dipa pehue eatani batso,  
netimetsepo záiqui-ana. Jazaiquitso huada  
Balama ecuae:

--Jiqueshili pehue mi. Pona-oboque  
náatso. Ai pitima yami e-ani mae.

Atao, Balamaja joda ecuae:

--Tadicatapoa ema cuáetanipocana pehue  
yama cuáedeani. Joda isa-élicanaja

meisheanataiboque. Jaishemeanatitsomo,  
jaishemeanati mepoque mae.  
--eahuiquishahuiñaibo.

Dipa ashahuiñaibotso, tsaE poíbo.  
Etaezo pójajobo.

**BALAMA MASAHUE EAPO BIYO**  
(Nómelo 25,31:1-3)

Tseiñebeta potso, Balamaja dia meaque  
eatanio, Mo-aba mamakanaja isa-éli tatacana  
papobea ea, huada pabata-ezae. Dipa  
jabatinæ Mo-abacanaja isa-élicana dipa  
cuaeme a-odi ea:

--Jidyo cuama najo cuámaja jaidya  
balelajaipocana micana miuatame,  
izimetame. Atao, isa-élicana jepea  
dácanaja cuáetaniohue ea, baba  
batahuepocana eizime.

Jodacana dia poáni batso Tadicatapoa  
Moisé ecuae:

--Mo-abacanaja jaidya balelajaipo  
manoimahuesahuapo huápopo tatacana, Mo-aba  
mamacananae jabati-odipo maesa papope.  
Netimetsepo peada dia pomepocana midya  
ishemeque. Jépecanamo yama atsacata  
pameibo, mónohue papopojo --ea  
Tadicatapoa.

Atao, Moiséa daehue ea. Tadicatapoa  
dipahue daehue ea. Dipa apetso,  
Tadicatapoa Moisé ecuae:


--Joda Mo-abacanaja micana jepe  
masahue mepoa a-odi. Dipa batso micanaja  
dácana ishe-anapeibotsobale.

Atao, isa-éli tatacanaja Mo-aba  
tatacana pehue eishepesa. Pónacana bale  
ize easahua. Batso Moisé ecuae:

--Jápotsoicana dia eani? Pónacana  
cuíchiji ishemetse ataesahua poe tsoicana  
dia eani. Dácanajamo cuada jepe masahue  
mepoa a-odi poetso dipa. Dáocuacuahue  
meziziohuanetique --ea.

Ataibojo, pónacana eishepeibo.

**MOISEA DOEMETSECANA  
MATACATA CUAEHUEYAIBOPO BIYO**  
(Deuteronomy 4-7, 18, 31)



Pojo, Tadicatapoa dia aque eatanio  
Moiséa doémetsecana ecuae:

--Micana mano Jodana petoanaibotso,  
Canana eiyeo nétibo-ani. Tadicatapoa  
"metia" alelajaipo eiye jodo. Jodo  
nétipocana eshoi maesa atso jodatsio micana  
nétibo-ani. Dácanaja baba ai  
bajaichalelajaipo danae maesa apai atso, do  
nétibo-ani. Tadicatapoa micana

eatsahuataibo-ani, jodopocana maesa pa-apepojo. Daocua maesa apetso, jodo menetiboque dyapi. Tadicatapo iyoda poi, jaidya poi banae netitsobale. Huada alelajaipocana dojojaidya anae dia potsobale. Huada eataniohue posha potsobale. Huadapoi jobidya ponae modotseifne-odi posha potsobale. Joda nime-anidyapoi mebaque. Eohua, baepa, ai misiohuahue huada-odi metse. Micana dipahue-isho jodahuapo potajae Tadicatapo bátini. Huada cuáetanipocana mósocuichao medojoque. Jodacana metse miqueda todilipicana izedeame jaidya eani aque. Anitsoanae, poyoanae, aninae, janae dia meaque, dácana dipahue Tadicatapoa eataniohue poáni papopojo. Bécata Tadicatapoa cuáda-atahue-ishapo peada jodacuaeji poi e-ataibo-ani. Joda cuaejipto tata emabatahue-isho pó-ani. Huada cuáetanipo micanaja tsítsabaja e-ani. Yamamo mano Jodana pipetoanaiboma e-ani, Canana eiyeo pinetima pó-ani. Tadicatapoa emamo dia papomahue atasha.

Tata Josoéa bale quia alelajai batahue  
micana eadeataibo-ani. Tadicatapoa micana  
dópetoataibo-ani. Huada dia atao, jodo  
nétipocana maesa meaque. Dácaná atsacata  
netime batso eshoi maesa atsobale, micana  
masahue mepoa pi-ama pa-ata-ezae.  
Nimejojidya mepoque. Mósojomahue mepoque.  
Do nétipocana queolipoi pibama.  
Tadicatapoa micana bócueataibo-ani,  
eatsahuataibo-ani. Huada micana pimeiyama  
e-ataibo-ani --Dipa doémetsecana mátacata  
cuaehueyaibome ea, Moiséa.

**MOISEA CANANA EIYE  
SHAMABISHAPO PEHUE EIBOPO**  
(Deoteonómio 34)

Dipa doémetsecana cuaepeibome ataohue  
Tadicatapoa Moisé ecuae:  
--Jomo eohuashocueo potsoatique.  
Canana eiye shamapeibotso, do mi  
mánoibo --ea.

Atao, Moisé eohuashocueo pótsoati.

Pojo Tadicatapoа mipa cuame ea:

--Joma eiye, Canana eiye, dyaenetihue shamapeiboque. Joma eiye yama tata Abama, tata Isaca, tata Jacobo "metia" aisapo eiye. Yamami joda cuaepeibobishapo pehue eani. Midyamo jodo picuáiñatiboma po-ani, dia a-ataisi po-asha pojo.

Dia ataibojohue Moisé jodo mánoibo. Datsio 120 malame tsio dia poíbo.


Abeisetsio, etoa amaehuetsio bime dia poíbo. Tadicatapoа cuenecuaetashahuecata poíbo. Pojo, Tadicatapoahue joda doboteibotso, eohua pasha pójojo mépapatibo. Tsédapoahue pápaibo pipoma damo. Dábale Tadicataponae jabotsetsoatilelajai. Da dyípamo joda batahue-ishapo tsa-ai. Moisé mánoibojo, doémetsecanaja peada baditsonoa eiñapasaibo.

**JOSOEA DYA HUADA-ISHA  
DOEMETSECANA DOJODEAPO BIYO**  
(Josoé 1,2)

Tsio Tadicatapoa tata Josoé ecuae:  
--Mano Jodana mepetoanaiboque, micana  
dáocuacuhue, Canana eiyeo panetijajobo-ezae.  
Co pojaepo eiye ya micana tí-ani. Aiyaja  
micana shehuitoa pipoma pó-ani dyamo, yama  
micana bócue-ani pojo. Ya micana pimeiyama,  
ba-isilipi pi-ama. Joma eiye yama micanaja  
babashodicana "metia" aisapo eiye. Dya  
midya-isha miqueda doémetsecana jodo  
menetia eajajobo-ani. Animeoji poque.  
Mosomahue poque. Yama Moisé cuichao  
cuaeisapocana boanajaidya anae  
menetijajoboque. Dipa potsobale,  
quejecataja poyoatsio, dia pojaidya pó-ani  
--ea Tadicatapoa.

Dia atao, Josoéa tata betacata Canana  
eiyebeneje mipa ilohuiquime ea:

--Manomamaemepo Jelicólele cuádaja  
eishepebetsota-ani. Metseada eshoi joda  
lele jalobotijaidya ponae mebanatique --ea.



Atao, huatseda poti. Jelicóleleo  
cuaiñatitso, da leleo nōatinipocana  
tahuilelajaipotaezo nobi. Mama Lajabaja  
metse joda etae. Mepaibahuepo mama Lajaba  
bánime epo. Jodo cuáiñatinipodetse  
isa-élidetse bamehue atso, mama Lajabaja  
huatseda etaezo lóbosha.

Isa-éli tatadetse mama Lajabaja etaezo cuáiñani tsabajatso netimetsepoa lele . bíabaipo tatabeta eilohuiqui, huatseda pa-iñatapojo. Atao bíabaipocana pona, mama Lajabaja etaebeneje. Ponatso mí mijajo:

--Naisha pa isa-élidetse jidyo cuáiñani tsábani. Dyo pojomo dobeaque --pójajosa.

Atao, mama Lajabaja ecuae:

--Ji tso ponaiquiba. Náatso cuadenaibotso bale etse téjetibo --noshi ea.

Atao, bíabaipocana mano Jodana béneje jódodona, isa-élidetse paishe-anatibo-ezae. Pojo, mama Lajabaja isa-élidetse mímitsoa:

--Tadicatapoa micana tseiñena anaselepo dopetoataibanapo cuámaja tso tsábaja. Micanaja mano Jodana shipa nétipocana maesa ape-ashapo biyo dipahue tso tsábaja. Daocua biyo tsabajatso, cuama queolicuemebasha. Nimebataisicuemebasha.


Micanaja jaidya báshapo dábale  
manoimahuetoacatapo tsabatame. Huada  
micana ojo eiye tíataibo-ani tsabatame.  
Dipa bani jabatitso yama metseda lóboshani.  
Yama dipa eani batso, pásopojomo emabisha  
metsea ize atame e-ani. Quima huadi, tadi,  
doémetsecananae dia ashapai aque --ea.

Atao, huatseada joda ecuae:

--Midyaja tsema pi-ibobama atsobale  
dia poáni. Midya dipa ajaobale cuámahue  
póbeiboanitsio daehue atae e-ani --ea.

Atao, hua-etae lélehuelei matao eani  
batso, huada huatseda ecuae:

--Mipa ai táhuijatsio, jidye lalae  
jahueti-anaibotso, ojo bado cuichae  
poboteibotsobale. Potso, eohuashocuecana  
dójojo jalobotitsobale. Metseda  
tsátanipocana tsahueyataibojodada  
medeatibomane --ea.



Atao, huatseda poboteibotso  
ehuashocue dójojo lóboti. 3 tseiñeme  
jaloboshanatibotso doémetsecana béneje  
déatibo. Cuaiñatibotso huatseada  
tata Josoé cuáecuaiñatibo:

--Jomo nétipocanaja cuada  
patai-iyoda pome bátani baja. Quenaicata  
Tadicatapoa joda eiye cuada tíataibo-ani  
--ea.

**ISA-ELICANA MANO JODANA PETOAIBO PO BIYO**  
(Josoé 3-5)

Quimisha tseiñeme potso, Josoéa  
doémetsecana ecuae:

--Cuada mano Jodana petoanaibo beo,  
cuádaja eiycatapojojo panetijajobo-ezae.  
Micana beta, Tadicataponae mimipoipocana,  
Tadicatapoa jejeme mei joda jadotia ehuio  
mecuedaque --ea.

Datsio, joda mano ejói-epo.

Bodai-epo, naiyo pojo. Mimipoipocana ena  
tsabitsabio bepotiatsio Tadicatapoa  
mátabenejepo manona pana-ajejamahue  
eahuiqui. Dipa atao, ena dohue mítsija  
pehue poana. Tíbobenejepomo tiope. Pojo,  
mimipoipocana manotoameo potitso nétibote,  
caja jadotia. Dipa do jepecanaja  
eizoataneti péjeje jópecana pétoanapetibo.



Mamaeme nétitsoapetibo. Dipa pojo, tata Josoé dose majana jálidypo shodotso manotoameo máiyajaichaneti. Manolaimatao daocuahue-ishá maiyanetime ea. Dipa atso huada doémetsecana ecuae:

--Quetsio dyae pomisi dipa pa báisani a-odi da écuada a. Jidyo dipa dopetoaibome eatanipo iboetatoa pipoma póneti pó-ani. Cuádaja todicanaja "Ai poitso ojo majanacana máiyaneti" ataomo, Tadicatapoa jidyaé cuada dópetoataiboanipo biyo cuaeatsobale cuada eani --ea.

Josoé dipa apetaodada, joda mimipoipocana nétitsoapetibo. Naeda dipa potaibojo, mano Jodana ná-ajetibo-ishá. Dipa ja petotibome potso isa-élicana Canana eiye māenajaocata pōbaibo. Jodo nétipocanaja léleapo janacana médiajajobo. Dipa poibojodada Tadicatapoa hualelejenetipo cuahueatsica huae batahuepo eoloemehueyaibo.

**19.8**

**JELICO LELEOPOCANA MAESA EAPO BIYO**  
(Josoé 6)

Isa-élicana mano Jodana japetoanatibojo  
Jelicóleleopocana queolicata jabatitso,  
piposhahuiñama. Lele biahuelei  
tsecuetomoicana ajasha apetso eanishape.  
Da lélebiahueleimo majana jashaohua epo.  
Ashocuebojo, apamotiji epo. Dipa batso  
pi-ischema e-atani jabatime pósahua dácana.  
Jelicóleleopocana dia pótanio Tadicatapoa  
Josoé ecuae:

--Yama micana pa-atsahuaibo,  
Jelicóleleopocana maesa pa-apojo. Mipa  
dáicana ea: Jaeda tseiñeo, ai-isheipocana  
dáocuacuahueneae joda lele mebabale.  
Ai-isheipo ehuio poyoatsobale. Datia  
si-ete mimipoipo tatacana, huacadana  
jameatia. Dátiamo Tadicatapoa jejeme caja  
jadotiapo mimipoipocana. Tiacatamo  
ai-isheihue-ishapocana poyoatsobale. Dipa  
jalicati poyoame potsobale. Jaeda dia  
atsanetso 6 tseiñeme tsonoamo babaleti  
peadahue meaque.

Dipa'eshoi atso, si-ete tseñime  
bihuenaiquiomo, si-ete-ocuahua  
babaletime meaque. Dipa atso mátacata  
bábaletihueyaiboanio, huacadana méasi atso  
dya mepaitsaiyahue meaque. Micana dipa  
eani dójojo yama lélebiahuelei  
pacuedoloahuiquibo. Yama dipa ajaodada  
etaecana pójojo nobicata micana pó-ani.  
Dipa potso, tsédapocana maesa meapeque.  
Bácueneicananae maesa apai meaque.  
Mama Lajaba, huada etaezo eanipocana bale  
ize meaque. Lele bánaticapo detse huada  
loboshata batso, ize meaque. Aihualecanamo  
cuishilometse séseohuaneti. Peamametse  
eapo aicana bale quimapoi mejemique. Quima  
etaezo joda aicana meishajajoboque --ea.

Tadicatapoa dipa cuaeme apetao, Josoéa  
bisha jópecana cuaedea. Josoéa dipa  
apetaohue cánaja Jelicólele bábaletsane.  
6 tseñeme dipa babaletime ea. Dipa atso  
hueno sisahue májejetinitsio poti,  
si-ete-ocuahua babaletime pa-a-ezae.



Mátacata póbalehueyatiboanio mimipoipoa  
huacadana méasi atao, Josoéa ai-isheipocana  
ecuae:

--Metsaiyaque! Tadicatapoа joda lele  
cuada tíataibo-ani beo --ea.

Atao, dáocuacuajahue pazada tsaiyame ea. Dácanaja dia eatani dójojo Tadicatapoamo lélebiahuelei cuédolomeibo. Ataohue, isa-éli tatacanaja etaecana huácuaetiqui. Huacuaetiquitso ecuichacana, bácueneicana, eishepenetibo. Aihualecanamo cuishilometse séseohuaneti.  
Mama Lajabacana bale ize ea. Tadicatapoа poípo peamacana dipahue. Apetso, da etaecana sópenetibo.

Isa-éli tata peadaja, tata Acana bánamepoa, huapoi aicanabeta métsilobo. Peamapezo jaidyapocana, jaibai jaidyapo peada dia ea. Hua etaemeo pápashajajobo.

**ISA-ELI TATA PEADAHUE DIA A-ATAISI POJO  
36 OCUAHUA EISHEMETI PO BIYO  
(Josoé 7,8)**

Dipa apetso, beta tseiñe po-ishatso, Josoéa tata beta eilohuiqui-isha, A-í lele bisha pabanatica-ishapojo. Joda lele bisha paishe-ezae dia ea. Cuaetao cana poti A-í lélebeneje. Tsíbanati ea. Dipa ánatitso, cana cuáiñaiibo. Cuaiñaiobotso Josoé ecuae:

--Joda lele, ma-ailipimasha. Dábapai ishedalilipi, batae baiqui. Ai-isheipoçana jepea pehue joda ishetoa. 2 mili ja, 3 mili ja dáocuaja pehue dipa atoa baiqui --easahua.

Atao, Josoéa 3 mili tatacana eilohuiquisahua, A-í léleopocana paishetapojo. Dácana cuaiñatio, A-í léleopocanaja 36 ócuahua isa-élicana eishe-anabishapo pehue ea. Jépecanamo cuádecuadehuiqui. Tadicatapoa pi-atsahuáma batso jaishemeanatibishapo pehue epo. A-í léleopocanaja jepe ishetao, isa-élicana eolibatibo.

Paba epocata batí. Næda pani batso  
tata Josoéa Tadicatapo ecuae:

--Te. Jápotsoa cuama jidyo  
dóbea-oboani. A-í léleopocanaja cuama jepe  
isheta tsabajatso, pe-ishapo léleopocanaja  
cuama iyoda poi pibama e-atani. Cuama  
ishejae-odi pó-ani. --ea.

Atao Tadicatapo Josoé ecuae:

--Ji midya peada dia a-ataisi poa.  
Yama jemiquemahue eanipohue tso jemishata.  
Dábiyo dipanoshi cuaeme ata. Po cuichao  
micana atsa. Pe-asocata pipoma,  
queolipehue. Joda masahue ejipo tatajamo  
ema pi-iyo-iyo. Huada micana nedacueme  
me-anata, tiboneta. Joda maesa  
ánaibojaidya meaque. Joda dipa aibotsobale  
micana ai ñimeoma poíbo. Ai ñimeoma  
poibojodada yama micana atsahuaibo-isha --ea.

Dipa cuaepetso, "tata Acanaja da dia  
ata-isha" Josoé cuaeme ea. Atao, Josoéa  
tata Acana bícuaebaja:

--Aicana sha mi tsiji-ohua. Dábiyo  
ema cuaepeiboque --ea.

Tata Acanaja dábiyo cuaepetao,  
tata Josoéa jépecananae tata Acana lele  
shipa dónaibo. Tsijitapo aicananae, huane,  
todicananae, bácueneicananae,  
aihualecananae donapai ea. Jodo Josoéa  
tata Acana ecuae:

--Midyaja cuama nedacue ánaja.  
Behuehue Tadicatapoa midya tsa-i  
e-ataibo-ani.

Atao, cánaja majanametse  
tata Acanacana pícuaueneti. Dipa  
manoemeibome atso tópeanetibo hua aicana  
naehue. Atso, majanacana metse  
bíamaiyaneti. Joda dia ataibojodada  
Tadicatapo jaidya bátibo-ishá, zaidyamahue  
poíbo-ishá.

Yama micana bedada pa-atsahuaibo --ea.  
Pojo, Tadicatapoa dipa meaque eatanio,  
isa-éli ai-isheipocana A-í lélebeneje  
noahue epo-ishá, jodopocana maesa  
pa-a-ezae. Jépeamo mátsahuaeme huáleloti.

Jépecanamo pidya jacuaetiquihue. Dácana baibotso A-í léleopocanaja aja-ishá batahue pa-a-ezae cuádesa. Atao, isa-élicana póbeanipotsimehue jododonadali epo, A-í léleopocanaja hua-etaecana pameiyashaotapojo. Dipa etae meiyashaocuae-anaticanio, mátsahuaeme poetipocanaja etae huacuaetiquitso sóneti.

Atao, isa-éli cuádeipocana otsotsecui banetitso, mimi:

--Jápotso ma dia pó-obo-ani. Jomo sha jepe po dipa-o --epo.

Potso netineti pehue. Paba epocata pehue. Dácana dia pósanio, isa-élicanaja huacuaetiqui. Huacuaetiquitso eishenetí. A-í léleopocana, 12 mili ócuahua ishepetso, bácueneicana, aihualecana méjemi. Dipa apetso, Josoéa Tadicatapoapoi, bácueneibeta eishetso, tópeasha, teziji pehue papopojo. Dipa huada Tadicatapo "ajái midya cuama eani" cuaeme eaibo.

**CABA-ONOLELEOPOCANAJA JOSOE SIPACUAEJAIÑAPO  
BIYO**  
(Josoé 9)

Isa-élícanaja Jelicólele, A-ílele maesa atapo biyo tsabajatso, Caba-ónoleopocana queolicata cana bati. Joda lele, A-ílélejeneti quimisha ola-ocuehua. Jodopo cuíchacatapocana dipa cuaeti: "Isa-élícanasipanatitsobale, cuada pi-ishema pa-atapojo." Potso, da léleopo tata bétaja, jaibai, huatsijozoi esicatapo jáibaibo. Eohuimei esicatapo, laba jólotapo dojoibotso isa-élícanabéneje poti. Cuaiñatitso cánaja Josoé ecuae:

--Dyapicana pipoma cuamamo neti --noshi eacuaiña--. Micananae alidyasopabati-ezae, cuama póbeani, péaja jaisheti pipoma papo-ezae --eacuaiña.

Atao, Josoéa ecuae:

--Ojó eiyeo, Tadicatapoa cuama títaiboanipo, micananae alidyasojabatitoa pipoma.

"Ojo eiyeo lelemepocana atsacata netime  
batso pojo maesa meapeiboque" Tadicatapoa  
cuaetasha póbisha etse dia po. --Atso,--  
Ai-ata tso micana? Cótsoicana leleme?  
--ea.

Atao, Caba-Ónocanaja ecuae:

--Dyapicana pipoma cuama leleme.  
Cuámaja aicana shamaque. Cuámaja leleo  
pójaenatinitsio, laba shacula a-ashohue poa.  
Behuehue jólota. Cuámaja jaibai,  
huatsijozoicana poyoashasai jalemapetiti  
--noshi ea--. Micanaja dojolelajaipo shama  
jaidyacata adoejecata tsabajatso cuama  
póbeani. Huada Ejito eiyeo, mano Jodana  
shípapo eiyeo micana atsahua-odipo biyo  
tsabajatso, dia poani --noshi  
sipacuaejaiñame ea--. Cuama dáocuacuahue  
micanaja eilóipoi pehue pojae. Cuama a-aba  
pehue mebaque. "Yama micana maesa pi-ama  
e-ani" cuama cuaequer --ea.


Atao, tata Josoéa dácanaja aicana shámape. Da esicata batso dáehuecata cuaeme eatani bame easahua. Opiacata pa daehue leleme bame easahua. Batso huada dácana ecuae:-

--Jaa. Cuámaja micana maesa pi-ama e-ani --ea.

Dácana biyo Tadicatapo eshoi bicuaebajatsobale pohue, dábiyo pinimebama Josoéa. Dipa atao, joda Caba-Ónocana hualeleo pónaibo-ishá. Quimisha tseiñe potso, jodacana dákuehue leleme Josoéa tsábaja. Pi-ishema yáicana mea cuaeja batso, huada dácana eilóipoi pehue ea, cuati pame-atapojo, eohui tséhuatijipoi ea.

**TADICATAPOA ZETI BADI ANIBISHAPO PEHUE  
EAPASIPO BIYO  
(Josoé 10)**

Caba-ónocana isa-élícananae dipa abada bátini batso, 5 péaleleopocanaja Caba-ónocana "Dódacuecana mae pó-ani" ea. Dó-odi potso dácana Caba-óno lélébeneje poti, Caba-ónocana paishe-ezae. Huacuainatitsohue mipae-ishenetime ea. Dipa eatanitsio Caba-ónocanaja tatabeta eilohuiqui, isa-élícananae pajeti-ezae, pa-atsahuata-ezae. Cuajejaiñatao, Josoéa, ai-isheipocananae shobocuename ea. Sisa dababaohue ajetso, Caba-ónoleleo cuáiñati. Cuaiñatitso Tadicatapoa eatsahuatanio da isa-élícananae jaishetijipocana apamo eishe. Dipa atso jódodo-anipocana cuade, paishe-ezae. Jódodo-anipo jepe Tadicatapoa nai bime tsohuajaipo ajalilipometse eishe-anaibo. Jépecanamo isa-élícananae eishetseiñeneti. Zeti mólipicatatsio pi-ishepemahue batso Josoéa Tadicatapo ecuae:



--Zeti dohue Caba-ónolele biyo  
pa-anipasi aque. Badi dipahue dohue  
pa-anipasi aque.

Cuaetao, Tadicatapoa zeti, badi dohue  
mítsichaname. 24 olá tsonoa zeti  
anibishapo pehue. Isa-élicanaja joda 5  
lelemepo jaishetijipocana ishepetaibojodada  
zeti eolotibo. Quetsio dáocuepo tseiñe  
aiyaja pibaiboma-ishá. Atso Josoéa  
doémetsecananae pamoda lélecana  
eishebalepeibo.

Dya joda leleopocana dya joda  
leleopocana ishe-anapeibome ea. Dácanaja  
dipa a-odi batso joda eiyeo nétipocana  
apamo dó-odi potso, isa-éllicana  
paishé easahua. Apamocueme pohue,  
isa-éllicanaja dácaná maesa eapeibo,  
Tadicatapoа eatsahuatani pojo. Shamacana,  
dácanaja joda eiye, Tadicatapoа "ya joda  
patia" a-odi ataisapo eiye, cuaeso  
jémipecuae. Atsocana ai eishehueyaibo.

Datsio, isa-élí-atacana-odisa bime,  
dose patacamero batahue epo, tata isa-élia  
dóse-ocuahua todicana imeataisa batso.  
Dipa batso tata Josoéa jodacana co  
néti-anipo cuaepe. "Micana pátacamo jomo,  
micana pátacamo jodo, micana jomo" eape.  
Atao, jomo poque eataniohue, cana  
nétipecibo. Tata Lobene pátacacana jomo,  
tata Sime-óno pátacacana jodo, tata  
Joda-atacana jomo. Dipa nétipecibo.  
Tata Lebí pátaca bale doémetsecana dójojo,  
dánajo beta, dánajo beta, dánajo beta pehue  
netime. Dácaná Tadicatapoа modopoi batso

huadáe teje pi-ama. Doémetsecanajá  
Tadicatapo ti-odipo jana, eami dahue  
mepaidiahue ea.

**JOSOEA MANOIBOJAECUENEOPAHUALEJA  
EAPESHODIBOPO BIYO**  
(Josoé 24)

Apamo mala potso, esicata poibotso,  
Josoéa cuíchacatapo doémetsecana  
jéjepequibo. Jonajo pobeapeo huada naeda  
ecuae:

--Mamazaocana Tadicatapoa ojo eiye  
jaidyapo titana cuada. Huadamo cuada  
atsahua-odi apamo. Dipa batso, joda tsada  
banetitsobale écuada. Dipa batso huada  
eilóipoi pehue potsobale écuada. Jodahuapo  
pojae pipoma potsomo, ai-ocata huapo  
pó-ani? Opia pójaenatipocanaja  
ai másamasa-o huapo-o ja. Jidyo  
Canana eiyeo netilelajaipocanaja jaidya  
balelajaipo-o ja. Cuama quima pamiliacana  
bale Tadicatapo huapo pehue pó-ani --ea.

Atao, joda cuíchacatapocanaja Josoé  
ecuae:

--Ji dia pipoma cuama pó-ani.

Tadicatapo huapo bale pó-ani --easahua.

Náedaja dia atao, Josoéa ecuae:

--Ai másamasapo huapo papo-ezae  
micanaja Tadicatapo huanabotetsomo,  
jatibone-anatibobishapo pehue micana po-o.

Atao, náedaja ecuae:

--Ji Tadicatapo tsada báyoanimo  
póbishaja dia po --easahua.

Atao, Josoéa majana jálidypa  
Tadicatapotae pejo acuitibojo eisha. Atso  
huada naeda ecuae:

--Boanaijipoi ojo majana dyo ya  
eishaani, cuada behuehue cuáetinipo  
pi-iboetama pa-a-ezae, Tađicatapo pimeiyama  
pa-a-ezae.

Tata Josoéa ñipa apetao naeda  
pónapeibo. Náedanae dipa jatibotso  
tata Josoé mánoibo. 110 mala netitso dia  
poíbo. Da nétitsonoime bale isa-élicana  
Tadicatapoa eataniohue po-odi pósahua.

**DA IYOIMEPOIPOCANA BIYO**  
(Joéses 2,3)

Joda tata Josoé manoíbojo, jépecanaja  
Tadicatapo eiboetaibo. Joda iboetaibotso  
jodo Canana eiye máenajao nétipocanaja  
jaidya balelajaipo huapo pehue pótsaneibo.



Dipa potsanetso jodacanaja mama, tata  
jajemiqui-odi epo. Damo atsacata anime,  
netime pohue dáhuale dipa a-odi ea.

Dipa cana eatini batso Tadicatapoа  
eatsahuahueyapasi, péyohueyapasianati,  
patso mae báatini pojo. Tadicatapoа dia  
ahueyatso atapeapocanaja hua-ajeatitso  
isa-élicana eisheneti. Jépmo  
eisheanaibotso bime jépmo jemi, eiloi  
pa-a-ezae. Tsácata anaehuesa ai me-odi ea.  
Dipa atsono atao, isa-élicana  
panaehuesahua te poíbo. Potso,  
"Tadicatapo, cuama atsahuiboque-ishा"  
eibo. Atao, Tadicatapoа dácana peadahue  
cuíchacatapo poi eibo, da iyoíme papopojo.  
Atso jodacuichao huada dácana  
eatsahuibo-ishा atapeapocana  
paishehuiquitapojo. Bécata da iyoíme  
tata manoíbo-ishao, dácana ja Tadicatapo  
eiboetaibo-ishा. Pojo ata pea-ishapocanaja  
hua-ajeatibo-ishा. Atso eisheneti-ishा.  
Bécata isa-élicana te po-ishao, Tadicatapoа  
peada tata da iyoíme poípo tsio eibo-ishा.  
Dipa a-ishা, a-ishা a-odi isa-élicanaja.

**MAMA DEBOLA, DA IYOIME POIPO MAMA BIYOPO**  
(Joeses 4)

Dácana dipa po-odi tsio, mala peádao,  
Canana eiyeo nétipo atapeapocanaja  
isa-élicana eisheneti. Jépmemo eisheanatso  
bime jépmemo jemi, eiloí pa-a-ezae.  
20 malame tsonoa tsácatá anaé dojó. Atao,  
isa-élicanaja Tadicatapo bícuaeabajati  
bícuaeabajati-isha ea, huada  
pa-atsahuata-ezae. Datsio, Tadicatapoa  
mama Débola cuichacatapo poi ea, da iyoíme  
papopojo. Atao, mama Débolaja tata Balaca  
ecuae:

10 mili tatacana pami dó-odi apetso  
danae atapeapaocana eishehuiquibo-ani,  
Tadicatapo eatani. Huadapami  
eatsahuataibo-ani, midya pe-asocata  
papopojo, eatani.

Atao, tata Balacaja mama Débola  
ecuae:

--Midyahue ema bocuet sobale dia poáni.  
Pibocuema atsomo, pipoma --ea.



--Jaa. Mebocue. Bale midya dipa  
poáni batso midyahue cuíchacatapo atapeapo  
eishe-ani pipoma. Ai mámacataja joda  
eisheataibo-ani, Tadicatapoa eatani.

Atao, tata Balacaja 10 mili ócuahua  
ai-isheipocananae, mama Débolanae,  
atapeacana huá-ajea, paisheanati-ezae.  
Tadicatapoa eatsahuatanio, dácana  
sho-ishepeme ea.



Cuíchacatapo tata Sísela bale  
jódodoshahuiñaibo. Atapeapoa etaezo  
cuaiñatio, jodo eanipo mamaja izi titso,  
lóboshanipo batahue ea. Joda  
tahuianaibojo, huadahue acuipezo  
asadapometse eshojo táta-anaibo. Dipa  
ataiquitsio tata Balacaja tsánasa. Atso do  
cuáiñati. Jodo ishepodanataiqui bábadeti.  
Dipa jatitso, 40 malame tsonoa isa-élicana  
ai ñimeoma neti epo. Mama Débola iyoíme  
tsio dia epo.

## TATA JEDE-ONO EAPO BIYO

(Joéses 6,7)

Joda mama Débola maesa poibojo  
isa-élicanaja Tadicatapo eiboetashilibo-ishá  
Atapeapocanaja jaidya balelajaiposhili huapo  
pehue poíbo-ishá. Dipa pojo,  
madianítacanaja huá-ajeati. Atso,  
isa-élicana tsácata anaehuesa ai me-odi ea.  
Jana, bácueneicana, aicana mejemi-odi ea.  
7 malame dipa atao, isa-élicanaja  
noahue-ishá Tadicatapo nímebaibo-ishá. Atso,  
cuáeibo-ishá, pa-atsahuatapojo. Atao,  
Tadicatapoa isa-éli tata, Jede-óno  
bánimepo, ecuae:

--Yama midya cuíchacatapoi eibo-aní,  
micana pai midya iyoíme papopojo,  
madianítacana paishehuiquibopojo. Eshoi  
miqueda léleopo manoímahue noshi poa  
aicana, Ba-ala jejeme poa aicana,  
mejiapehuiquiboque. Dábiyo Ba-alapoi eami  
metopeashalelajaipo mejiapehuiquiboque.  
Dápejopo iyoda balelajaipo acuicananaehue  
dia ashapai. Dipa atso dátsiohue huacadea

peada quimapoi topeashaque, emapo jaidya  
pabadeibo-ezae --ea Tadicatapoa.

Atao, tata Jede-ónoa daehue ea. Huada  
dia ataiquipo baibotso, da léleopocana  
--Aiyajatso dia a-otaiquia? --epo.  
Tata Jede-ónoa dia ataiqui tsabajatso joda  
maesa ánajae. Bácuedea me-ishejae eatani  
batso huada tadia ishejae poánipocana  
ecuae:

--Ba-ala manoímahuetacata jabatitsomo  
huadahue joda bianaibotsobale. Huadahue  
hua-ai jamebatitsobale --ea.

Atao, Jede-ónoa tatacana apamo  
jodanajo dó-odi eme, danae madianítacana  
paishe-ezae. 32 mili pamoatatacana dia  
easahua.

Atao, Tadicatapoa joda ecuae:

--Ji cuehua apamocata. Máocuajahue  
madianítacana ishetsomo micanaja pehue dia  
aiqui jabatime micana pó-ani. "Adoeje pojo  
dia aiqui" jabatime micana pó-ani. Da  
eishe-anipo biyo queoli poánipocana  
que-ocuaja dia poánipocanamo "meponaiboque"  
aque --ea.

Tata Jede-ónoa dipa atao,  
22 mili pámoamo pónaibo. Pojo, 10 mili  
pehue dohue eani Jede-ónonajo. Batso  
Tadicatapoa ecuae:

--Dipáe dáocuahuemasha. Betaemasha  
potsobale. Manojo donaque jodo  
paizipetipojo. Huáenicana batahue  
jaiziquimepocana "meponaiboque"  
aiboque-ishá. Mé-atsametse tsehuatso  
eizitanipocana pehue dojоque --ea,  
Tadicatapoa.

Atao, cana manojo eizipeti.  
300 tatacana pehue mé-atsametse tsehuatso  
eiziqui. Pojo Tadicatapoa Jede-óno ecuae:

--Madianítacana pataipamoda pomepohue  
midyaja joda 300 pamoá tatacananae pehue da  
eishepe-ani. Yama micana eatsahua-ani pojo  
micana dia e-ani --ea Tadicatapoa.

Atao, tata Jede-ónoa joda  
300 ócuahuapo tatacana cuáedea-isha:

--Mepeádametse ode eotsoapo medojoque.  
Izimei deze ajalilipo batahue metse  
tomotso, dojоque. Mepeádametsemo  
pamea-ezaepo huacadana medojoque.



705

223

Sisadoeteocata cuádaja táhuijapo  
madianítacana bídyilo-ani. Dipa atso,  
cuada ai ñimetsio huacadana meadáda a.  
Izimeicana datsiohue tsabipehuiquibo,  
odecana mae papopojo. Dipadae cuada a  
--dipa cuaebome ea.

Atso, apodatojo calae calae pona.  
Sisadoeteocata, madianítacana bídyiloa.  
Atsohue huacadana méani mepaihue, odecana  
mae ea. Atsohue, mipá tsaiyame ea:  
--Tadicatapo poi, Jede-óno poi  
cuáma-isha da --ea.

Atao, madianítacana eizepe. Queje ba  
jódodoibocata bati. Potso, jépecanamo  
madianítapaihue apodatojo peaja jaisheti  
epo. Jépecanamo, jódodoshahuiñasanipo,  
isa-élicanaja tsoshatso eisheana. Dipa  
tata Jede-ónoa 300 tatacananae pehue bime  
madianítacana pamodacueme pohue maesa eape.  
Madianítacana dipa isheme atso,  
40 malame tsonoa dávana ai ñimeoma  
nétisa-isha.



**TATA SASONO AJOJI POSAHUAPO BIYO**  
(Joéses 13-16)

Isa-élicanaja noahue Tadicatapo  
iboetataibo-ishao pilitéocanaja bisha  
dácaná hua-eilóicana poi ea. 40 mala,  
dátsono ai me-odi ea. Tsio Tadicatapoa  
lélejenetipo eiloiya isa-éli mama peada  
ecuae:

--Bacuai pipoma polelajai bime mi,  
mique todi bádeibo-ani. Acolo batahuepo  
pi-izima aque. Eami asidypomo pidyima  
aque. Da jaidyaohue pojo bajaidya aque.  
Pishoalajamacata aque, quia poícata náedaja  
bamehue pa-atapojo. Esi popetso huada  
pilitéocana apamo ishe-odi e-atani, micana  
ai ñimeoma panetipojo --ea.

Dipa cuaeme ataohue, bádeti. Todi  
jaidyaohue potso, Sasono báname ea. Esi  
popetso ajoji epo, Tadicatapoa shama  
dácuichao bade pojo. Tseiñé peadao zoto  
ezoemashapoa HUOOO ponae huatenaticao,  
huada mé-atsametsehue joda sálilianeti,  
zíziohuaneti. Tadicatapoa ajoji métanetio  
dia ea.

Tsio, huada pilítéo mama jémiquisahua, huane poi. Peada semana potso joda mamaja joda jaidya pibama jabatitso huada joda méiyaibo. Huatadinajo pójajobo. Potso joda mama huánasaibo-ishá. Tso jepea jemitaiba bájajobo. Batso huada pilítéocanaja tejeo pónetipo janacana méso-oneti. Huada dipa atao, pilítéocanaja Sasonoa jemisatashapo mama iñatso cuatichojo cuáhuishaanaibo. Cuíchapona dia ashapai ea. Dácanaja cuahuishataibojo Sasonoa jazaiquitso dácaná apamo eisheanaibo, pabianaibo-ezae. Dipa ashahuiñaibotso, lóbotibo. Dipa isheme atao pilítéocanaja pamodacueme jépecana huana. Huanatso,

--Cotso Sasonoshili-o --eacuaiñati--.  
Náatso dobeatsobale --ea.

Queolí potso 3000 isa-élicanaja doémetse tsáshahuina. Tejetibotso, ecuae:  
--Cuámaja midya eijijaobo-ani,  
pilítéocana patia-ezae, dácanaja da  
maesa pi-apema p --ea.

Atao, Sasonoa dácana ecuae:

--Ema maesá pi-ama atsomo, jaihue.

Ema ijitso pilitéoshilicana ema  
metianaiboque.

Atao, hua doémetsecanaja betacata bado  
shácuapo metse ijibotso dónaibo.

Pilitéocana tísáibo. Pilitéocanaja jaidya  
jabatinae joda jémiquisa, dya dipa a, dya  
dipa a ánajae jabatitso, pa-apohue ánajae  
jabatitso. Datsio, Tadicatapoa shamaja  
ajoji métanio tata Sasonoa dámétse eijipo  
badodetse líjihuiqui. Molazahuitsoa do  
ejapo jemitsoatso, dámétse 1000 ócuahua  
pilitéo tatacana eisheibo-ishá.



**SASONO JOLAJOLA POIBOPO BIYO**  
**(Joéses 16)**

Pilitéocana jepe dipa isheaname atso  
beta mala potso huada pilitéo mama peada  
jemibojae eibo-ishá, mama Dalila bánimupo.  
Huada joda jemibojae-ishá eatani batso,  
cuíchacatapo pilitéocanaja joda mama  
ecuae:

--Sasono mipa bicuaebame amane:  
"Jápotso midya ajojicata? Aiyaja cuipa dia  
ame ataobale tso mi jolajola poíbo?" amane.  
Dipa aque cuámaja joda jolajola atoa  
pa-apojo, pa-apohue jichome pa-anapojo.  
Midya dipa ajaobale cuámaja diñelo  
titame --ea.

Atao, mama Dalilaja Sasono jaidya bani  
poe bataecata ea. Dipa anae huada joda  
bícuaebaja:

--Jápotso mi ajojicata-o? Aiyaja  
cuipa dia ame ataobale tso mi jolajola  
poíbo? --ea.

Atao, Sasonoa joda ecuae:

--7 jono notsadapometse ema ijitsobale  
ema jolajola poíbo, micana-ishá batahue po  
--noshi cuaeme ea.

Atao, mama Dalilaja hua nócana  
cuaedea. Dácanaja notsadapo jono  
lijiquitso, joda mama --Ojometse  
ijique --ea.

Atso, pataipeadao lóboshati,  
jonotijipocana. Atao, Dalilaja Sasono  
jonometse eiji. Atso, huada Sasono ecuae:  
--Quima nócanaaja mi eiña-oataibo-ani.

Atao, Sasonoa dámetsé eijipo  
jonomacana líjipodahuiquibo. Atao,  
mama Dalilaja ecuae:

--Dipanoshi sha ema mi cuaeme ea-oni.  
Dáehuecata cuaeme ataesahua. Ai metse  
cuipa atso tso mi ijijaidya a? --ea.

Atao, huada ecuae:

--Bado shácuapometse ema zibicata  
ijime ajaobale, ema jolajola poíbo.



Huada dipanoshi cuaeme atao, Dalilaja  
joda bado shácuacatapometse eiji. Atao,  
huada da bádocana sholijihuiquime ea. Maji  
lijitso nótahua huadamo. Huada dipa atao,  
Dalilaja ecuae:

--Jique dipahue bime dipa. Dipanoshi  
cuaeme a-odi emami. Náatso dáehuecata  
cuaeme atamesahua --ea.

Atao, huada ecuae:

--Quima shóa-iña maji tazalelajaipo  
cuichao cuabapanetitsobale ema jolajola  
poíbo --ea.

Aibotso, táhuianaibo. Dipa  
tahuiñaibome pojo, Dalilaja daehue me-a.

Dipa apetso, ecuae:

--Sasono izeiboque. Quima nócanaja mi  
eiña-o-ataibo-ani --ea.

Sasono, izeibotso, dipa shoacuabapame  
ataiquihue póshahuiña. Potso da  
bócahuiquibo. Mama Dalilanajo  
pobeibo-ishao, mama Dalilaja ecuae:

--Ema abada bani noshi mi --ea.

Atso shipa bicuaebaja-odi ea.

Shamacana, Sasonoa isi-isi bashasai ecuae:

--Emamo Tadicatapoa eilóipoi.

Pashoalajatimahue Tadicatapoa ema ea.

Quima shúa-iña lajaibotso pehue, ema  
dipapehuepo tatabatahue pehue poíbo.

Jojidyacueme pipoma --ea. Dipa aibotso  
táhuianaibo.

Pojo, mama Dalilaja peada tata  
--Pobeaque --tsí-aiqui ea. Atao pobe.

Pobeatso, e-ialajacata ea. Huada dipa  
apetao mama Dalilaja:

--Sasono, izeiboque. Nócanaja mi  
eiña-o-ataibo-ani --ea.

Izetibotso, shúa-iña tso laja bátini  
bime dajojihue pa jabatime pósahua.

Tadicatapoá méiyataibo-anipo pinimebama.  
Poánio, pilitéo tatacanaja jacuaetiquitso  
bái-iña. Eiñatanio, shéhuihuíqui-ani pa  
jabatime pósahua Sasono. Apitsa bati.  
Poanio dácanaja Sasono tóahuacahuiquibo.  
Atso, hualeleo dónaibo. Jodo cadenametse  
eijineti, ijitaezo. Jodo jana dódoemeneti.  
Joda jodo eanitsio shóa-iña bótesaibo-ishá.

Beta badi potso cuíchacatapo  
pilitéocana dó-odi poíbo, jaidya  
balelajaipo shamaja etaezo. "Dacono" joda  
jejeme. Huada eatsahuatanio tata Sasono  
tso iñaibasha bame asatso dia epo. "Ajái  
cuama midya asha" pacuaebo-ezae dia epo.  
3 mili pamoa shípalimi ecuichacana etaeomeo  
nóbipe. Dipa potso cana dipa cuaseti:  
"Sasonoshili jetitsobale huada cuada  
paizibametapojo." Potso peada tata  
eilohuiqui, Sasono pajeticapojo. Jetitso,  
shamatae doeteo nétiame, mahuatonedetse  
jánabacuao.

Jodo n  titsio, huada, mahuatonedetse  
i  n  netitso Tadicatapo ecuae:

--Tadilipishodi quia, noahue ema  
jojidya atipeada aiboque, yama quima  
etoabiyo piliteocana pabianaibomaepojo.

Sasonoa dipa eatani mepaihue,  
Tadicatapoa joda shamatae m  huatonedetse  
DOO pa-atia ea. Ataohue joda shamatae LOO  
Ts  dapocana tsII ea. Dipa Sasonoa  
manoibonae, eizenetitsio eishepo pamo  
shipa maesa eibo.



**TATA SAMO-ELIMO TADICATAPOA ECUAEPO  
CUAEJIPO BIYOPO  
(1,2 Samo-éli)**

Isa-élicana Tadicatapo  
eiboetahuiquibo-ishá, eiboetahuiquibo-ishá  
a-odi pohue, Tadicatapoá dácana  
meiyahuiquibocatamo ajae pi-ama.  
Biabahueyapasi-odi pehue ea.  
"Midya-ata-odipo peadanae eohua idyadae  
nétipocana jaidyapoimasha pó-ani" huada  
Abama cuenecuaetaisapo pi-iboetama. Dipa  
batso huada isa-élicana meiyahuiquibocatamo  
ajae pi-ama. Dipahue joda isa-élicanaja  
ataapeapocana dáocuacuahue jobiyo  
mecuaetajae bátini epo. Dipa jabatitso,  
tata Sasono maesa poibojo, huada tata  
peada, tata Samo-éli bánamepo, jocuaejipoi  
eibo. Dipa atao apamo malame tata Samo-éli  
dábiyo cuae-odi ea. Joda esicata potitiba  
jabatitso todidetse dyá-ishá cuáejipoi  
eadeaibo. Huatsedamo Tadicatapo huapo  
pipoma. Huatadi batahue-ishá pipoma.

Diñelo bale atsabai epo. Huatseda dípa  
poáni batso jépecanaja Samo-éli ecuae:

--Cuama aise-asopo peada  
netimetsepooi aque, huada cuama  
padojotapojo. Shoma-eiyemepo netime  
polelajai batahue-ishai cuama netime  
papopojo dia aque --ea.

Dipa dácanaja Tadicatapo shehuime ea.  
Huadamo jaidya bátani bime isa-élicanajamo  
alío pehue bajae. Dácanaja dipa cuaeme  
atao, tata Samo-élia Tadicatapo ecuae:

--Aisé netimetsepo poi que-a balea a?

Atao, Tadicatapoecuae:

--Dácanaja cuetaiquihue aque. Da  
tinae, "Da dia mepobaque" aque. "Saecue  
bale pó-o-ani" cuaeme aque. Atao,  
Tadicatapo dia métanio, Samo-élia  
anetibaopo tata, Sa-olo bánimepo,  
netimetsepo poi ea. Joda tata Tadicatapo  
huapo póbetsotasahua. Tadicatapo huápotsio  
netimetsepo jaidyapo póshanahua. Dipa  
posatso huadáe nimebaiquitso pometse pehue  
pótsaneibo. Netimetsesa bime pálipia  
poibo.



Atsono potso, Sa-lo lo jaishemetibojo,  
Samo-élia tata Dabida bisha netimetsepo  
poi ea. Dádada Tadicatapo huapo epo.  
Tadicatapo tsada bai pojo huada Tadicatapoa  
jéjeicana zehui-odi ea. Joda dipa  
netimetse tsio jepe mamazaocana  
jasasati-odi epo. Potso pamodacueme poibo,  
ado-ejepoimasha poibo. Datsio dipahue  
Jelosaléne lele pojaidyapo poibo, Dabida  
jaidyapo do neti pojo. Dipahue huada etae  
jálidyapo jaidyacuepo ea, netimetsepo jodo  
panetipojo.

Joda etae apetso, huada Tadicatapotae  
bisha ajae batí. Moisé nétitsio  
ataisapomo mashatae pehue dojolelajai  
batso "etaecatapohue pa-aibo" pósahua.  
"Acui jashadapometse, peama jaidyacatapo  
metse ya pa-aibo" pósahua. Pojo  
Tadicatapoa huadáe etae aquemahue ea.

--Mqueda todiapo joda quima etae  
pa-ata --ea.

Atao, Dabidaja da metse eatanipo bale  
mécuaebajaneti, mebajaichanetibishapo pehue  
ea, huada todiapo pa-atapojo. Dipa Dabida  
netimetse tsio, Tadicatapoa ecuae:

--Midya-ata-odi peada netimetsecatapo  
poi pojanahuati matamahue pó-ani. Ai-ize  
ai-aicata jodalipi pó-ani --ea.

Huada tata Abama, tata Isaca,  
tata Jacobo cuenecuaeme atana-ishá batahue  
cuaebome ea-ishá, Dabida. Datsio jodacana  
cuaetanapo dójotaiyoa, huada.

**DABIDAJA MASAHUE EASHASAHUAPO BIYO**  
**(2 Samo-éli 11,12; Samo 51)**

Joda Dabida dipa netimetse pójatsio,  
huada etaeméneti alisopo mama náhuiboanipo  
shámalobo. Dipa shamame atso aiseatajá,  
eilohuiqui, aisé mamatso pojo.

Tata Oliasaja huane, mama Betsabé, epo.  
Dipa tsabatso dадoe aisé beta --jetique--  
eibo-ishá. Dipa atso danae bálobosisati.  
Dipa potso, joda mama méjehue pipoma poeti  
batso, huada hua eahue tata Oliasa  
eishemeanaibó. Atso mama Betsabé jemicata  
eibo.

Dabida dipa poáni batso Tadicatapoа  
joda cuaejipo, tata Natana, Dabida béneje  
eilohuiqui. Atao, tata Natana ja joda  
cuáejajo:

--Pea leleo aitipaopo tata peada neti  
Aimahuecatapo peada. Aitipaopoa  
obejacana, huacacana apamo eani-epo.  
Aimahuepoamo obeja peadahuelipi pehue eani

Joda ijadacue bátani, huada todicana abahue-ishá. Peada tseiñeo aocuepi cuáiñatibo-anipo tataja joda aitipaopo tata báshanaibo. Joda aitipaopoa báshanatanipo tata jana eami tijae epo. Hua bácueneicana apamo eanisa pohue dahue tijae pipoma. Potso, aimahuepoa obeja, peadahuelipi eanipohue, méjemitso, eishe. Dápezo jiñatso, etia --dipa cuaeme ea, tata Natanaaja.

Aitipaopoa dipa ata tsabatso, Dabida zaiqui:

--Jápotso dipashili. Dábatahue netimepo tata maesa áanatsobale. Huada pamodamasha tsio tíbotsobale. Pa papo dia me-aja póbishaja cuátolo obejacana tsio tíbotsobale --ea.

Dabida dipa mimime pojohue, Natanaaja joda ecuae:

--Ji midyáe dipa. Huadapami netimetsepo poi atasha, Tadicatapoa eatani. Huadapami peyo-odi. Huadapami ai tíacueme asa-odi. Midya dipahue huaneisamo pamí. Daocua miqueda ai tsa-ai pojobale pamí ai ti-ejetame Tadicatapoa eatani.

Dipa bí-asatani bime, huada shámatanetio, tata Oliasa isheanametso, hua huane tso mejemiba midya. Dipa midya Tadicatapoа ecuaepo cue-apohue masahuelipi bahuiquia. Midya dipa Tadicatapo iyodapoi pibama pojo, miqueda todicana esipopetso péaja jaishetilelajai pó-ani pa, Tadicatapoа eatani. Miqueda todia bime midya ishejae e-atani. Aiyaja miqueda huánecana bá-oataibo-ani --ea.

Tata Natanaja dipa tsanetaodada, Dabida dyá-ishā te poibo. Potso huada Natana ecuae:

--Tadicatapoа "dipa a-asi" bátanipo tso yama aja. Jodalipi yama tso posipeiquiba --ea.

Potso, huada Tadicatapo bisha ecuae:

--Tadi, miqueda dipa a-asi bániро tso yama aja. Tso ema a-asi poetiba. Nime-isi poetiba. Ai nimeoma po apitsa. Da queolime pehue. Pa méataibo-anicata bátini. Ema mi olibashoditaibome, tadi.

Locuataibome ema mi. Quima emi huiñana ataibome. Mósodo huaca-ishá ataibome. Miqueda todicana posha bataecata ema mi ashoditaibome-ishá --ea.

Huada dipa cuaeboomataibojó, Natanaaja ecuae:


--Tadicatapoamitso lócuataiboani.  
Huada midya maesa pi-aiboma e-atani.  
Midyanae tso eolibatiboani. Midya badeasajapo bale, jaidyaohue posatso shipalimi, máno-ani. Midya dia ajapobiyo Tadicatapo masabaipocanaja joda másabajaichatani batso, Tadicatapoamitpa méataibo-ani --ea.

Apetso joda hua etaebeneje pónaibo.  
Pojo Dabidaja imeasatashapo todi  
Tadicatapoamitdaehue mánoemeibo.

Dipa masahue ame atso shipa, Dabidaja todi peada eimeaibo-ishá. Joda Salomóno báname ea. Joda bale Tadicatapoamitjaidya eba. Dipa batso, huatadi Dabida manoibojae cueneo Tadicatapoamitjoda ecuae:

--Miqueda todi Salomóno dyá-ishá netimetsepo poi aiboque --ea.

**TATA SALOMÓN DIA EPOPO BIYO**  
(1 Leye 3-8)



Tadicatapoa dipa cuame atao Dabidaja daehue eibo. Salomón dyá-ishá netimetsepo poi eibo. Atao, Tadicatapoa joda abahuepiacata, aitipaocata ea. Dipa joda netimetse pojo Tadicatapoapoi etae jaidyacuepo eme. Atso, Tadicatapoa mashataezo anilelajaipo caja jodobisha eishadeibo. Tadicatapoa 10 cuename e-apocana do eanipo caja dia ea. Da apetaibojo Tadicatapoa mózizibade batahuepo metse etaeme méjejea, dácanaja dia ataiquipo jaidya bani batso. Salomón manoíbojo, dya peada-ishá netimetsepo poi poibo. Da mano-ishao dya peada-ishá. Dipa a-odi ea isa-élicanaja datsio. Jodacana jepe bale netimetsepo jaidyapo epo. Hua doémetsecana atsahua-odi ea, Tadicatapoa eataniohue papopojo. Jépemo netimetse po-isipo epo. Doémetsecana masahue netime pehue me-odi ea.



## **TADICATAPOA JEJEME CUAEJICANA BIYOPO**

Dácana dipa batso, jocuaeji poípo tata manoíbojo Tadicatapoa dya peada-ishá dipapoi adea-ishá. Da mano-ishao, dya peada-ishá. Dipa a-odi ea Tadicatapoa. Naeda-odi pashabajatipojo dia a-odi ea. Atapeapocanaja jaidya balelajaipo shámacana huapo pipoma papopojo dia a-odi ea. Ai-ize ai-aicata poi pó-anipo biyo cuenecuae-odi pa-atapojo dia a-odi ea.

## **TADICATAPOA JEJEME CUAEJIPO TATA ELIA BIYO** (1 Leye 17)

Cuáejipoi eapo tata peada, tata Elia epo. Joda cuáejipoi tsio, sáecuemepo tata netimetsepo poi epo, tata Acabo bánimepo. Manoímahuenoshipo Ba-ala jejemepo huapo pehue shili damo. Huánenae dia popai. Peada tseiñeo, tata Eliaja netimetsepo Acabo huá-ajea.



Hua-ajeatso mipa eacuaiñati:  
--Midya saecue netime batso  
Tadicatapoa nai eoloemehueyataiboani beo,  
midya pabatibopojo. Yama cuáebojo pehue  
nai e-ataibo-ani-ishá --ea.

Dipa cuaepe taohue, Tadicatapoa  
tata Elía ecuae:

--Mano Jodanaja shóahua-ahuíqui eapo  
sada maezo jalobopasitique, tata Acaboa  
midya pi-ishema pa-atapojo. Midya dipa  
pojo, tseiñemisi jamanicanaja midya jana  
eami ti-anati-odi pa-ata --ea.

Dipa cuaeeme atao, tata Elía sada maezo  
jíojajo.

Beta badi potso, atsono nai pi-ama  
batso, tata Acaboa tata Elía tsábalesaibo,  
nai pametapojo.

Tata Elía dácuichao eanipo sada  
tiopeibojo, Tadicatapoa ecuae:

--Saleta leleo dyá-isha netijajoboque.  
Jodo eanipo ahuemahue epopo mamaja midya  
jana ti-odi pa-ata --ea.

Atao, Elíaja joda Saleta léleo po mama  
huá-ajea. Beta tseiñe potso cuáiñati.  
Cuaiñatio, joda mamaja ecuae:

--Ji quima laba tsa-ai. Alina, asete,  
ma-ailipicata eani. Beo jéloibo-ani. Da  
jeloibotsohue, ema todinæe mánoibo-ani --ea.



Atao, tata Eliaja joda ecuae:

--Te pojae pipoma. Quimapoi eshoi labà atsobale. Metseada poi tia aibo aque. Nai pi-ama tsonoime miqueta alina, asete micata pipoma pó-ani pa Tadicatapoa eatani --ea.

Atso, tata Elia jodc nétijajcbo. Da mamaja joda mihua-odi ea. Dáocuaja da jana di-odisa bime, da jana pipopema.

Tadicatapoa dia métanio, dipa.

Tseiñé peadao da mamaja todi bea-ai necuaiñatso atsacata poibo. Potso, mánoibo. Joda dipa poáni batso tata Elia da todi poi Tadicataponae mimi. Atao, Tadicatapoa joda noahue eizeneti-ishaa.

**ELIA BA-ALAPOIPOCANANAE DIA EPOPO BIYO**  
(1 Leye 18, 2 Leye 2)

Quimisha mala líjihue tsonoa nai pi-ama pojo Tadicatapoa Elia ecuae:

--Netimetsepo Acabo hua-ajeaque-ishaa. Nai olo-odi-ishaa yama méibo-ani-ishapo mi cuagetame --ea.

Atao, Elía tata Acabo huá-ajea-ishá.

Cuaiñatio Acaboa joda ecuae:

--Dahue sha. Midyaja cuama olidyacue  
me-o-odi --ea.

Atao, Eliaja joda ecuae:

--Yasha dia meiqui po dia bame.

Midyaenizae dia métini. Tadicatapo  
huanaboteatso, Ba-ala huapo pehue po-otso,  
dipa naeda olidyacueme atso bitsoi dia  
pó-oni. Behuehue camelo jejemepo  
ehuashocue béneje naeda donapeque. Ba-ala  
dojometsepocana 450 ócuahuapo dipahue  
donaque. Ema pea do pó-ani --ea.

Dáocuacuahue ehuashocueo cuaiñatio  
Eliaja ecuae:

--Jápotocue micana dya jodahuapo, dya  
jodahuapo pehue po-o-odi. Da batahue  
pipobapema potsobale. Tadicatapo  
manoimahuetoacatapo pojomo, dáhuapo pehue  
pojaidayhue potsobale. Ba-ala  
manoimahuetoacatapo pojobale cuichi etse  
dáhuapo pehue po. Ba-ala dojometsepocana  
450 pamoá néti-o. Tadicatapo cuaeji

omo  
peadahue pehue neti. Emapehue dipa.

Dácanaja huacadea betacata jetitsobale  
dácanajapoi peada, quimapoi peada. Atso,  
peada ishetso, sepitso cuatibiyo  
ishatsobale, Ba-ala patiba-ezae.

Cuádajahue pihuetama. Ba-ala  
dojometsepocana Ba-alanae memimibaquebai,  
naisha cuati huétatani pojo. Yama peada  
sepitso, cuatibiyo pa-isho, Tadicatapo  
patia-ezae. Yamamo Tadicatapo pacuae,  
huada yama eishanipo quehuetatso e-atani  
pojo. Cuatihuetai poánipo dábale  
manoimahuetoacatapo, cuádaja bamehue  
e-ani --ea.

Dipa cuaeme atao naeda mimi:

--Jaa. Midya dia eanipo ajái. Cuada a.

Potso, Ba-ala dojometsepocanaja eshoi  
huaca peada cuatibiyo eisha. Atso Ba-ala  
jéjetsanesahua, nime-ono tsánesahua. Cuati  
biatililia anae jeje. Sisaehue  
jejetsanesatso bime, máhuaocatatsio  
pihuetatima eba. Batso, tata Eliaja dácan  
dipa pa-apohue cuaeme ea:

--Pazadacata meabaque. Ba-ala módoani  
ja, cócuataja, táhuija ja --ea.



Atao, Ba-ala dojometsepocanaja  
jéjecatasahua. Jopehue jajicuitipo jasati,  
Ba-alaja cuati shohuetame pa-atapojo.  
Ba-ala pa micata. Dipahue pihuetama eba.

Máhuapesichani shipalimi Eliaja dácana  
ecuae:

--Pa. Dya yama-ishá pa-a quimapo.  
Dyipa mepobeaque --ea.

Atso, huada dábiyo Tadicatapo ai  
tilelajaipo, másatiapo, eajaichaibo,  
majanametse. Atso dátsajae  
sípimahuai balelea ena do pa-anishapojo.  
Atso, cuati majanacanabiyo maiya.



Huacapezocana bisha cuatibiyo eisha.

Apetso huada shámatanetipobeta ecuae:

--Cuátolo eohui mei momotitso, da eami  
cuati mebiazoyaque, anajacata papopojo.

Biazoyana quimisha meaque --ea.

Náedaja eami, cuati biazoyapetao  
sipimahuaimeo ena jeje. Atao, tata Eliaja  
Tadicatapo ecuae:

--Cuichamecatapo, tata Abamaja  
tata Isacaja tata Isa-élia jaidya báshanapo  
midyamo. Behuehue cuati iloque, midyabale  
manoimahuetoacatapo ojocanaja bamehue  
pa-atapojo --ea. -

Huada dipa eatani mepaihue Tadicatapoa cuati eilohuiqui. Da cuatia huaca, cuati, majanacana dipe. Sipimahuaimeo ena eanishapo dipahue.

Tadicatapoa dipa eatani batso, jodopocana nimetiobanae bíso-ana.

Eohuao zótoja pope-anatso:

--Tadicatapo dábale  
manoimahuetoacatapo --pope.

Dipa popeo, tata Eliaja dácana ecuae:  
--Ba-ala dojometseposhilicana  
meiñapeiboque.

Dácanaja dipa atao huada da  
450 ócuahuapocana eisheanapeibo. Apetso  
netimetsepo Acabo ecuae:

--Temasha nai eoloibo-ani.

Atao, datseiñehue nai ajalili eolo.

Beta malame poiboj, Tadicatapoa  
tata Elía dipa eizenetihue jeobo, jonajo  
panetijajobopojo. Tata Enoco ataisa-isha  
batahue ea. Dipa aibotso, isa-éli tata  
peada, tata Eliséo jocuaeki poi eadeibo.

**TATA JONASA DIA EPOPO BIYO**  
**(Jonasa 1-3)**

Apamo mala potso Tadicatapoa  
tata Jonasabisha jocuaeji poi eadeaibo.  
Atso, peada tseifneo atapeapocana dábiyo  
metsabatajae Tadicatapo bati. Dipa  
jabatitso huada tata Jonasa cuáesahua:

--Nínibe léleopo atapeapocana  
cuae-anatique: "Micana saecuemé netime  
batso Tadicatapoa micana maesa  
eapeataibo-ani" ánatique --ea.

Dipa asatao bime, tata Jonasaja dácana  
cuae-anatijae mahue epo. "Ji dácanajamo  
cuama nedacue easha. Abada batiji pojobale  
'Jaa' ema po." Dipa nimebatso  
jiojaenabishapo pehue epo. Tseiñenabeneje  
potitsō aocuepi cuáiñati-anipo canahuatae  
jálidypomeo eaniqui. Tadicatapo do bale  
tsa-ai bame asatso dia pósahua. Aniquitso,  
táhui-anaibo. Dipa tseiñenae póyoatsio,  
Tadicatapoa beni pataijojidya pomepo eilo.



Ená diatani bame atso canahua dójoicana queolicue pósahua. Hua jaidya balelajaipo shama jéjepesahua. Jejenae canahuameo ai dójotapocana jíapehuiqui. Tata Jonasa táhuija baibotso canahua dojometsepoa joda eizemeibo.

--Jápotsoi atahuialilicata-o? Miqueda jaidya balelajaipo shama jejetaesahua mi, cuada ize que-atso e-atani pojo --ea.

Atao dójoicana jepea Jonasa ecuae:

--Aisetatatso mi? Quéjenetitso mi?  
Ai tsoique alelajai? Ai átatso mi?

Atao, Jonasaja ecuae:

--Isa-éli tata ema. Tadicatapo jaidyabai pehue emamo. Huada eohua, tseiñena imeaiji epopo. Huada ema Nínibe lélebeneje ilohuiquisata bime, ema "Jaa" pipoma. Ema dia pipoma batso huada ojo beni jojidyapo eilohuiyajaotani. Ema tseiñenao jihuiquitso bale, beni mi poibo --ea.

Atao, dójoicanaja pa, pócata easani bime, jí-ohuiqui. Dipa eatani mepaihue beni mi poibo.

Beni ñipa poáni batso, canahua  
dójoicana --Tadicatapomo quenaicata  
ajai --epo.

Jonasa ena mióso eanibotetinio  
Tadicatapoa dia métanio jaebime ajalili  
tsácatapoa laca. Tseiñé quimisha, sisá  
quimisha jaeseo pó-anati, tata Jonasa.  
Dipa jaesemeotsio, "Te, mámoni" poibotso  
joda Tadicataponae mimi, ize pa-ata-ezae.  
Atao, Tadicatapoa dia métanio, jaeza Jonasa  
enacuecueo bátaiyo-aibo. Pojo, Tadicatapoa  
joda cuáeibo-ishá:

--Nínibebolele bánatiquecata, yamí  
cuáe-anipo pacuaedea-ezae.

Atao, bedada Jonasa "Jaa" poibo.  
Potso poti. Cuaiñatitso, huada Tadicatapoa  
cuáetanipo cuáebalepe. "Masahue netime  
batso Tadicatapoa maesa e-ataibo-ani"  
jatsabajatitso, da léleopocana técate pope.  
Dipa potso hua masahuepoi eashapocana mae  
eahuiquibo. Tadicatapohuapopo pótaneibo.  
Dácana dia a-atajai batso Tadicatapoa maesa  
pi-ama.

**ATAPEAPOCANAMETSE TADICATAPOA ISA-ELICANA  
JABATI ME-ODI EAPO BIYO**

Joda tata Jonasa manoíbojo, Tadicatapoa alelajaihue ea. Dya peada-ishá tsio dácuaejipoi eibo. Da manoibo-ishao peada-ishá tsio. Dipa a-odi ea. Cuáejipoa naeda shabaja-odi pa-atapojo dia a-odi ea. Ai-ize ai-aicatapoi pó-anipo biyo huada cuenecuae-odi pa-atapojo, dia a-odi ea. Jepe naeda betalipi bale dá-aso dia a-atajai epo, Tadicatapo huapo epo. Jepe pamodacatamo ashabataisi, ai acuaetaisi epo. Tadicatapaezo modoípoipocananae, cuíchacatapo tata esicana nae dia popai. Cuaeji peadaja cuáesatanipo bét sabani pehue ahuiqui-odi. Cuaeji peada-ishá netitsio, damo isi-isi batso ishe-ana. Dipa pehue ánabishapo pehue a-odi ea. Dácanaja dipa ánabishapo pehue a-odi batso, Tadicatapoa atapeapocanametse jabati métsaneibo-ishá, elijo patso pa mae báatini pojo. Atso eshoi huada Asiliacana eilo, isa-élicana jepe paishetapojo, jepe pajeotapojo. Apamo



mala poibo-ishao huada Babilóniacana bisha  
eilo, Jelosalénelele maesa pa-atapojo,  
jodopo isa-éllicana jepe opia hua lélebeneje  
padonatapojo. Babilóniacanaja jeotao, da  
isa-éllicana 70 pamoa malame Babilónia eiyeo  
neti.

Dátsono jodo netio, Tadicatapoa dia métanio,  
Babilónia netimetsepoa dacana  
ecuae:

--Miqueda eiyeo menetijajoboque-ish  
--ea.

Atao, isa-élicana jepe Canana  
eiyebeneje pónaibo-ish. Jodo  
cuaiñaibo-ishatso Jelosaléneleleo  
Tadicatapotae noahue eibo-ish. Atso,  
cuáejipo tata Nejemía nae, dácanaja  
lélebiahuelei eibo-ish. Da apetso da  
isa-élicana jodo Canana eiyeo  
huócuatibo-ish. Datsio dipahue  
Tadicatapoa alelajaihue dya peada-ish, dya  
peada-ish cuáejipoi a-odi ea. Dya joda  
cuichao, dya joda cuichao,  
ai-ize ai-aicatapoi pó-anipo biyo  
cuenecuae-odi ea. Jodalipi biyo mipa  
cuenecuae-odi ea:

"Jodalipi Beleneleleo jaidyaohue pó-ani."  
(Miquéa 5:2)

"Tataja pibamahuepo mamaseo bádeani."  
(Isa-ía 7:14)



"Huadamo ai cuipa pi-ama pohue, doda pi-ama  
pohue, apamocanaja joda doda báatani."  
(Samo 69:4)

"Jodalipi tatacanaja dipanoshi sipati  
sipati e-atani." (Samo 27:12)

"Tatacanaja dipanoshi sipame eatani bime  
huadamo tsiba pehue e-atani."  
(Isa-íá 53:7)

"Abada bani noshi alelajaipo tataja  
jodalipi tímehuiquihue e-atani."  
(Samo 41:9)

"30 pamoa diñelo jalidyapo titao joda  
tíhuiquihue e-atani."  
(Secalía 11:12,13)

"Tatacanaja dálipi cuediapo a, cuelijipo a."  
(Isa-íá 50:6)

"Jodalipi cuádajapoi nedacue mépo-ani."  
(Isa-íá 53)

"Masahuecatapo tata isheme alelajai  
bataecata tatacanaja joda eisheanaibome  
e-ataibo-ani." (Isa-íá 53:12)

"Huada emedetse huatsidetse aiyaja  
nónlonetiataibo-ani." (Samo 22:16)

"Ecuichacanaja joda pa-apohue masabame  
e-ata-ani." (Samo 22:6-8)

"Izijajonashili tia e-atani." (Samo 69:21)

"Joda masabai poánipocana poi jodalipi  
Tadicataponae mémimi-ani."  
(Isa-íá 53:12)

"Huada etsoacanamo aiyaja pimesalima  
e-atani." (Samo 34:20)

"Jodalipimo Tadicatapo leleo  
pótsoaibo-ishá." (Samo 63:18)

"Jodalipimo eohuao nojo betacata pó-ani."  
(Malaquía)

Mipa ai-ize ai-aicatapoi pó-anipo biyo  
cuenecuaeme a-odi ea, Tadicatapoa,  
jocuae jicana cuichao. Tata Dabida,  
tata Isa-íá, tata Miquéa, tata Secalía,  
tata Malaquía dácana cuichao dia ea. Dipa  
cuénecuaetanipo jilica cuichao zehuipe-odi  
cuáejicanaja ea. Dipa batso Tadicatapo  
huápopocanaja joda ai-ize ai-aicatapoi  
pó-anipo tsí-izoa anae neti epo.

*Jidyo matame Tadicatapoa  
zehui metaisapocana.*

**400 PAMOA MALAMEMO TADICATAPOA  
AI PICUAEMA EAPO BIYO**

*Tata Malaquita cuðejipoi matacata ahueyaibotso, Tadicatapoa 400 malamemo aisé cuðejipoi pi-ama. Dátsono huada ecuichacana ai picuaema pehue. Huada tata Moisé, tata Josoé, tata Dabida, jepe tatacananae dipahue, dácana cuichao huada zehuimetanapo bale poyoa. Joda jilica "Tadicatapoa Eajaenatipo Jilica" jejeme alelajai. Joda shipa papoyoapojo isa-éli tata beta jilicapoipocana epo. Dácanaja Tadicatapoa jilica zehuiyoa-odi ea.*



*Dipapohue zehuijaidya a-odi ea, Tadicatapoa  
jilica dipahuecata poyoa papopojo, liji  
pipitsatima papopojo.*


*Datsio isa-élicana jepe  
Jelosaléneleleo neti. Jodo nētipocana  
jepe Tadicatapotaezo dō-odi po-odi epo,  
Tadicatapoa ecuaepo jilica patsaba-ezae.  
Pe-ishapo lélécanao nētipocanaja hua-apo  
léléohue mimitaecana ea, jodo dō-odi potso  
Tadicatapoa jejeme patsaba-ezae. Datsio  
isa-élicana betalipi pehue Tadicatapo huapo  
bime Tadicatapoa ai-ize ai-aicatapo  
eiloataibo-ani bamehue ea dācanaja.  
Tata Abama, Isaca, Jacobo, Moisé, Dabida  
dādocuacanaja bamehue ea-isha batahue ea.  
Ai masahue atso, ai huaeni ishe-anatso  
tópeasha a-odi cānaja ea, da pamemanopojo.  
Dipa a-odi batso Tadicatapoa dācandaja  
masahue eashapo bebani pehue a-odi ea.  
Dācana bale hua todicanaroí a-odi ea.  
Dācana ai-ize ai-aicatapo jaídyaohue  
pō-anipo "ndatso quia daehue potame" anae  
neti. Jépecana pamodacatamo Tadicatapo  
iyoda pibama. Allo pehue.*

Dácaná dipa poánitsio qui-éco tataja,  
Alejado bánamepo, ai-isheipocananae jodopo  
eiyecana apamo méjemipeibo.

Isa-élícanaja eiye, Ejito eiye,  
Asilia eiye, Babilónia eiye daocua  
méjemibo. Dipa atso joda eiyeo nétipocana  
huada jejemecana eizedeamepe. Atao,  
dádocuacuahue joda eiyecanao nétipocana  
mimitsoati pitsadamahue, qui-éco mimi  
metse. Apamo mala poibo-ishao,  
lomanocanaja bisha daocua joda eiyecana  
méjemibo. Dácanaja apamocana eisheanaibo.  
Jépecana hua eiloi poi batahue ea.

Isa-élícaná betamo eishe, beta bale hua  
eiloi poi a. Da lomanocanaja isa-élícaná  
ai ti-odi eme. Lomanocanaja dipa me-odi  
batso, isa-élícaná dácananae dódacue  
jabati-odi epo. Tadicatapoa  
cuenecuaetaisapo ai-ize ai-aicatapoa,  
cuaiñaiobotso huada joda lomanoshilicana  
eishehuiquiataibo-ani bame easahua,  
isa-élícanaja. "Joda dipa poibojo ajaicata

*netime pó-ani ja", pósahua. Dipa bame  
eatani batso ai-ize ai-aicatapo náatso  
cuaiñatsobalecata bátini epo, isa-élicana  
datsio.*



**ASILIA EIYE**

• Alana

• Nínibe

Mano

Opate

• Babilónia

EIYE

CADEA EIYE

Ole •

TSEINENA

ABAMA POBALE  
POJOJOPO EIYE

ISA-ELICANA POBALE  
POJOJOPO EIYE